

Wedau Mark



The Gospel of Mark in the Wedau Language of Papua New Guinea

Wedau Mark

The Gospel of Mark in the Wedau Language of Papua New Guinea

Buk Mak long tokples Wedau long Niugini

copyright © 2010 Wycliffe Bible Translators, Inc.

Language: Wedau

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-08-30

PDF generated using Haiola and XeLaTeX on 19 Dec 2025 from source files dated 12 Dec 2025
aa19f3e3-98fb-51fa-9c53-3906edc75f11

Contents

Mark	1
Apasol	38
Psalm - Wela ma Pari	95

Mark Riwana Aiaina, Mark i girugirumia

Pariverena

Wei lamna God Natuna Iesu Keriso Messiah Riwana Aiaina karena. Rava wei bukana i girumi, wavana eġa ita riweta. Wate tauviararamana e ririwa da Mark i girumi. Mark, lamna eġa Apasol, wate tauviararamana maġamaġau i notai da tauna, Peter maiteni au Rome i mae. Ma Peter, Iesu ana kua ma ana viararamana maġamaġau Mark i riwei. Anina ma Mark wei riwana i girumi da tauvitumaġana au Rome ita aramane, Iesu aiwai i kauai.

Riwa karena i girugirumia e vivieġeta da wei lamna Iesu Keriso Messiah God Natuna Riwana Aiaina. Aubaina, wei au bukana ta inainai Iesu awarina rewapana da kua maġamaġau ita kauai. Wei kauai tana inainai maranai: e viviararamana; ma arua-apoapoe i viviaġaġana-opunei; ma rava doridoriai e vivilawani; ma ġo'apoapoe e notanota tawanei. Mark, Iesu ana nola ma ana kua i girumi ma eġa ana viararamana ita giruma-guratei. Mark i vieġeta menanare Iesu au korosi i 'raġe da rava anatapai ita vilawanai ma God menanare, Iesu iraġale i vovaimairini.

John Taubabataito, Iesu ana aninae i vovokaukauei

(Matthew 3:1-12; Luke 3:1-18; John 1:19-28)

¹ Wei lamna Iesu Keriso Messiah God natuna Riwana Aiaina karena.

² Wariaġa peroveta Isaiah i girugirumia nanare:

“Ona rautaniġane! Au peroveta au naom ana paritawanei

da am aninae ina vovokaukauei.”

(Malakai 3:1)

³ ☆ *“Peroveta au mutulua e viviġoreġore:*

‘Taumi BADA ana aninae ona vovokaukauei,

ana eta ona vovai-jijimani!”

(Isaiah 40:3)

⁴ Ma taupariverena John i nei au mutulua da rava i bababataitoi ma God riwana i jimejime i pa, “Ami ġo'apoapoe ona voterei, ma ona mae-taviremi God awarina ma ami ġo'apoapoe ina nota-tawanei ma ana babataitoimi.”

⁵ Ma rava anatapai Judea au paratana ma au Jerusalem i nae da John ita rautaniġane. Maranai ai ġo'apoapoe i rupeni, John, tau i babataitoi au waira Jordan.

⁶ Ma John, kamel aparana metametanana i oteoteni ma ana tairoro ġamoġamo opina. Ana lam kapau ma manigewa.

⁷ Ma tauna, rava i ririwei i pa, “Rava au muriu e nenei i ġetelara, eġa me tau. Eġa tagotagogiu da ana ae uma ġuravana ana rupeni.

⁸ Tau wairei a babataitoimi, wate tauna, Arua Vivivireinei ina babataitoimi.”

John, Iesu i babataitoi

(Matthew 3:13-17; Luke 3:21-22)

⁹ Lamna maranaina Iesu, Nasaret, Galili i netawanei ma i nei ma John au waira Jordan, tauna i babataitoi.

¹⁰ Ma maranai Iesu wairei i ġeġetai, i 'nana da mara i wanatawanei ma Arua Vivivireina me ġabubu i ġairai.

11 ✠Ma God ponana marei i opu ma i riwa i pa, “Tam, tau natu au nuavaina ma u vinuaiainiu.”

Satan, Iesu i raelari

(Matthew 4:1-11; Luke 4:1-13)

12 Ma lamna au murina God Aruana Vivivireina Iesu i paritawanana-opunei au mutulua.

13 Ma au pom 40 au mutulua i mae. Ma Satan, tauna i raelari. Ġamoġamo ġaiġaiawai nai au dobuna i mamae ma God ana anela marei tauna i paini.

Iesu, lebalebaġai ruaġa ma ruaġa i raukwatuei

(Matthew 4:12-22)

14 Ma gulau Herod, John i pani. Ma muriai Iesu i nae au Galili da rava awarii God Riwana Aiaina i jimei.

15 Ma Iesu i ririwa i pa, “God ana mara vinevinena i ġetai. God ana vibadana vouna rava aubai, lamna i turiai. Ami ġo’apoapoena ona rupeni ma ona mae-tavirem ma Riwana Aiaina ona vitumaġanei!”

16 Mara tagogi Iesu Galili topana au gerana i bababara nae. Ma lebalebaġai ruaġa i ’nanai, Simon* ma ana tevera Andrew au topa i rarauagida.

17 Iesu i riwei i pa, “Ona nei ma ona votaġotaġoiu. Ma me marina iana o tutuarui; nanare, ana viararamanimi da rava ona tuarui da ina vitumaġaneu!”

18 Ma maratogogi ai agida i voterei ma Iesu i votaġotaġoi.

19 Ma tau i au gera i verau-nae. Iesu, Zebedi natunatuna i ’nanai, James ma John ai au waga ai agida wanawanarorona i vokaukauei.

20 Ma maratagogi tau i ġorei, “Taumi ona nei ma ona votaġotaġoiu!” Ma tau amai Zebedi† ana taunola maiteni i voterei ma Iesu i votaġotaġoi.

Iesu, arua-apoapoena rava awarina i viaġaġana-opunei

(Luke 4:31-37)

21 Iesu ana Tauvotaġotaġo maiteni i nae au Capeniam.‡ Ma au Sabat, Iesu i rui au pari numana ma God Riwana Aiaina, viararamanana i vikarei.

22 Tauna ana rewapanana i viararamana eġa me mai Jew ai tarawatu babadai § nanare. Ma taurautaniġana ana viararamana i baiei.

23 Maranai Iesu pari au numana i viviararamana ma oroto arua-apoapoena orana i rui ruinia i garara

24 i pa, “Iesu Nasaretei, aiwai e ġoeġoei awariai. Tam weka u nei da ma viapoapoeniai bo? Tau a aramanei tam aiai. Tam Vivivirem Godei!”

25 Ma Iesu riwa bagibaginei i riwei i pa, “Ma genuana! Nai orotona ma opu-tawaneii!”

26 Ma arua-apoapoena orotona i viaikwajiei ma ponana i rata, i garara ma i opu-tawanei.

27 Ma rava anatapui i bana-kauei ma tau i ava i vitarapiri, “Wei aiwai? Wei viararamana vouna ma ana rewapana maiteni! Wei ravana awarina rewapana e mamae da arua-apoapoena i riwei ma tauna i vovoteletelei!”

28 Iesu nolana, maratagogi i tua Galili au anatapuna.

✠ 1:11: Gen 22:2; Isa 42:1; Mrk 9:7 * 1:16: Wavana ġelauna Peter † 1:20: Eng. *Zebedi*.

‡ 1:21: Eng. *Capernaum*. § 1:22: Wariaga BADA, ana Tarawatu Moses i verei mai Israel aubai.

Iesu, rava maḡamaḡau i vilawani
(Matthew 8:14-17; Luke 4:38-41)

²⁹ Nai marana pari numana i opu-tawanei ma ana tauvotaḡotaḡo maiteni i nae Simon ma Andrew ai au numa. James ma John maiteni i nae.

³⁰ Simon poiana wavinena ini ḡuḡurana ana au animatave i matamatave ma maranai Iesu i ḡeta ma numa ravai, tauna i pariverei.

³¹ Tauna i nae wavine awarina, nimana i vojijini ma i voagui da i vomairi. Lamna maranaina, ini ḡuḡurana i voterei ma wavinena, tau i paini.

³² Ma au bigai madeḡa i neulai au murina, rava, ai rava doridoriai ma aiavoi arua-apoapoei au orai maemae, i nei Iesu awarina.*

³³ Ma rava anatapui nai au melagaina i vitagogiei numa au metaetana.

³⁴ Ma Iesu, maḡamaḡau ai doria nununai i vilawani ma arua-apoapoe maḡamaḡau rava awari i viaḡaḡana-opunei. Ma arua-apoapoena i aramanei da tauna anina God natuna ma lamna aubaina tau i viḡaei da i genuana.†

Iesu au Galili i raugugula nae
(Luke 4:42-44)

³⁵ Ubaubana boiboḡi, Iesu i vomairi ma numa i opu-tawanei ma i nae gabu au genugenuanana. Ma kampa, God awarina i raupari.

³⁶ Muriai, Simon ana rava maiteni i nae da i baiei.

³⁷ Ma maranai Iesu i nelaḡai, ma i riwei i pa, “Rava anatapui e baibaieim.”

³⁸ Iesu i paribelei i pa, “Tana nae taon ḡelaui au ḡereḡere, ma kampa maiteni God Riwana Aiaina ana raugugulei. Tau wei lamna aubaina a nei.”

³⁹ Ma Galili au anatapuna i naeni ma pari au numai i raraugugula ma arua-apoapoei i viopuni.

Iesu, oroto opi dorianana i vilawani
(Matthew 8:1-4; Luke 5:12-16)

⁴⁰ Anina ma rava awarina opi dorianana, i nei Iesu awarina ma au naona i peu ma i raudune ma agu i vibagei i pa, “Mepa da ma goei, anina da ma viaiainiu.‡”

⁴¹ Ma Iesu nuabola orana i oai ma urana i viloloi da i vodadani ma i riwa i pa, “Anina a goeḡoei, ma aii!”

⁴² Ma maratogogi opi-dorianana, oroto i voterei ma tauna i aii me.

⁴³ Anina ma Iesu i riwana-guratei i pa,

⁴⁴ “Tam ma nae! Aiwai i tuputupua awarim, eḡa rava ma vieḡei! Ma jijimanina ma nae pirisi pulo tau apuna awarina ma vietataiana-melem ma viaiaina pulona Moses i ririweia ma kauai da ina vimataira tau awari! Pirisi pulo tauapuina ana vianina ina verei da tam u lawana.”

⁴⁵ Wate orotona i nae ma aiwai awarina i tuputupua lamna melagai au anatapuna i babaniana-naiei. Ma lamna aubaina Iesu melagai anatapui i vorei ma mepa eḡa rava ita mamaelana kampa i nae. Wate rava mepa maemaei i nei Iesu awarina.

* **1:32:** *Madega ina neulai au murina* anona lauvitau ana mara damona. Mai Jew ai lauvitau ana mara au Friday madeḡa e neneulai au murina e vivikarei da Saturday madeḡa e neneulai au murina e vorovorovei. † **1:34:** Iesu i aramanei, mepa da ita kauai da arua-apoapoei ita riwa da tauna Keriso; lamna rava tauna ita egari da sorodia ita vibadei ma ta viḡavia, me tau i vivinua-notenotei nanare. Jhn 6:15 ma inanai. ‡ **1:40:** Mai Jew ai Tarawatu e ririwa da rava lepeleperai, tau mirimirai me dobu ḡela ravai - *Jentail*. Mai Jew amapo nai ravai eḡa ina vodadani. Rava mirimirai eḡa maiteni ina vitaparoro bo au melagai ina mae. Lamna aubaina mepa da rava mirimirana i lawana, tauna ina ai-me, God tauna ina vaimelei ma rava maiteni ina mae ma ina taparoro.

2

Iesu, oroto gwaḡagwaḡana i vilawani
(Matthew 9:1-8; Luke 5:17-26)

¹ Iesu ana tauvotaḡotaḡo maiteni i wanavira-melei au Capeniam. Ma au pom ruaḡa au murina, rava nolana i nonori da tauna i nememei au melagai.

² Ma rava maḡamaḡau i vitagogiei au numa. Patara i rata guratana da numa i oai ma metaeta maiteni i mae-potai. Iesu, God riwana i raraugugulei.

³ Nelara ruaḡa ma ruaḡa, oroto gwaḡagwaḡana rasirasiei i avarai da i neiai Iesu awarina.

⁴ Rava i maḡa guratana ma eḡa tagotagogina da ita neiai Iesu awarina, lamna aubaina da tetelei i amḡaena da au poewa ma gavogavo i bauni ma kampa gwaḡagwaḡana ana rasirasina i tere-ḡairei Iesu au naona.

⁵ Ma Iesu, nai ravai i 'nanai da ai vitumaḡana i rata, lamna aubaina gwaḡagwaḡana i riwei i pa, "Natu, am ḡo'apoapoei, a nota-tawanei."

⁶ Anina mai Jew ai tarawatu babadai ḡelau i kiakiala, au orai i vinua-notanota i pa,

⁷ "God ainelana ḡo'apoapoei e notanota tawanei. Aiwai aubaina wei ravana nanare e bababani? Tauna, God e vivijiboḡi ma e ririwa da tauna, God nanare."

⁸ Maratagogi, Iesu Aruanei ai nota i vaia ma i riwei i pa, "Aiwai aubaina wei kauai o vivinua-notenotei?"

⁹ Metauna i telatela: ḡwaḡagwaḡana ata riwei, 'Am ḡo'apoapoe a nota-tawanei.' Bo ata riwei, 'Ma vomairi, am animatave ma vaia ma ma babara?'

¹⁰ A ḡoei da taumi ona aramanei da Rava Natuna au dobu ana rewapana e mamae da rava ai ḡo'apoapoe ina nota-tawanei ma ina vilawani." Ma gwaḡagwaḡana i riwei i pa

¹¹ "A riwem, ma vomairi, am animatave ma vaia ma ma nae au numa!"

¹² Orotona i vomairi ma maratagogi aravi i vaia ma i babara nae. Ma patara i raraubiga, i bana-kauei ma God i voepaepai ma i ririwa, "Tauai eḡa melanai kaua wenanare ata inana!"

Iesu, Levi i kwatuei
(Matthew 9:9-13; Luke 5:27-32)

¹³ Iesu, Capeniam i voterei ma Galili topana au gerana i bababara ana tauvotaḡotaḡo maiteni. Ma patara i nei awarina ma tauna God riwana viararamanana i vikarei.

¹⁴ Ma i verau-nae aburuna ma Apius* natuna Levi i 'nanai, ana bagibagi au gabuna i kiakiala ma *tax* i tamitami Rome gabemanina aubaina. Iesu i riwei i pa, "Ma votaḡotaḡoiu!" Levi i vomairi ma i votaḡotaḡoi.

¹⁵ *Tax* tautami ma ḡo'apoapoei ravai maḡamaḡau, Iesu ma ana tauvotaḡotaḡo i votaḡotaḡoi. Ma anatapui, Levi ana au numa i kiala gogona ma i amam.†

¹⁶ Tarawatu Babadai ḡelau lamna Pharisi, ma tau i 'nanai da Iesu *tax* tautami ma ḡo'apoapoe ravai maiteni i amam. Anina ma Iesu ana tauvotaḡotaḡo i riwei i pa, "Aiwai aubaina Iesu *tax* tautami ma ḡo'apoapoei ravai maiteni e amam?"

* 2:14: Eng. *Alphaeus*. † 2:15: Moses, BADA ana Tarawatu i girumi ma mai Pharisi wei Tarawatuna i votaḡotaḡo-kauei. Ma tau kaua waduboi amamai ḡariei maiteni i vovoteletelei ma i riwa da aiavoi Tarawatu eḡa ita voteletelei lamna tau rava apoapoei, ḡo'apoapoe tau kauai.

17 Ma maranai Iesu wei riwana i nononori ma tau i riwei i pa, “Rava lawalawai, doketa eġa ita ġoeġoei ma rava doridoriai, doketa e ġoeġoei. Tau a nei ġo’apoapoei ravai aubai ma eġa rava jijimani aubai.”

Uji vitaraviravirana

(Matthew 9:14-17; Luke 5:33-39)

18 Mara tagogi, John Taubabataito ma Pharisi ai tauvotaġotaġo i ujiuji. Ma rava ġelaui i nei Iesu awarina ma i vitara-virevirei, “Aiwai aubaina John Taubabataito ma Pharisi ai tauvotaġotaġo e ujiuji, wate tam am tauvotaġotaġo eġa ita ujiuji?”

19 Iesu i paribelei i pa, “Taumi o notanotai da tau i aiavoi i raukwatuei tavine ana au torela, ina mae lota bo? Eġateni kaua! Maranai tavitavine vou orotona, tau i maiteni e mamae, tau i eġa ina uji.”

20 Wate mara ina ġeta maranai tavitavine vou orotona ina vaitawanei ma lamna maranaina ana rava ina uji.”

21 Ma riwa e mamae, “*Tau kaua vouna a neiai eġa me taumi ami kaua wadubona nanare.* Eġa aiai ravana, gara vounei gara au wadubona ina popo-ratui da gavogavo ina vopotai. Mepa da nanare lamna, gara vouna gara wadubona ina roroi ma gavogavo ina rata.

22 Ma nanare, eġa aiai *wine* vouna ina vaini da *wine* aniterenana wadubona ġamoġamo opinei au orana ina iwaġi. Mepa da ina kauai, lamna *wine* vouna ina dodo ma *wine* aniterenana wadubona ina viairoroi ma *wine* ma aniterenana ina wanabauni[‡]. Wate *wine* vouna, anina da *wine* aniterenana vouna au orana ina iwaġi.”

Iesu ana riwa Sabat aubaina

(Matthew 12:1-8; Luke 6:1-5)

23 Mara tagogi au Sabat, Iesu ana tauvotaġotaġo maiteni, *witi* wapuna au orana i nena. Ma ana tauvotaġotaġo *witi* rovei i vaini ma i amam.

24 Pharisi ġelaui i ‘nanai wei kauana i kaukaui ma tau i Iesu i riwei, “Ma inana, ata Tarawatu e mamae da Sabat, lamna lauvitau ana mara. Aiwai aubaina tau i vovobagibagi?”

25 Iesu i paribelei i pa, “Me peroveta i girugirimia nanare. David ana tauvotaġotaġo maiteni am-iraġe ma aiwai i kauai? Taumi o iavi ma aiwai aubaina anona, eġa ota vinua-notenotei?”

26 *Pirisi Ġeġetelarana Abiathar ana au mara, David, God ana au numa i rui ma palawa vovivirana i vaia ma ġelaui ana tauvotaġotaġo maiteni i verei da i ani. Moses ana Tarawatu e mamae da pirisi ava palawana e aniani.”

27 Ma Iesu ana riwa au damona i riwa i pa, “God, Sabat i kauai da rava voaguna aubaina ma eġa rava ita kauai Sabat voaguna aubaina.

28 Ona vinuanotenotei, tau Rava Natuna, lamna aubaina tau anina Sabat badana.”

3

Iesu, Orotu urana irairagena i vilawani

(Matthew 12:9-14; Luke 6:6-11)

1 Mara ġelauna au Sabat, Iesu i naeme au pari numana ma oroto urana irairagena i ‘nanai kampa i kiakiala.

[‡] 2:22: Wine e tuputupua ma puropurona wine ana aniterenana ina viasisikikai

☆ 2:26: 1Sa 21:1-6

² Ma Pharisi ġelau i ġoei da aiwaiei Iesu ita viwawui. Lamna aubaina i 'nana-taġotaġoi da oroto ita vilawani bo eġa au Sabat.

³ Ma Iesu, orotona i riwei, "Ma nei, au naoi ma mairi!"

⁴ Ma Iesu, ravai i vitara-virevirei i pa, "Sabat au marana, metauna i aii: Aiaina tana kau ei bo apoapoen a? Tana vilawana bo tana viraġena? Tarawatu aiwai i riwei?" Ma anatapui i genuana.

⁵ Iesu ana amloġaġaina i 'nana viravira ma i 'nanai da tau i orai i bado ma nuanuana i bola-kau ei. Ma orotona i riwei i pa, "Uram ma viloloi!" Ma i viloloi ma i lawana.

⁶ Ma Pharisi maratagogi i opu ma i nae Herod ana rava awarii* ma ai oga i tarai da Iesu mena ita viraġenane i.

Iesu, Patara awari i babani

⁷⁻⁸ Iesu ana tauvotaġotaġo maiteni, tau i netawane i ma inae au gera da ita vilauvitau; ma mai Galili patara ġaeġaena i votaġotaġo. Rava maġamaġau i, Iesu aiwai i kaukaueia nolana i nonori ma mai Galili ma Judea, Jerusalem taon, Idumea ma taon ġelau i waira Jordan taon au babagelauna, Taia taon ma Sidon taon,[†] tau i anatapui i nei Iesu awarina.

⁹⁻¹⁰ *Iesu, rava maġamaġau i vilawani. Ma lamna aubaina doridoriai maġamaġau i viviamdudu ma i ġoei da tauna ita vodadani. Lamna aubaina ana tauvotaġotaġo i riwei da waga i vokaukauei.

¹¹ Maranai, arua-apoapoei rava au orai maema ei, Iesu i 'nanai ma au naona i peu ma i garara, "Tam God Natuna!"

¹² Ma Iesu tau i viġaei da avena ita vieġa da tauna ai ai.

Iesu ana Apasol 12 i vinei

(Matthew 10:1-4; Luke 6:12-16)

¹³ Anina ma Iesu i ġae au ola ma ana ġoane i nanare, rava i kwatuei da awarina i ġei.

¹⁴ Tauna, nelara 12 i vinei da maiteni ita mae ma muriai ita paritawane i da ita raugugula. Ma i ġore i Apasol.

¹⁵ Ma i vovai-virewapani da arua-apoapoei rava au orai ina viopuni.

¹⁶ Tau i vinevine i 12 ai wava wenanare,

Simon i ġoreġoreia Peter[‡]

¹⁷ ma Zebedi[§] natuna James ma ana tevera John i ġore i Boaneges, anona waiparara natunatuna,

¹⁸ Andrew,

Philip,

Batolomeo,*

Matthew,

Thomas,

James, tauna Apius[†] natuna,

Thadeus,[‡]

Simon, tauna Ununurana,[§]

* **3:6:** Herod ana rava anona lamna mai Jew ai boru, tau i aiavoi Rome gabemanina i vovoagui. Tau i ai bada wavalatona Herod Antipas. Mai Jew maġamaġau i ma mai Pharisi maiteni, i notai da Herod ana rava tau i tauvibenabenam ai rava au oiena awarii. [†] **3:7-8:** Eng. Tyre & Sidon. Wei ravana eġa mai Jew. [☆] **3:9-10:** Mrk 4:1 [‡] **3:16:** Anona Ġaima. [§] **3:17:** Eng. Zebedi. * **3:18:** Eng. Batolomeo. [†] **3:18:** Eng. Alphaeus. [‡] **3:18:** Wavana ġelauna Judas - Luk 6:16 [§] **3:18:** Anona lamna tau i mai Jew ma tau i Rome e viviġaviei.

19 ma Judas Iskariotei; * tauna, Iesu tauvibenabenameina.

Rava i riwa da arua-apoapoei Iesu e vivibadei.

(Matthew 12:22-32; Luke 11:14-23; 12:10)

20 Ma Iesu ana tauvotaḡotaḡo maiteni i rui au numa. Ma patara i rieiai da tau i eḡa tagotagogina da ita am.

21 Ma Iesu ana numa ravai nolana i nonori ma i riwa i pa, “Tauna i bua.” Lamna aubaina i nei da ina taravaini.

22 Tarawatu babadai ḡelau i Jerusalemei i nei ma i riwa i pa, “Arua-apoapoei, ai bada Bielsibul,† Iesu au orana i rui ma lamnei arua-apoapoei e viviopuni.”

23 Lamna aubaina Iesu, wei Babadai i ḡorei ma awanainei i pa, “Satan amapo Satan eḡa ina viopuni.

24 Mepa da dobu ravai ina viḡavia vivira, lamna dobuna ita mae ava.

25 Ma nanare dam ina viḡavia vivira, nai damna ita mae ava.

26 Ma Satan ita vomairi ma ita viḡaviana-melei, amapo ita mae ava.

27 Taudanene amapo eḡa rava virewapanana ana au numa ina danene, eḡa da au naona ravana ḡuravei ina raḡini ma muriai ina danene.

28 Riwa kaua a ririwemi da God ami ḡo’apoapoei ma ami vijiboḡa anatapu i ina nota-tawanei.

29 Wate aiai da Arua Vivivireina e vivijiboḡi, God, nai ravana ana ḡo’apoapoei eḡa melanai ina nota-tawanei ma ana ḡo’apoapoei ina mae-nonoa.”

30 Iesu wenanare i babani, aubaina rava ḡelau e ririwa, “Iesu au orana arua-apoapoei e mamae.”‡

Iesu ana dam oina

(Matthew 12:46-50; Luke 8:19-21)

31 Iesu alona ma varevareina i nei ma au doa i maimairi ma riwa i paritawanei Iesu awarina da ita nei.

32 Ma patara Iesu i kiala kwaviviroi, ma taupariverena i riwei i pa, “Alom ma novunovum ma varevareim au doa ma e ḡoeḡoem.”

33 Iesu i paribelei i pa, “Aiai alou ma aiavoi varevareiu?”

34 Anina ma tau i kiakiala i ’nanai ma i riwa i pa, “Ona inana! Wei tau i alou ma varevareiu.

35 Aiai God ana ḡoana e kaukauei, tauna alou ma novu ma vareiu.”

4

Doa tapuna ma tapuna ai awanaina

(Matthew 13:1-9; Luke 8:4-8)

1 Iesu, giu i raukarena-melei Galili topana au adana. Ma patara i riei da ita rautaniḡanei. Ma patara i rata, da tauna au waga i geru ma i kiala ma waga i dudui da i virauopu au topei ma patara au gera i mae.

2 Ma kaua maḡamaḡau i awanainei i giu ma i viararamana i pa,

3 “Ona rautaniḡana! Taupaewa, ana wapu i vokaukauei ma pei i ravi awawari.

4 Pei ḡelau i au eta i peu. Ma kiu i ḡeta ma i ani.

* **3:19:** Iskariot, lamna Judas ana melagai wavana da auna lamna Iskariotei. † **3:22:** Eng. *Beelzebub*. Anona lamna, *nabugara ai bada*. ‡ **3:30:** Tarawatu tau girumi i parivaijijigei aubaina tau i ririwa da Arua Vivivireina ana nola lamna baravu da parauma. BADA eḡa melanai ai ḡo’apoapoei ina nota-tawanei.

⁵ Ma pei ġelau i doa au ġaiġaimana i peu, doa au avavana. Ma lamna aubaina maratagogi i gogo.

⁶ Wate maranai madeġa i rarani, maratagogi i poi, anona warami eġa ita ġaira guratana doa au orana.

⁷ Pei ġelau, modu donadonai au poui i peu. Ma modu donadonai i gogo ma pei i gogogo i lavani, ma eġa ita ua.

⁸ Ma pei ġelau doa au aiaina i peu ma i gogo kaua ma i ua, ġelau 30, ġelau 60 ma ġelau 100.”

⁹ Ma Iesu i riwa i pa, “Mepa da taniġami e mamae, riwa ona nonori!”

*Aiwai aubaina Iesu awanainei i babani
(Matthew 13:10-17; Luke 8:9-10)*

¹⁰ Maranai Iesu ainelana i mamae ma ana tauvotaġotaġo 12 ma tau-
rautaniġana ġelau i ġeta ma Iesu i vibaġai da awanaina anona ita riwei.

¹¹ Ma Iesu i paribelei i pa, “God ana vigulau ana kaua mamae govaġana; taumi i vieġemi ma rava au tano maemaei, tau i aiwai anataputui awanainei e paripari-verei.

¹² Lamna ana kau i wariaġa peroveta aiwai i girugirumia ina tupua:
“Tau i ina inana ma eġa ita inainanai.

Tau i rarautaniġana ma eġa ita araramanei;
ma lamna aubaina tau i eġa ita nenei God awarina
da ai ġo’apoapoe ita notatawanei.”

(Isaiah 6:9-10)

*Doa tapuna ma tapuna anoi.
(Matthew 13:18-23; Luke 8:11-15)*

¹³ Anina ma Iesu i riwei i pa, “Wei awanainei a babani ma anona eġa
ota aramane i bo? Ma awanaina ġelau menanare ona aramanane i?

¹⁴ Taupaewa, God riwana, rava anataputui e paripari-verei.

¹⁵ Rava ġelau orai i bagibagi me etanai. Riwa au tepana e rauraei, wate
maratagogi Satan e nenei da riwa rava au orai e vaivai-tawane i.

¹⁶ Ma rava ġelau orai me doa viġaiġaimana. Tau i, riwa i nonori ma
maratagogi ana nuaia i riwa e vaivaia.

¹⁷ Wate warami eġa da eġa ita mamae guratana. Ma maranai nuabola bo
rau-iviapoapoe e nenei tau i awari, aubaina tau i ai tumaġana God awarina
e tereterei. Tau i maratagogi e peupeu.

¹⁸ Rava ġelau orai me pei, modu donadonai au orai e gogogolana. Tau i
anina riwa e nononori.

¹⁹ Wate lawana ai nuabola ma mane ai nuavainana ma kaua ġelau ai
au nuaia i e ruirui ma God riwana e lavalavani da eġa ita uaua.

²⁰ Ma ġelau, tau i me pei doa au aiaina i peu. Tau i, lamna anina riwa
e nononori ma e vaivai-kau i ma e uaua: ġelau 30 ma ġelau 60 ma ġelau 100.”

²¹ Iesu i riwei i pa, “Rava, eġa rampa ita neineia i da iriga au gabaurina
ita tereterei bo vatara au gabaurina ta pa? Rampa ana au anikiala
e tereterei ta pa?

²² Kaua mamae govaġai, anataputapui a vieġai ma kaua govagovaġai
nanarena ana vieġai.

²³ Mepa da taniġami e mamae, riwa ona nonori!”

²⁴ Iesu i riwa i pa, “Aiwai o nononoria ona rautaniġanana-kau i, ruva
o ruveruveia, God nanare awarimi ina ruvai ma ġelauna ina tavipotoi.

²⁵ Lamna aubaina, mepa da riwau ona aramane i, tau ġelauna ma ġelauna
ana veremi. Ma tau i eġa ita aramane i, lamna aiwai aburuna i nononoria,
ina vine-boai.”

Pei gogogona ana awanaina.

²⁶ Iesu e ririwa i pa, “God ana vigulau me rava, *witi* peina au doa ita ravi-awawari.

²⁷ Ma waguvara e matamatave ma maratome e vovomairi ma pei e gogogo ma e rarata. Wate aiwaiei e gogogo, tauna e vivinuanainei.

²⁸ Doa ana nuaina, pei me *witi* e vivigogoi ma e uaua. Au naona e raraupairei ma muriai e roverove ma muriai anona e magumagura au tapina.

²⁹ Maranai i magura, rava petona e raraukarei. Tuaruta marana i ġetai.”

Pei aburuoina ana awanaina

(Matthew 13:31-32, 34; Luke 13:18-19)

³⁰ Iesu i riwa i pa, “God ana vigulau aiwaiei ana parivai-patepatei bo aiwai awanainei ana pariveremi?

³¹ Wenanare, wei aina peina, lamna me gaga peina, pei aburuoina au dobu ma au doa i paewi.

³² Ma peina i gogo ma i rata da ai muomuoi i ġetawanei ma raġaraġai ġaġae i terei ma au ġoui, kiu ai noġi ita voai.”

³³ Ma Iesu, awanaina maġamaġgai, rava au matai i raugugulei da tau i rau-taniġana ana au ruva nanare.

³⁴ Awanainei, rava awari i ġiugiu, wate ana tauvotaġotaġo ava awari kaua anatapui i vivieġai.

Iesu, kojikojira i ravi-daumori

(Matthew 8:23-27; Luke 8:22-25)

³⁵ Nai aubigaina Iesu, ana tauvotaġotaġo i riwei i pa, “Tana damana topa au baba ġelauna.”

³⁶ Anina ma tau i patara i voterei. Ma anatapui Iesu, maiteni au waga i geru ma i damana, waga ġelaui maiteni.

³⁷⁻³⁸ Iesu, waga au murina unutana i terei ma i raunuavuru. Ma kojikojira ġaġaena i tupua ma rabama, waga au tepana i rauraei ma waira, waga i oaoai. Ma ana tauvotaġotaġo, tauna i ravi-dagudagui ma i riwei i pa, “Taugiu, nuanuam e bolabolai bo eġa da tana iraġe?”

³⁹ Ma tauna i vomairi ma ive i viġaei ma i riwei i pa, “Ma genuana!” Ma rabama i riwei i pa, “Ma mae-genuataul!” Ma ive i wanatuini ma daumora ġaġaena i matave.

⁴⁰ Iesu ana tauvotaġotaġo i riwei i pa, “Aiwai aubaina o rovorovo? Taumi amapo da eġa ota vitumaġanal!”

⁴¹ Ma tau i rovo kaua ma i riwa vivira i pa, “Wei aiai ravana da ive ma rabama tauna e vovoteletei?”

5

Iesu, arua-apoapoena oroto awarina i viaġaġana-opunei.

(Matthew 8:28-34; Luke 8:26-39)

¹ Iesu ana tauvotaġotaġo maiteni Galili topana au baba ġelauna i ġeta, mai Gerasa ai au dobu.

² Wei au dobuna, arua-apoapoena oroto au orana maemaena.

³⁻⁵ Eġa aiai tagotagogina da ita vovaiubai. Mara maġamaġauna, aena ma urana seinei i pani. Wate wei i viaituituini, ma eġa tagotagogina da seinei ita pani. Marai ma waguvarai i nene-labalababa ma i garagarara ma ġaimei tupuana i boribori-meiei ma au kokoaga ma au ola i raunuma.

⁶ Maranai Iesu wagei i opuopu, arua-apoapoei orotona i rui ruinia, aueia Iesu i 'nanai ma kokoagei i ruba ma Iesu au naona i mae-peu ma i raudune.

⁷⁻⁸ Iesu, ravana i riwei i pa, "Arua-apoapoena, wei orotona ma opu-tawaneii!" Ma orotona, ponana au aidamo ma i garara, "Iesu, God Aidamo Telarana Natuna! Aiwai awariu e goe goei? God wavanei a vivibağaim da eğa ma kovoğiu!"

⁹ Iesu, orotona i vitara-virevirei i pa, "Tam wavam aiai?"

I paribelei i pa, "Tauai a mağa, aubaina tau wavau lamna Gavia Patarana."

¹⁰ Ma arua-apoapoei, Iesu i vibağa-guratei da avena nai dobunei ita viopuna-tawanei.

¹¹ Ma poro boruna gaeğaena au gereğere ola au adana i labalaba.

¹² Ma arua-apoapoei, Iesu i vibağai, "Ma paritawanelai poro au orai ana rui."

¹³ Iesu i vianina. Ma arua-apoapoei, orotona i opu-tawanei ma poro au orai i rui. Poro boruna 2,000 nanare olei i ruba gaira da au topa i monu.

¹⁴ Ma poro taipainii i ruba nae au melagai ma au wapu; ma riwa i vibabara. Ma rava i nei da ita inanai aiwai i tupua.

¹⁵ Ma maranai i nae Iesu awarina, orotona au naona arua-apoapoei patarai au orana i mamae; tauna i kiakiala, gara i oteni ma ana nota jijimanina. Ma tau i rovo kaua.

¹⁶ Ma aiwai i tupua orotona ma poro awari, tau i 'nainanaia, rava i riwana-naiei.

¹⁷ Ma dobuna ravai, Iesu i vibağai da dobuna ita oputawaneii.

¹⁸ Iesu au waga i gerugeru ma orotona, Iesu i vibağai i pa, "Tau maiteni tana nae."

¹⁹ Iesu i viğaei ma i riwei i pa, "Ma naeme am au dam. Ma BADA kaua aiwai gaeğaena i kaukaueia ma ana iviaiai tam awarim, tau i ma pariverei."

²⁰ Ma anina orotona, Iesu i netawanei ma i nae au Dekapolis (*melagai 10*) da Iesu aiwai awarina i kaukaueia, rava i riwana-naiei. Ma tau i anatapui i nononoria i baiei.

*Iesu, Jairus natuna wavinena ma wavine doridaiana i vilawani.
(Matthew 9:18-26; Luke 8:40-56)*

²¹ Iesu wagei i damana me topa au baba gelauna. Maranai kampa i geta ma topa au adana, ma patara i rieiai.

²² Pari numana badana wavana Jairus i nei weka ma maranai Iesu i 'nanai, tauna Iesu au aena i mae-peu

²³ ma i vibağa-guratei i pa, "Natu guguinina e irairağe. Ma nei ma uram au inina ma terei ma ina lawana."

²⁴ Anina ma Jairus, Iesu maiteni i nae ma patarana i mae gariğuruvi ma i vogağoi.

²⁵ Wavine tagogi kampa patarana au orana awarina tara-doriana i mae da madeğa 12 i kwa.

²⁶ Ana mane anataputapuna, dokedoketa mağamağau awarii i tawanei ma eğa tagotagogina ita vilawani ma amapo da ana doria i rarata.

²⁷⁻²⁸ Tauna, Iesu nolana ma ana babani i nonori ma au orana i vinua-notanota i pa, "Mepa da ana gara ava ana vodadani ma ana lawana." Ma tauna, Iesu murinei i nei ma ana gara i vodadani.

²⁹ Maratagogi, tara-doriana i wanatuini ma malana i vaia da i lawana.

³⁰ Nai maranaina, Iesu malana i vaia da ana rewapana i opu-tawanei ma i mae-tavirei patara au poui ma i riwa i pa, “Aiai au gara i vodadani?”

³¹ Ana tauvotaġotaġo, tauna i riwei, “Ma inanai, patara i mae gariguruvim! Ma menanare da u riwa ‘Aiai i vodadani?’”

³² Wate Iesu i ‘nana viravira da ita inanai aiai i vodadani.

³³ Wavine i rovo kaua ma i sisisi, wate i aramanei aiwai awarina i tupua ma i nei ma Iesu au naona i raupari ma aiwai anatapui i vieġei.

³⁴ Anina ma Iesu, wavine i riwei i pa, “Natu, am tumaġana i vilawanim. Am doria i kwa, ana nuaubam ma nael!”

³⁵ Maranai i bababani ma rava ġelau i Jairus ana numei i nei ma i riwei i pa, “Natum ana mara i kwa. Eġa Taugiu ma visina-viravirai.”

³⁶ Iesu ai babani i nonora-tawanei ma Jairus i riwei i pa, “Eġa ma rovo, ma vitumaġanal!”

³⁷ Iesu, rava ġelau i viġaei ma Peter ma James ma ana tevera John maiteni i nae.

³⁸ Ma Jairus ana au numa i ġeta ma Iesu, patara i ‘nanai; i toutou ma i taratarakwatu

³⁹ ma i rui ma tau i riwei i pa, “Aiwai aubaina o taratara-kwatu ma o toutou? Tevera eġa ita iraġe, tauna e matamatave ota.”

⁴⁰ Ma tau i, Iesu i kakei, ma lamna aubaina rava i viopuni au doa ma tevera alona ma amana ma tauna ana tauvotaġotaġo tonuġa maiteni i rui mepa tevera i matamatave lana.

⁴¹ Iesu, tevera nimana i vaia ma i riwei i pa, “*Talitha kum!*” wei anona, “Kukuma, ma vomairi!”

⁴² Maratagogi i vomairi ma babara i vikarei (Tauna ana madeġa 12). Ma tau i ba kaua.

⁴³ Iesu, tau i riwana-guratei da eġa aiai ita vieġei ma i riwa da ita viambagibagi.

6

Mai Nasaret, Iesu i parivirevirei

¹ Iesu ana tauvotaġotaġo maiteni nai dobuna i netawanei ma i naeme ana au melagai.

² Ma Sabat marana i ġeta ma tauna giu i vikarei au pari numana. Ma rava maġamaġau i riei da i rautaniġanei. Tau i anatapui i baiei ma i vitara-viravira vivira i pa, “Wei tauna nuaulaula ma aramanana mepa i vaia?” Ma, “Kaua aiwaiei e kaukauei?”

³ Anina ma tau i ava i babani vivira i pa, “Tauna tauvoa. Mary ana natuevou ma varevarena James, Joses, Judas ma Simon ma novunovui weka e mamae tauna bo?” Ma lamna aubaina mai Nasaret, Iesu i parivirevirei.

⁴ Iesu, tau i riwei i pa, “*Peroveta* dobu au ġelau e vivivirei, wate ana au melagai, ana rava ma ana dam oina, eġa ita vivivirei.”

⁵⁻⁶ Tauna i baiei da rava eġa tauna ita vitumaġanei. Ma eġa tagotagogina da kaua vivirewapanai kampa ita kau ei. Tauna urana, rava ruaġa ota doridoriai au tepai i terei ma i vilawani. Ma muriai, melagai nununai au ġereġerei i viararamana nae.

Iesu ana Apasol i paritawanei da ita viararamana

⁷ Ma Iesu, tau i 12 i ġoreiai ma ruaruagei ava i paritawanana-opunei ma rewapana i verei da arua-apoapoei ina viaġaġana-opunei.

8 Ma riwa bagibaginei i riwei i pa, “Ami au vaḡai, eḡa aiwai ona vaia anina jiḡona ava; eḡa lam, eḡa autu bo mane au urami.

9 Ae uma ona oteni ma eḡa kwama ḡelauna ona vaia.”

10 Ma i riwei i pa, “Metauna melagaina o ruiḡiana ma i vianinemi. Numa tagoginina au orana ona mae da melagaina ona oputawanei.

11 *Mepa da au melagai o ḡeta ma rava eḡa ita vianinemi bo eḡa ita rautaniḡanemi. Nai melagaina ona oputawanei ma aemi pokauna ona rauabuabui da ina aramanei da tau i ai wavu!”*

12 Ma tau i opu ma rava awari i raugugula ma i riwei i pa, “Taumi ami ḡo’apoapoei ona voterei ma ona mae-taviremi God awarina!”

13 Tau i, arua-apoapoei i viaḡaḡana-opunei. Ma rava doridoriai maḡamaḡau, olive oirana au kolai i buloi ma i vilawani.

John Taubabataito ana iraḡe

14-16 *Iesu nolana i nae da rava anatapui i aramanei ma tauna i babaniei. Ma rava ḡelau i ririwa i pa, “Tauna, kaua vivirewapanai e kaukauei, aubaina tauna John Taubabataito iraḡelei i vomairi me.” Ḡelau i ririwa i pa, “Tauna Elijah i nememei.” Ma ḡelau i ririwa i pa, “Tauna peroveta wariḡai nanare.” Ma gulau Herod,† nolana i nonori ma i riwa i pa, “Tau, John Taubabataito uana a borituini; marina i vomairi me.”

17-20 John ana virarautua, lamna wenanare. Muriai da Iesu ana viararamana nolana ita vikarei. Herod, tuana Philip awana i kwalei ma i ravaḡi. Wavinena wavana Herodias. Au murina John, Herod i riwana giriḡiriei i pa, “Tarawatu e mamae da eḡa vareim awana ma kwalei.” Ma Herod, riwa i paritawanei da John i pani da panipani au numana i terei. Herod ana nuaiaina, John i rarautaniḡanei. Wate nuanuana i raḡaraḡa.

Ma Herodias, John awarina amlona i ḡaiḡai ma virāḡenana i ḡoei. Herod i aramanei da John, lamna rava jijimanina ma vivivireina ma i gagaloei. Herod, John i rovoei ma lamna aubaina wavinena eḡa tagotagogina da aiwai ita kauēi.

21 Ma wavine, gavogavo i ’nanai, maranai Herod ana tupua marana i ḡeta ma torela i vokaukauei. Ma gabemani babadai ḡaeḡaei ma sorodia ai babada ḡaeḡaei ma Galili babadai i raukwatuei.

22 Ma Herodias natuna wavinena i nei ma i ara. Herod ma tau i maiteni i amam i vinuaiaini. Ma gulau, gugui i riwei i pa, “Aiwai u ḡoeḡoeia ma vibaḡaiu ma ana verem!”

23 Ma i parivainuāḡani i pa, “God au matana a ririwem da aiwai u vivibaḡeiu ana verem da au vigulau navanavana au paratana.”

24 Ma tevera wavinena i opu ma alona i paridadanei i pa, “Aiwai ana vibaḡei?”

Ma i paribelei i pa, “John Taubabataito kolana.”

25 Ma maratagogi i vipaparana ma gulau awarina i rui ma i vibaḡai i pa, “A ḡoeḡoei da marina John Taubabataito kolana ma vereu au aboma!”

* 6:11: Act 13:51 * 6:11: Wariḡa mai Jew, tauvaḡai e nenememei au Israel. Tau i au aei pokau e rarauabuabui maranai Israel ana au parata e ḡeḡeta, lamna tau i orai e viaiaini. Ma Iesu ana tauvotagotaḡo wei i kauēi da melagai ravai ina notai, “Tauvotagotaḡo e ririwa da tauta orata apoapoen me tauta eḡa mai Jew.” * 6:14-16: Mrk 8:28 † 6:14-16: Herod Antipas, Galili ana Wavalatona.

26 Ma gulau nuanuana i bola-kauei. Wate parivainuaḡana boibog̃i i kauei tau i amam au matai. Ma lamna aubaina guguni, aiwai i vivibaḡei anina i vianinei.

27 Ma tauviraḡena i paritawanei ma i riwei da John kolana ita neiai. Ma i nae panipani au numana ma John uana i borituini.

28 Ma kolana au aboma i terei ma guguni i verei ma guguni, alona i verei.

29 Ma John ana tauvotaḡotaḡo, nolana i nonori ma i nei ma taubeuna i vaia ma au kokoaga i vimataveni.

Iesu, nelara 5,000 i viambagibagi

(Matthew 14:13-21; Luke 9:10-17; John 6:1-14)

30 *Apasol* i ḡeta memei ma aiwai anataputapuna i kaukauei ma i raraugugulei, Iesu i vieḡei.

31 Lamna maranai, rava maḡamaḡau i nenei ma i nenei da Iesu ana tauvotaḡotaḡo maiteni eḡa gavogavo ita maemae da ita am. Lamna aubaina Iesu, tau i riwei i pa, “Taumi ava ona nei ma tana nae au mutulua da laumi ina tau mara aburuna.”

32 Ma anatapui wagei i nae au mutulua.

33 Wate rava maḡamaḡau i 'nanai i nenei ma i aramanei tau aiavo. Ma melagai nununai anatapui geraei i ruba gogona da au dobuna i aiḡeta.

34 Maranai Iesu wagei i tuopu au gera ma patara ḡaeḡaena i 'nanai ma nuanuana i bola-kauei. Tau i me sipu ma eḡa ai tauvipaipai. Ma Riwana Aiaina viararamanai i raukarei.

35 Ma au biga e tuturiai ma ana tauvotaḡotaḡo i nei awarina ma i riwei i pa, “Wei mutulua ma madeḡa e arearere.

36 Rava ma paritawanei da ina nae au melagai ma au wapu au ḡereḡere da ai lam ina gimarai.”

37 Wate Iesu i paribelei i pa, “Taumi ona viambagibagi!” Ma tau i paribelei i pa, “Mepa 200 *denarii** tana vaia da wei patarana tana viambagibagi?”

38 Ma Iesu i paridadanei i pa, “Palawa biaḡa awarimi? Ona nae ma ona baiei!”

Maranai i nelaḡai ma i riwa i pa, “Awariai, palawa five ma iana ruaḡa.”

39 Anina ma Iesu, patara i riwei i pa, “Boru nununai, gidagida au majimajiḡai ona kiala nae.”

40 Ma tau i ai au boru 50 da 100 nanare i kiala nae.

41 Ma Iesu, palawa five ma iana ruaḡa i vaia ma i ḡoutata au mara ma God i vieḡalauaei. Ma palawa i vogimagimai ma iana i ḡutai da ana tauvotaḡotaḡo i verei ma tau, rava i verei.

42 Ma patara i am ma i am-iaua.

43 Ma ana tauvotaḡotaḡo, lam am tereterenai i tuarui da poa muomuoi 12 i vioai.

44 Nelara 5,000 i viambagibagi.

Iesu, waira au tepana i babara

(Matthew 14:22-33; John 6:15-21)

45 Anina ma Iesu, ana tauvotaḡotaḡo i egari da ita aidamana au Bethsaida.[§] Tau i waga i geru da i nenei ma tauna, patara i paritawanei.

46 Patara i paritawanei ma tauna ava i ḡae au ola da ita raupari.

47 Ma waguvara ana tauvotaḡotaḡo au waga au topa ma Iesu au alala.

† 6:37: 200 denarii. Denarius tagogi lamna taubagibagi ai maia au pom tagogo nolana aubaina.

§ 6:45: Eng. *Bethsaida*.

48 Ma ana tauvotaġotaġo, lare i vovoguratei da ita ġota wate ive i viraumatamatani. Ma maratomtomo nanare, Iesu i nae awari. Tauna waira au tepana i bababara ma i ġoei da tau i ita tutelarei.

49-50 Ma maranai tau, Iesu i 'nanai topa au tepana i bababara ma i notai da tauna konaġa ma i rovo kaukua ma i vigaragararei. Ma maratagogi Iesu i riwa i pa, "Tepami ina tora! Tau, eġa ona rovo!"

51 Ma au waga i geru ma ive i wanatuini ma tau i bana-kauei.

52 Avena da kaua palawa awarina i kauei i 'nanai, wate ana rewapana eġa ita aramana-kauei. Tau i orai i bado ma i vinuanaina.

*Iesu, rava doridoriai maġamaġau i Genesaret i vilawani
(Matthew 14:34-36)*

53 Tau, topa i damani ma au Genesaret i ġota ma ai waga i raġini.

54 Tau, waga i oputawanei ma rava, Iesu i 'nanai ma maratagogi i aramane i da tauna.

55 Iesu nolana, Galili provins anapui i naeni ma i nonori da tauna mepa i mamae. Ma kampa, doridoriai rasirasiei i vivaneiai.

56 Iesu mepa i nenelana, melagai ġaeġaei ma muomuoi ma wapu mepa rava e mamae lana. Ma rava, ai rava doridoriai nai au melagaina i neiai au deba. Ma i vibaġa, da doridoriai, Iesu ana gara adana ava ita vodadani. Ma aiavoi Iesu ana gara i vodadani i lawana.

7

*Amamami ai giu
(Matthew 15:1-9)*

1-4 Pharisi ma Jew anapui, magumagura ai giu maġamaġau e notanota-jjini. Tau, ai aniuma ma ai aniam anapui e oġaoġai lamnei tau i viaiaina-melei God au matana. Ma maranai au maket da e nenei, urai ina oġai ma ina am. Tau eġa ina am da au naona urai ina oġa kauei me ai magumagura ai giu nanare.

Maratagogi Pharisi ġelau i ma Tarawatu Babadai, Jerusalem ei i nei Iesu awarina da ita rautaniġane i. Ma tau i 'nanai da Iesu ana tauvotaġotaġo ġelau, urai eġa ita oġai ma i amam.

5 Ma tau, Iesu i vitara-virevirei i pa, "Aiwai aubaina am Tauvotaġotaġo magumagura ai giu, eġa ita votaġotaġoi ma ana ura miramirai e amam?"

6 Ma Iesu i paribelei i pa, "Taumi morumorum i ma o vikaua-aiaina-melemi. God ana peroveta Isaiah i riwa kaua maranai i riwa, i pa:

'Wei ravai ipiriei e vovoepeapiu,
wate nuanuai aueia.

7 Tau i rava ai giu e viviararamani.

Lamna aubaina ai voepepea anona eġa.' (Isaiah 29:13)

8 Taumi, God ana Tarawatu o teretere-tawane i ma ami giu o votaġotaġoi."

9 Ma i riwana-melei i pa, "Taumi o aramana kaua da God ana Tarawatu o gedugeduaie i ma amamami ai giu o vovotaġotaġoi.

10 *God ana Tarawatu, Moses i girugirumia nanare: *Amam ma alom ma vivirei ma Aiai amana ma alona e enaena-boai, tauna ona viragēni.*

11 Wate taumi o viararamana da aiai awarina mane bo purapura, amana bo alona ita voagui ma ita riwei, 'Awariu e mamae da ata voaguim; wate lamna *Corban* - a tereriei pulo, God aubaina.'

12 Wei viararamanana, tau i viviġaei da amana ma alona ina voagui.

13 Ma wei taunei viararamana, rava awari o vividamani; ma God riwana o vivikwakwavi. Ma kaua maḡamaḡau i ḡelau i maiteni o kaukauei.”

Metauna kauai, rava orai e vivimirai.

(Matthew 15:10-20)

14 Iesu, patara i kwatuana-melei ma i riwei i pa, “Anatapumi ona rautaniḡaneu ma aiwai a ririwemi ona aramanei.

15-16 Aiwai au tanoei au orami e ruirui, lamna eḡa ita vivimiraimi ma aiwai da oramiei e opuopu, lamna e vivimiraimi God au matana.”*

17 Anina Iesu, patara i voterei ma i rui au numa. Ma ana tauvotaḡotaḡo, i vitara-virevirei da wei awanainana anona aiwai.

18-19 Iesu i paribelei i pa, “Taumi maiteni eḡa ota aramanei bo? Kaua aiwai au tano, rava au orai e ruirui amapo eḡa ina vimirai. Anona lamna wei kauai, eḡa ita ruirui rava au nuapouna, wate au manawana da e opuopu.” (Wei riwanei Iesu, lam anatapui i viaiaini).

20 Anina ma i riwa i pa, “Aiwai, rava oranei e opuopu; lamna, rava e vivimirai God au matana.

21 Anina rava nuanuanei vinuanotanota apoapoei e opuopu me: vi-awawana labalababa, danene, viragena, awadanene,

22 ambo, rau-iviapoapoe, moru, erawa, unura, terevaideḡa, mae-ḡaeḡae ma opa.

23 Wei kauai apoapoei anatapui oranei e opuopu ma rava e vimiramirai.”

Jentail wavine,† Iesu i vitumaḡanei

(Matthew 15:21-28)

24 Ma dobuna i voterei ma i nae Taia ana au parata. Ma i rui govaḡa au numa ma eḡa ita ḡoei da rava ita aramanei da tauna kampa, wate eḡa tagotagogina da ita raugovaḡa.

25-26 Wavine tagogi, Iesu nolana i nonori ma i nei awarina. Tauna eḡa Jew ma Jentail au Phonisia i tupua, Siria ana au parata. Arua-apoapoena, tauna natuna wavinena aburuna i ruini; ma alona i nae Iesu au naona i mae-peu ma ma i vibaḡai da arua-apoapoena ita viopuni.

27 Iesu i aramanei da tauna Jentail; lamna aubaina i riwei i pa, “Eḡa ita ai da roaroa ai lam ata vaia da auou ata verei da au naona roaroa ina am-iaua.”‡

28 Ma wavine i paribelei i pa, “Bada, aiwai u riwei; lamna riwa kaua. Wate auou, roaroa ai lam momoḡina, kepakepa au gabaurina e rauraua e aniani.”

29 Ma Iesu wei i riwei i pa, “U paribelana kaua, aubaina ma nae au numa. Arua-apoapoena natum i opu-tawanei.”

30 Ma wavine i naeme au numa. Natuna wavinena i 'nanai i matamatave, arua-apoapoena boiboḡi tevera i opu-tawanei.

Iesu, oroto taniḡa-potapotana ma mena birebirena i vilawani

31 Iesu Taia ma Sidon ana parata i netawanei ma au babaḡela Dekapolis i verautuini ma i nae au Galili topana.

32 Orotu taniḡana potapotana ma menana birebirena i neiai Iesu awarina ma i vibaḡai da urana au inina ita terei da ita vilawani.

* 7:15-16: Giruma ḡelau Mark uranei i girugirumia wei riwai wenanare e mamae, “Mepa da taniḡami e mamae, ona rautaniḡana.” † 7:23: Rava eḡa mai Jew. ‡ 7:27: Riwa roaroa wei au awanaina lamna mai Jew. Taui e notanotai da taui i ai guratana eḡa me rava ḡelau. Lamna aubaina taui dobu ḡelau ravai e ḡoreḡorei auou.

³³ Iesu, oroto i taravaina-opunei da tau i ava ma ura-gigina, oroto au taniġana i terei ma ura-gigina ġelauna i ovai ma menana i vodadani.

³⁴ Nuanuana i bolai ma i ġoutata au mara; i lavutu tawanana ma oroto i riwei i pa, “*Ephatha!*” Wei anona, “Ma wanatawanei!”

³⁵ Maratagogi taniġana i wanatawanei ma menana i vidagudagu ma i babani kaua.

³⁶ Ma Iesu, tau i viġaei da aiwai i tuputupua, avena rava ita vieġei. Iesu, rava i viġaei; wate tau i eġa ita rautaniġana ma riwa i vituai.

³⁷ Ma maranai ravai wei i nonori, tau i bana-kauei ma i riwa i pa, “Aiwai anatapui i kauana-kauei. Tauna, rava taniġa potapotai e vivilawani da e rautaniġana ma menabirebirei e bababani.”

8

*Iesu, rava 4,000 i viambagibagi
(Matthew 15:32-39)*

¹ Nai maranai, patara ġaeġaena i riana-melei. Patara eġa ai lam. Ma Iesu, ana tauvotaġotaġo i kwatuei da i nei ma i riwei i pa,

² “Au pom tonuġa patara maiteni a mae ma ai lam eġa ma a rau-nuapoapoelei.

³ Tau i ġelaui, uamei i nei. Mepa da ana am-iraġe ana paritawanei ai au numa, ma au etanai ina raumolaġau.”

⁴ Ma ana tauvotaġotaġo i paribelei i pa, “Wei mutulua ma mepa lam tana vaia da wei patarana tana viambagibagi?”

⁵ Ma Iesu, tau i paridadanei i pa, “Awarimi palawa biaġa?”

Tau i riwa i pa, “seven.”

⁶ Ma Iesu, patara i riwei da au doa i kiala. Ma palawa seven i vaia ma God i viegualauei ma i vogimagimai ma ana tauvotaġotaġo i verei da patara i verei.

⁷ Ma tau i awari, iana muomuoi ruaġa ota. Iesu i vaia; God i viegualauei ma ana tauvotaġotaġo i verei da patara i verei.

⁸ Tau i anatapui i am da i am-iaua. Ma lam am tereterenai i tuarui da poa ġaeġaei seven i vioai.

⁹ Rava 4,000 i viambagibagi. Ma muriai i paritawanei ai au numa.

*Pharisi, God ana mataira i vibaei
(Matthew 15:39-16:4)*

¹⁰ Maratagogi, Iesu ana tauvotaġotaġo maiteni au waga i geru ma i nae Damanuta ana au parata.

¹¹ Pharisi ġelaui i nei ma viparipariġai i vikarei Iesu maiteni. Tau i ġoei da Iesu ita raudadani da mataira Godei ita viatataiei.

¹² Iesu, Aruane i lavutu tawanana ma i riwa i pa, “Wei kimta voui, aiwai aubaina mataira e ġoeġoei? A ririwana-kauemi, amapo mataira eġa ona inanai.”

Iesu, ana tauvotaġotaġo I parivainotai

¹³ Anina ma Iesu, patara i netawanei ma ana tauvotaġotaġo maiteni au waga i geru me ma i damana Topa Galili au baba ġelauna.

¹⁴ Ma ana tauvotaġotaġo, nuanuai i vuru da ai palawa ita vaia ma palawa tagogi ava au waga i mammae.

15 Iesu, tau i parivainotai i pa, “Pharisi ma Herod ai giu ma ai viararamana morumoruna ona inana-kauei! Lamna me *yist*.^{*}”

16 Ma tau i babani vivira i pa, “Tauta eġa ata palawa aubaina da e ririweta.”

17 Ma Iesu i aramanei ma tau i riwei, “Aiwai aubaina o bababani da taumi awarimi eġa palawa? Taumi amapo da eġa ota aramana ma o vivinuanaina? Orami i bado bo?”

18 [✠]Matami e mamae ma eġa ota inainana. Ma taniġami e mamae ma eġa ota nonora. Ma o vinuanotanota bo eġa?

19 Maranai palawa five a vogimagimai rava 5,000 aubaii, lam am tereter-enai o tami da poa biaġa o vioai?”

Tau i paribelei, “Twelve.”

20 “Ma maranai palawa seven a vogimagimai rava 4,000 aubaii, lam am tereterenai o tami da poa ġaeġaei biaġa o vioai?”

Tau i paribelei, “Seven.”

21 Ma tau i riwei i pa, “Ma amapo da o vivinuanainal!”

Iesu, oroto mata apoapoena i vilawani au Bethsaida

22 Tau i nei au Bethsaida ma rava ġelau, oroto matana apoapoena i neiai Iesu awarina ma i vibaġa-guratei da ita vodadani.

23 Ma Iesu, oroto matana apoapoena i raunimavoai ma melagaiei i taravaina-opunei. Ma kampa matana i ovai ma urana au matana i terei ma i paridadanei, “Aiwai e inainanai bo eġa?”

24 Ma i taepai ma i riwa, “Rava a inainanai ma tau i me ai ita bababara.”

25 Iesu, urana i tere-melei oroto au matana. Ma matana i wanatawanei da aiwai anatapuna i ‘nana-kauei.

26 Iesu, tauna i paritawanei ana au numa ma i riwei, “Eġa ma nae au melagai! Wate jijimanina ma nae au numa.”

Peter i riwa da Iesu, tauna Keriso

(Matthew 16:13-16; Luke 9:18-20)

27 Iesu, ana tauvotaġotaġo maiteni i nae melagaii Caesarea Philipai au ġereġerei. Maranai i nena ma Iesu, tau i paridadanei, “Rava e ririwa; tau ai ai?”

28 [✠]Ma tau i paribelei, “Ġelau i ririwa da tam, John Taubabataito. Ma ġelau Elijah. Ma ġelau i ririwa da peroveta wariagana tagogi.”

29 Ma Iesu, tau i paridadanei, “Wate taumi, mena o notanota-nei? O ririwa da tau ai ai?”

Peter i paribelei, “Tam God ana *Messiah* - anona Keriso.”

30 Iesu, tau i viġaei da eġa ai ai ina riwei da tauna ai ai.

Iesu ana iraġe ma ana vomairi me i babaniei

(Matthew 16:21-23; Luke 9:21)

31 Ma Iesu i raukarei da ana tauvotaġotaġo i giuni i pa, “Rava Natuna ina vinuapoapoe kaua. Ma dogadogara, pirisi babadai ma tarawatu babadai, tauna ina pari-geduaiei ma ina viraġeni. Ma au pom tonuġa au murina ina vomairi me.”

32 Iesu jijimaninei wei kauai i bababaniei ma lamna aubaina Peter, tauna i taravaini au ririva ma enana i vikarei.

^{*} 8:15: Yist mai Jew awarii awanaini lamna aiwai da apoapoe, mira bova e vivitua bo e vivimaġai. Weka Iesu mai Pharisee ma mai Herod ai lawana ma ai giu morumoru i babaniei, da eġa ina tua.

✠ 8:18: Mrk 4:12 ✠ 8:28: Mrk 6:14-15

³³ Wate Iesu i mae-tavirei ma ana tauvotaḡotaḡo i 'nanai. Ma Peter i eni, i pa, "Satan ma nae au muriu! Tam am nota eḡa Godei ita nenei, eḡa da ravei."

Iesu votaḡotaḡona anona

(*Matthew 16:24-28; Luke 9:23-27*)

³⁴ Ma Iesu, patara ma ana tauvotaḡotaḡo i raukwatuei ma i riwei, "Mepa da aiai ita votaḡotaḡoiu. Tauna ina bovia-na-melei ma ana korosi ina avarai ma ina votaḡotaḡoiu.[†]

³⁵ Aiai ana lawana e tatajjini, ina vine-boai. Ma aiai da ana lawana i verenei; Tau ma Riwana Aiaina aubaina. Tauna ana lawana ina vaimelai.

³⁶ Ana aii bo anona aiwai, mepa da wei dobuna lawanana ma vigulauna ma vaipai ma am lawana maemae-nonoana ma vine-boai.

³⁷ Wate aiwai am lawana ma gimara-melei.

³⁸ Mepa da aiai: tau ma au viararamana ina vinimalei; ma i mae-puputeu; ma ana ḡoanei kaua apoapoe ina kaukauei. Rava Natuna, tauna ina vinimalei maranaina ina nememei; Amana ana au boruma anela vi-vivirei maiteni."

9

¹ Ma Iesu, wenanare i riwei, "Taumi a ririwana-kauemi; rava ḡelaumi weka o maimairi amapo eḡa ona iraḡe da God ana vigulau ona inanai ana rewapanana ina nei."

Iesu inanana i virai

(*Matthew 17:1-13; Luke 9:28-36*)

² Au pom six muriai, Iesu, Peter, James ma John i taravaini. Ma tau i ava i ḡae ola ḡaeḡaena au tepana. Ma kampa tau i matai, Iesu inanana i virai.

³ Ana gara i arapora ma gamrina i vimata-kamokamota; eḡa me aiwai ḡelauna au dobu nanare.

⁴ Ma kampa au matai, Elijah ma Moses i eḡa. Ma Iesu maiteni i bababani.

⁵ Ma Peter Iesu i riwei, "Tauviararamana, i aii da tauta weka. Ma vianinelai da numakweta tonuḡa ana voai: tagogi tam aubaim, ḡelauna Moses ma ḡelauna Elijah aubaina!"

⁶ Ma tau i rovo kaua ma Peter eḡa ita aramanei da aiwai i latolaton.

⁷ ☆ Anina ma apau i eḡa ma tau i purui. Ma pona apauei i opu ma i riwa i pa, "Wei Tau Natu au nuavainana, ona rautaniḡaneil!"

⁸ Maratagogi tau i 'nana viravira ma eḡa aiai ḡelauna ita inanai ma Iesu, tauna ava.

⁹ Ma maranai olei i ḡaiḡairai ma Iesu, tau i viḡaei da aiwai i 'nananaia eḡa ina vieḡai da au naona Rava Natuna iraḡelei ina vomairi me.

¹⁰ Ma tau, wei riwana i voteletelei ma i babani vivira i pa, "Iraḡelei vomairi me anona aiwai?"

¹¹ Ma tau, i vitara-virevirei i pa, "Aiwai aubaina, tarawatu babadai e ririwa da Elijah au naona ina nei?"*

[†] **8:34:** Wei lamna awanaina. Anona lamna Iesu ana tauvotaḡotaḡo anina vinimala ma apoapoei ina nelaḡai aubaina tau, tauna i votaḡotaḡoi. Tauna eḡa ita ririwa da ana tauvotaḡotaḡo au korosi ina iraḡe me tauna. ☆ **9:7:** Mrk 1:11 * **9:11:** Mai Jew i vitumaḡana da Elijah au naona ina nememei ma Keriso muriai ita nei. (Mal 3:1, 4:5-6). Ma tau eḡa ita notai da Elijah rau-iviapoapoe ina nelaḡai ana au nememei.

12 Iesu i paribelei, “Riwa kaua Elijah au naona ina nei da aiwai anat-apuna ina vokaukauei. Aubaina wariāga i girumi da Rava Natuna ina vinuapoapoe kaua ma ina inana-geduaiei.

13 Wate a ririwana-kauemi da Elijah anina i nei ma rava, ai gōanei tauna i rau-iviapoapoelei me i girugirumia nanare.”†

*Iesu, arua-apoapoena tevera orotona awarina i viopuni
(Matthew 17:14-21; Luke 9:37-43a)*

14 Iesu ana tauvotaḡotaḡo tonuḡa maiteni olei i ḡaira memei ai rava awari ma patara ḡaeḡaena, tau i gariḡuruvi. Ma Jew ai tarawatu babadai, tau maiteni i vitarapiri.

15 Maranai patara, Iesu i 'nanai. Tau orai i auepai ma awarina i ruba ma i viegualaei.

16 Iesu, tau i vitara-virevirei, “Aiwai o vitarapiriei?”

17 Orototagogi patara au poui i paribelana, “Tauviararamana, arua-apoapoena natu orotona au orana e mamae ma i kauai da eḡa ita bababani, lamna aubaina a neiai awarim.

18 Maranai ana doria e ururu-melei, lamna arua-apoapoena: tauna au doa e tawatawanei; gamona e vivipuropuro; ivona e utauta ḡiriḡiriei; ma inina e badobado. Am tauvotaḡotaḡo a vibaḡai da arua-apoapoena ita viopuni, wate eḡa tagotagogina da ita kauai.”

19 Ma Iesu i paribelei, “Oo mara aiwai ona vitumaḡana! Ta mae ḡaḡa ma ami vita ana 'vara ḡaḡalei? Tevera awariu ona neiai!”

20 Ma tevera i neiai Iesu awarina. Ma maranai arua-apoapoena, Iesu i 'nanai, maratagogi tevera i viaikwajiana-guratei da au doa i tonei ma i vitatauvira ma i vivipuropuro.

21 Iesu, tevera amana i vitara-virevirei, “Wei teverana ana doria mara aiwai i vikarei?”

I paribelei i pa, “Maranai aburunai.

22 Arua-apoapoena mara au anatapuna, tauna ai au araratana ma au waira e tawatawanei ma i ḡoei da ita viraḡeni. Mepa da tam tagotagogina; ma raunu'apoapoelelai ma ma voaguiai!”

23 Iesu, tauna i riwei, “Menanare da u riwa, 'Mepa da tam tagotagogina?' Aiai ravana e vivitumaḡana, God anatapuna ina kauai tauna aubaina.”

24 Maratagogi tevera amana i garara, “A vitumaḡana, wate au tumagaḡana eḡa ita rata ma ma voaguii da ina rata!”

25 Iesu i nana da patara i rierieiai awarii ma lamna aubaina arua-apoapoena i egari i pa, “Tam arua taniga-potapotana ma gumgum. Tau a egaḡarim da tevera ma opu-tawanei. Ma eḡa melanai au orana ma rui me!”

26 Ma arua i garara ma tevera i viaikwajiana-guratei ma i opu-tawanei. Ma tevera inanana me taubeu. Ma rava maḡamaḡau kampa i riwa, “Tauna i'raḡe!”

27 Ma Iesu, tauna urana i vojijini ma i sinaepai da i mairi.

28 Muriai Iesu, ana tauvotaḡotaḡo maiteni i rui au numa. Ma maranai taui ava ma i paridadanei i pa, “Aiwai aubaina tauai eḡa tagotagogina da arua-apoapoena ata viopuni?”

29 Iesu, i riwa, “Arua-apoapoei me wenanare, pari ainelana ina viopuni.”

† 9:13: Iesu lamna John Taubabataito i bababaniei da tauna Elijah (Mat 11:13-14, 17:10-13)

Iesu ana iraḡe i babaniana-melei
(Matthew 17:22-23; Luke 9:43b-45)

³⁰ Iesu, ana tauvotaḡotaḡo maiteni dobuna i netawanei ma Galili i verautuini. Iesu eḡa ita ḡoei da rava ita aramanei da tau i mepa.

³¹ Aubaina tauna, ana tauvotaḡotaḡo i viararamani i pa, “Tau i Rava Natuna ina amverenei rava ḡelau i urai. Ma tau i ina virageni. Wate au pom tonuḡa au murina ina vomairi me.”

³² Wate tau i eḡa ita aramanei tauna aiwai i bababaniei. Ma pari-dadanana i rovoei.

Tauvotaḡotaḡo i vitarapiri vivira da aiai i ḡetelara
(Matthew 18:1-5; Luke 9:46-48)

³³ Iesu ana tauvotaḡotaḡo maiteni i ḡeta au Capeniam ma au numa i rui. Ma Iesu, tau i vitara-virevirei, “Au etanai aiwai o vitarapiriei?”

³⁴ Wate tau i genuana, aubaina au etanai tau i vitarapiri vivira da aiai i ḡetelara.

³⁵ *Iesu i kiala ma Apasol 12 i raukwatuei awarina ma i riwei i pa, “Aiai e ḡoeḡe da ina vibada. Tauna ina tereḡairana-melei ma ina vimuri de-wadewa ma ina vitaunola rava aubai.”

³⁶ Ma Iesu, tevera i vaia ma au pou i vimairini. Ma urana au jiḡona i tere-taḡonei. Ma tau i riwei i pa,

³⁷ “Aiai ravana; tau wavauei, tevera wenanare i rauḡorei. Lamna tau maiteni e raraḡoreiu. Ma aiai da tau e raraḡoreiu. Lamna tauparitawaneu maiteni e raraḡorei.”

Aiai eḡa ata ḡavia, lamna turata
(Luke 9:49-50)

³⁸ Anina ma John, Iesu i riwei, “Tauviararamana! Tauai, oroto tagogi a inanai; tam wavamei arua-apoapoena i viviopuni ma tauna eḡa turata. Lamna aubaina a viḡaei da eḡa ina kauana-melei.”

³⁹ Iesu i riwa, “Eḡa ona viḡaei! Eḡa aiai au wavau kaua babai ina kauai ma muriai ina parivai-apoapoeniu.

⁴⁰ Aiai ravana eḡa ata ḡavia; lamna turata.

⁴¹ Tau a ririwana-kauemi. Mepa da aiai ravana, waira i veremi tau au wavau; aubaina taumi au Tauvotaḡotaḡo. Tau i ai maia eḡa ina vine-boai.”

Rauelara babanina
(Matthew 18:6-9; Luke 17:1-2)

⁴² Aiai ravana i kauai da wei teverana ana tumaḡana Tau awariu i viapoapoeni da ḡo’apoapoe i kauai. Lamna i ai da ḡaima ḡaeḡaena ravana au uatabana ina duri ma au boga ina tawanei aubaina God, tauna ina kovoḡa-guratei. ⁴³⁻⁴⁴ Mepa da nimam i kauem da ḡo’apoapoe u kauai. Ma bori-tawanei! I aii da nimam tagogiava ma lawana mamae-nonoana ma vaia. Ma eḡa ma kauai da nimam ruaḡa aiaii ma ma nae ai au menamenana; mepa ai eḡa melanai ita bobo.†

⁴⁵⁻⁴⁶ Mepa da aem i kauem da ḡo’apoapoena u kauai. Ma bori-tawanei! I aii da sigesigem au lawana mamae-nonoana ma rui. Eḡa me aem ruaḡa aiaii ma ai au menamenana ina tawanem. §

✱ 9:35: Mrk 10:43-44 † 9:43-44: Wariaga nimaiei i giruma damanei tau i riwana tagogina me vs 48. § 9:45-46: Wariaga nimaiei i giruma damanei tau i riwana tagogina me vs 48.

47 Ma mepa da matam ina kauem da ǵo'apoapoena u kauēi. Ma vaitawane! I aii da matam tagogi ma God ana vigulau ma rui. Eǵa me matam ruaǵa ma ai au menamenana ina tawanem;

48 dobuna motamotana eǵa ita irairage ma ai eǵa ita bobo.

49 Au Tauvotaǵotaǵo anataputapui, ai araratane i na bogai.

50 “Nia i ai lam viaiainana aubaina. Ma mepa da i tomatoma, mena ma vidagianei. Nia au orami ina mae ma ona viturana vivira!”

10

Iesu, tavine vilamonana i babaniei

1 Ma Iesu, dobuna i netawane i ma i nae Judea ana paratana. Ma Waira Jordan i damani da au baba ǵelauna. Patara ǵaeǵaena i riana-melei. Ma Iesu i viararamana, me mara patapatana i kaukauei nanare.

2 Ma Pharisi ǵelaui i ǵoei da tauna ita waroi. Ma lamna aubaina i vitara-virevirei, “Tarawatu e mamae bo eǵa da rava, awana maiteni ita vilamonei?”

3 Ma Iesu i paribelei, “Moses ana Tarawatu aiwai e ririwei?”

4 Ma tau i riwa, “Moses ana Tarawatu e ririwa da oroto *vilamona pepana ina girumi ma awana ina verei. Ma tau i ina vilamonei.*”

5 Iesu i paribelei, “Taumi orami i bada. Au baina Moses wei Tarawatuna i terei.

6 ✧ Wate ona notai da au karena, maranai God rava i kauēi *ma tauna oroto ma wavine i kauēi.*

7 ✧ *Ma lamna aubaina oroto amana ma alona ina netawane i*

8 *ma awana maiteni ina vitagogi* da tau i eǵa ruaǵa me au naona ma tupua tagogi.

9 God aiwai i vitagogiei, eǵa aiai ina vilamonei.”

10 Maranai tau i naeme au numa, ma tauvotaǵotaǵo, Iesu i vitara-virevirei wei kauai aubai.

11 Iesu i paribelei, “Mepa da oroto, awana i voterei. Ma wavine ǵelauna i ravaǵi. Lamna tauna, awana awarina i rauviapoapoe.

12 Ma nanarena mepa da wavine, awana i voterei ma oroto ǵelauna i ravaǵi. Lamna awana, awarina i rauviapoapoe.”

Iesu, roaroa i viaiaini

13 Rava ǵelaui, roaroa i nei i Iesu awarina da urana au tepai ita terei. Ma ana tauvotaǵotaǵo, ravai i viǵaei.

14 Maranai Iesu wei kauai i 'nanai. Ma ana tauvotaǵotaǵo i eni ma i riwa, “Roaroa ona voterei da awariu ina nei. Ma eǵa ona viǵaei. Au baina God ana vigulau, lamna rava wenanare aubai me wei roaroai.

15 A ririwana-kauemi. Aiai, God ana vigulau eǵa ina vaia me tevera aburuna nanare. Tauna, eǵa God ana au vigulau ina rui.”

16 Ma roaroa i taravaini ma i rapai, urana au tepai i terei, i raupari ma i viaiaini.

Purapura ravana

(Matthew 19:16-30; Luke 18:18-30)

17 Ma maranai Iesu i vomairi da i nene. Orotu i ruba ǵeta ma au naona i raudune ma i riwa i pa, “Taugiu vinualaulaunam. Aiwai ana kauēi da lawana maema-nonoana ana vibuderiei?”

18 Ma Iesu i paribelei i pa, “Aiwai aubaina, tau u vikaua vinualaulauneu? God, tauna ava vinualaulaunana.

19 ✱Tam, God ana Tarawatu u aramanei, *Eġa ma viragēna! Eġa ma awadanene! Eġa ma danene! Eġa ma viwavu-moru! Eġa ma amkwalakwala! Amam ma Alom ma vivirei!*"

20 Ma tauna i riwei, "Taugiu! Maranai tau aburueu da amadodo, wei tarawatui anatapui a voteletelei."

21 Iesu, tauna i 'nanai ma i vinuavainei ma i riwei, "Kaua tagogi e mamae eġa uta kaukauei. Ma nae ma am purapura anatapuna ma gimarei. Ma manena, rava molamolakai ma verei. Ma au mara God, tam ina vimaiei. Ma ma nei ma ma votaġotaġoiu!"

22 Ma maranai oroto wei riwana i nonori. Naona i peu ma ana nu-abolana i nae; aubaina tauna, purapura ravana.

23 Iesu i 'nana viravira ma ana tauvotaġotaġo awari i riwa, "I piripiri kaua da purapura ravana, God ana au vigulau ina rui."

24 Tauvotaġotaġo riwana i baie i maranai Iesu wenanare i babani. Ma Iesu i riwa me, "Natunatu! I piripiri kaua da purapura ravana,* God ana au vigulau ina rui.

25 I telatela kaua da ġamoġamo ġaeġaena wavana kamel, iġoma au gavo-gavona ina rui. Ma i piripiri guratana da purapura ravana, ana lawana God ina verei. Ma God, tauna ina vibadei."

26 Tai i vinuanaina ma ai nota i kwa. Ma taii ava i babani vivira i pa, "Mepa da nanare; amapo ai ai lawana mamae-nonoana ina vaia?"†

27 Iesu awarii i 'nana ma i riwei, "Rava awarii wei kauai i piripiri. Wate eġa God awarina. God awarina aiwai anatapuna i telatela kaua."

28 Ma Peter i riwei, "Ma tauai menanare? Tauai ai purapura a voterei ma tam a votaġoim."‡

29 Iesu i paribelana, "A ririwana-kauemi. Ai ai da ana numa bo vare-vareina bo novunovuna bo alona bo amana bo natunatuna bo ana wapu ina voterei ma tau ina votaġotaġoiu; tau ma Riwana Aiaina aubaina.

30 Tauna ana maia ina rata kaua wei au dobuna. Tauna ana maia ina viaitepatepani da ana numa, varevareina, novunovuna, alona, natunatuna ma ana wapu, anatapui ina maġa. Rava ina rau-iviapoapelem; aubaina tam, tau au Tauvotaġotaġo da mara au murina tauna lawana mamae-nonoana ina vaia.

31 Wate maġamaġai marina e vivinao; taii ina vimuri. Ma maġamaġai da e vivimuri; ina vinao."

Iesu ana iraġe babanina i vitonui

(Matthew 20:17-19; Luke 18:31-33)

32 Iesu, ana tauvotaġotaġo maiteni i ġeġae au Jerusalem. Iesu, taii au naoi i nena. Tauvotaġotaġo i baie. Ma rava ġelau i muri i nene i rovo kaua.§ Ma taii 12 i rauġorei au ririva ma i raukarei da kaua amapo da awarina ina tupua; taii i vieġei

✱ **10:19:** Exo 20:13; Exo 20:14; Exo 20:15; Exo 20:16; Exo 20:12 ✱ **10:24:** Wei riwana buka ġelau awarii e mamae ma ġelau eġa *purapura ravana*. † **10:26:** Mai Jew i notai da rava vipurapurai lamna BADA ana verena ana nuavaina matairana, taii e notai da BADA, rava vipurapurai eġa ina gagalo, tauna ravai ġelau maiteni eġa ina gagalo. ‡ **10:28:** Peter i ġoei da ita aramanei da tauvotaġotaġo ai au iraġe maiana aiwai, ina vaia. § **10:32:** *Iesu i ġeġae au Jerusalem* ma rava maġamaġai i viġaviei ma lamna aubaina ana tauvotaġotaġo i baie da tauna tepana i tora da weka i nena. Rava ġelau i votaġotaġo, taii i rovo kaua da aiwai awarina ina tupua maranai i ġeta au *Jerusalem*.

33 I pa, “Ona inana, tauta ta ġeġae au Jerusalem. Ma Rava Natuna ina verenei pirisi babadai; ma tarawatu babadai awarii. Ma tau i ana iraġe ina vianinei. Ma Mai Jentail ina verei.

34 Ma tauna ina vijiboġi ma ina ovai ma ina kwapui ma ina viraġeni. Au pom vitonuina ina vomairi me.”

James ma John ai vibaġa
(Matthew 20:20-28)

35 - Zebedi natunatuna James ma John i nei Iesu awarina ma i vibaġai i pa, “Tauviararamana! Tauai ai ġoana a vivibaġei uta kauai.”

36 Iesu i riwa i pa, “Aiwei o ġoeġoei ana kauai aubaimi?”

37 Tau i paribelana, “Ma verelai da ana kiala, tagogi au oiem ma ġelauna au kelakelaum am au vigulau.”

38 Iesu i paribelei, “Taumi eġa ota aramanei aiwai o vivibaġei! Iniviar kelakana ana umai. Taumi tagotagogina da ona umai bo? Tagotagogina ona babataito me tau ina babataitoiu?*

39 I paribelei, “Tauai tagotagogina!”

Iesu i riwei, “Iniviar kelakana anina ona umai ma ona iraġe me tau ana iraġe.

40 Wate tau au rewapana eġa ita mamae da ana veremi da mepa ona kiala au oieu bo au kelakelau. God, rava i vinevinei; tau i ai gabu i vokaukauai.”

41 Maranai Tauvotaġotaġo 10 ġelau, wei riwana i nonori. Tau James ma John awarii i ġaiawa.

42 Ma Iesu, tau i anatapui i ġorei da awarina ma i riwei, “O aramanei da jentail ai babada, dobu ġela ravai jentail awarii e mamae-ġaeġae ma e rarau-ivapoapoelei. Wate tau i ai babada ġaeġae, ai rewapana i ġetelera da ai rava e vibadebadei da ai ġoana e kaukauai.

43 ✨Wate au tauvotaġotaġo eġa nanare. Eġa da ai i ġoei da ina ġetelara taumi au pumi; tauna anina da ina vitaunola.

44 Ai i ġoei da ita vnao. Tauna ina vitaunola rava anatapui aubai.

45 Ma nanare Rava Natuna eġa ita nei da tauna, tana nolei. Wate ita vitaunola rava aubai. Ma ana lawana ita verenei da rava maġamaġau i ai lawana ita gimara-melei.”†

Iesu, rava mata-potapotana Batimeus i vilawani
(Luke 18:35-43)

46 Ma tau i ġeta au Jeriko. Iesu, ana tauvotaġotaġo, patara ġaeġaena maiteni dobuna i opuopu-tawanei. Ma oroto mata-potapotana, wavana Batimeias, Timaes natuna au etanai i kiakiala ma i vnamgigimana.

47 Maranai i nonori da tauna, Iesu Nasaretei; garara i raurei i pa, “Iesu, tam David natuna! Ma raunu’apoapoeleu!”‡

48 Rava maġamaġau, tauna i rai ma i riwei da ita genuana. Wate tauna, garara i voguratei, “David Natuna! Ma raunu’apoapoeleu!”

49 Iesu i tumairi ma i pa, “Ona ġoreiai!”

* **10:38:** ...babataito me tau ina babataitoiu tau i iniviar ma iraġe e bababaniei, maranai Iesu au Gethsemani i raraupari muriai da ana iraġe tauna ana nuabolana kelaka i babaniei (Mrk 14:36). Iesu, James ma John i riwei da nuabola ina nelaġai. ✨ **10:43:** Mrk 9:35 † **10:45:** Iesu i vinuapoapoe ma iraġe aubaita me Isaiah i girugirumia nanare au Isa 52:13-53:12. ‡ **10:47:** Maranai oroto mata-potapotana Iesu i kwatuei David natuna ma mai Jew i aramanei Keriso - BADA ana vinevine i babaniei. Mai Jew i aramanei da Keriso ai wavalatona me David wariaġa nanare. Ma i nei da rava doridoriai ita vilawani me. (Sal 89:3-37 Isa 29:18-19 & 35:5-6 Jer 23:5-6 Ezk 34:23-24)

Anina tau, mata-potapotana i ġoreiai i pa, “Tepam ina tora ma ma vomairi! E ġoreġorem!”

⁵⁰ Tauna, ana puru i tawanei ma i vomairi laġilaġina ma i nei Iesu awarina.

⁵¹ Iesu i paridadana i pa, “Aiwai u ġoei ana kauai aubaim?”

Mata-potapotana i paribelei, “Tauviararamana! A ġoei da ana inana me.”

⁵² Iesu i riwa, “Ma nae! Am tumaġana i vilawanim.” Maratagogi tauna i 'nana me ma Iesu au eta i votaġotaġoi.

11

Iesu i rui au Jerusalem

(Matthew 21:1-11; Luke 19:28-40; John 12:12-19)

¹ Ma maranai Jerusalem i tuġereġerei ma i rui au Betphagi ma Bethani* au ola *Olives*. Ma ana tauvotaġotaġo ruaġa i paritawanei,

² ma i riwei i pa, “Ona nae au melagai au naomi. Maranai o ruirui, kampa *donki* natuna ġaubo, raġiraġitana ona nelaġai. Tauna eġa aiai ita gerudadanei. Ona rupeni ma ona neiai.†

³ Mepa da aiai ina paridadana, ‘Aiwai aubaina wei o kaukauei?’ Ona riwei, ‘BADA e ġoeġoei ma maratagogi ina paritawana-melei.”

⁴ Ma i nae ma *donki* ġaubona au doa au metaeta raġiraġitana i rupeni.

⁵ Rava ġelau kampa i maimairi i paridadana i pa, “Aiwai o kaukauei *donki* ġaubona o ruperupeni?”

⁶ Ma i paribelei me Iesu i ririweia nanare ma tau i voterei da i nae.

⁷ Tau *donki* i neiai Iesu awarina ma ai puru au uporana i tawana-epai ma au tepana Iesu i kiala.

⁸ Ma rava maġamaġau, ai puru au eta i ebani ma ġelau, ai rugurugu i taratarai i ebani.

⁹ Tau i vivinao ma tau i muri i nenei i garara:

“Hosanna!”‡

“Viviaiaianana tauna BADA au wavana e nenei!”

¹⁰ “Viviaiaianana amata David ana vigulau e nenei!”

“Hosanna au aidamo telarana!”

¹¹ Iesu i ġeta au Jerusalem ma i rui au Tempol ma anatapuna i tuvirevirei ma au i biga aubaina, i opu me au Bethani, tau 12 maiteni.

Iesu, damala aina i parivai-irairaġeni

(Matthew 21:18-19)

¹² Ma marana i tom, tau Bethani i opu-tawanei ma Iesu am-iraġe.

¹³ Au weia ma damala aina i 'nanai ana ruguruguna. Ma i nae da ita inanai da i ua bo eġa. Maranai kampa i ġeta, eġa aiwai ita nelaġai. Anina ai ruguruguna ava, aubaina eġa damala ana mara.

¹⁴ Iesu, damala aina i riwei i pa, “Eġa aiai amadodo ma amapo anom ina am-melei!” Ma ana tauvotaġotaġo i nonori aiwai i latoni.

Iesu, taugimara tempolei i viaġaġana-opunei

(Matthew 21:12-17; Luke 19:45-48; John 2:13-22)

* **11:1:** Eng. *Bethphage & Bethani*. † **11:2:** Mai Jew awari, *donki* lamna nola aubaina ma eġa gulau ana anigeru. *Donki* i gerui lamna e ririweta da tauna gulau ana nuaubana ma vilamolamonana i nei. ‡ **11:9:** Lamna pona Aram anona ma vilawaniai ma muriai lamna viegualau ma vimae-ġaegaena aubaina.

15 Maranai tau i ġeta au Jerusalem, Iesu i rui Tempol garina au orana ma taugimara i viaġaġana-opunei, mane tauviraina^S ai kepakepa ma gabubu taugimareina ai anikiala i vitauvirai.

16 Ma i viġaei da eġa aiai ana gimara Tempol au orana ita avarai-naiei.

17 [✱]Ma rava i viararamani i pa, “I girugirumia nanare,

‘Au numa ina ġorei pari numana
dam anatapui au dobu aubaii.’

Wate taumi o vovirai da kwalakwalai ai guba.”^{*}

18 Pirisi Babadai ma tarawatu Babadai i nonori ma i ogei da ita viraġeni. Tau, Iesu i rovoei aubaina patara ana viararamana i baiei.

19 Ma au bigai Iesu ana rava, Jerusalem i opu-tawanei.

Damala aina i poi

(Matthew 21:20-22)

20 Ma ubaubanai tau i nenaie ma damala aina i ‘nanai anatapuna i poi.

21 Peter i notai ma i riwa “Tauviararamana ma inana! Damala aina u parivai-irairaġenia i poi.”

22 Iesu i paribelei, “God ona vitumaġanei!

23 A ririwana-kauemi. Rava wei olana ita riwei, ‘Ma vomairi ma au boga ma tawanem!’ Ma nuanuana eġa ina raġaraġa ma ina vitumaġana da aiwai e ririweia, ina tupua.

24 Lamna aubaina a ririwemi. Aiwai ami au pari o vibaġei, ona vitumaġana da taumi boiboġi o vaia ma ina viġarimiei.

25 Ma maranai e raraupari, au naona rava anatapui ai ġo’apoapoe awarim ma nota-tawanei. Ma nanare amam au mara am ġo’apoapoe ina nota-tawanei.”[†]

Jew babadai, Iesu ana vibadana i vitarapiriei

(Matthew 21:23-27; Luke 20:1-8)

27 Tau i nememei au Jerusalem ma Tempol au orana i bababara. Ma Pirisi Babadai, Tarawatu Babadai ma dogadogara i nei Iesu awarina.

28 Ma i paridadanei i pa, “Aiwai vibadanei wei kauai e kaukauei? Aiai vibadana i verem da wei kauai uta kauai?”

29 Iesu i paribelei i pa, “Au vitaraviravira tagogi ana terei ma ona paribeleu. Ma ana riwemi; aiwai vibadanei wei kauai a kaukauei.

30 Aiai, John taubabataito vibadana i verei da rava ita babataitoi, God bo rava? Ona riweu!”

31 Tau i vitarapiri vivira, “Mepa da tana riwa, ‘Godei.’ Tauna ina riwa, ‘Ma aiwai aubaina eġa ota vitumaġanei?’

32 Wate eġa tana riwa da, ‘Ravei.” Tau i rava i rovoei, aubaina rava anatapui, ai nota da John anina peroveta.

33 Ma i paribelei, “Tauai eġa ata aramanei.” Iesu i riwa, “Tau nanare eġa ana riwemi aiwai vibadanei wei kauai a kaukauei.”

^S 11:15: Mai Jew ai au nota da mai Rome ma mai Greek aruai mane au tepana i terei, wei mai Jew awari lamna god morumoruna. Mane tauviraina au Tempol mane dobu ġelau i virai da Tempol mane wei lamna Jew tarawatu i vianinei gimara au Tempol aubaina (Exo 30.13). [✱] 11:17: Isa

56:7 ^{*} 11:17: Iesu dobuġela manena tauviraina ma gimara ravai i viwavi da tau pari numana i vovirai da amkwalakwalai ai guba, tau i rava ai arua nolana e viviapoapoeni Jer 7:11-15. [†] 11:25:

Riwa wadubo nonoana uraiei i girugirumia vs 26 weka eġa ita mame, *Mepa da rava ai apoapoei eġa ma nota-tawanei, amam au mara nanare am apoapoei eġa ina nota-tawanei.*

12

Tauipi ai awanaina

(Matthew 21:33-46; Luke 20:9-19)

¹ *Iesu i vikarei ma awanainei awari i babani i pa, “Mara tagogi oroto, ana wapu i kauēi ma grape i paewi* ma i gari ma grape anigudana ma violağa numana i voai. Ma tauipi ġelaui i verei da ita nolei tauī anapui aubai. Ma i vaġai au dobu ġela.

² Tuaruta ana mara i ġetai ma taniwaga, ana taunola i paritawanei tauipi awarii da ana ġuta ita vaia.

³ Wate tauipi, tauna i vojijini ma i kwapui ma kwakwavina i paritawanei.

⁴ Ma taniwaga, taunola ġelauna i paritawanei. Ma tauī, kolana i viaibauni ma i vitepaubaubai.

⁵ Ma taunola ġelauna i paritawanei ma tauna i viraġeni ma i maġa ġelaui i paritawanei, ġelaui i kwapui ma ġelaui i viraġeni.

⁶ Ma tagogi ava e mamae da ina paritawanei. Lamna natuna orotona tagotago ana nuavainana. Ma tauna au murioina i paritawanei ma i pa, ‘Tauī, natu ina vivirei.’

⁷ Wate tauī, tauna i ‘nanai ma i riwa vivira i pa, ‘Wei taniwaga natuna. Ona nei, tana viraġeni ma ana buderi ina viġaritaiei!’

⁸ Ma i vunui ma i viraġeni ma tupuana wapuei i tawanana-opunei.

⁹ —Wapu taniwagana marina aiwai ina kauēi tauī awarii? Tauna ina nei ma tauipi ina viraġeni ma grape wapuna ina veredamane i tauipi ġelaui awari.

¹⁰ Wei ġirumana o iavi bo eġa?

‘Wei ġaimana, tauvoa i ġeduaiei,
wate muriai i nelaġai da tauna ġaima kaua.

¹¹ Wei lamna, BADA ana kaua
ma inanana i vinualaulauna.” *(Psalm 118:22-23)*

¹² Jew babadai i aramane i da awanaina lamna tauī i bababanie i ma i ġoei da ita pani. Wate tauī patara i rovoei, lamna aubaina Iesu i voterei ma i nae.

Caesar awarina tax tana terei bo eġa?

(Matthew 22:15-22; Luke 20:20-26)

¹³ Ma Pharisi ġelaui ma Herod ana rava ġelaui i nae Iesu awarina da riwei ita waroi.

¹⁴ Tauī i nei ma i riwa, “Tauviararamana, tauai aramane i da tam rava jijimanim. Ma rava wavai naenaei ma rava labalababa eġa uta vibainaenaei ma anapui e vaivaia da tagogi. Wate tam God ana babani riwa kauēi e viararamani. Ma riwelai tax tana terei Rome ġulauna wavana Caesar† awarina, i aii bo eġa?”

¹⁵ Wate Iesu, ai moru i ‘nana-bauni ma i riwei, “Aiwai aubaina o raudadani? Mani tagogi ona neiai da ana inanai!”

¹⁶ Denarius tagogi i neiai Iesu awarina ma tauī i vitara-virevirei, “Wei aiai aruana ma wavana?”

I paribelei, “Caesar.”

¹⁷ Iesu i riwa, “Aiwai Caesar ġarinei, Caesar ona verei. Ma aiwai God ġarinei, God ona verei!” Ma tauī i baiei.

* 12:1: Isa 5:1-2 * 12:1: Parivainota wadubona, God au anapuna Israel e bababanie me tauna ana grape wapuna, me Isa 5:1-2. † 12:14: Sisa.

Sadusi ġelau, Iesu i vitara-virevirei irairagelei vomairina aubaina
(Matthew 22:23-33; Luke 20:27-40)

18 ✨Mai Sadusi ai vitumaġana da rava eġa ita vovomairi-me maranai e irairage.‡ Anina ma ġelau i nei Iesu awarina ma i paridadanei,

19 “Tauviararamana! God ana tarawatu, Moses wenanare i girumi: Mepa da oroto i’raġe ma kaiababana i netawanei ma eġa natunatui. Orotu vareina kaiababana ina ravaġi ma roaroa ina ġuni vareina aubaina.

20 Mara tagogi varevarei seven i mae. Ma natuevou i tavine ma eġa natunatuna ma oroto i’raġe.

21 Vareina viruaina kaiababa i ravaġi ma tauna maiteni eġa natuna ma i’raġe. Ma nanare vareina vitonuina.

22 Ma nanare anatapui seven, wavinena i ravaġi ma eġa natunatui. Au muriai wavine i’raġe.

23 Anatapui seven, wavinena i ravaġi. Vomairi me au marana, lamna aiai awana?”

24 Iesu, tau i riwei, “Aiwai Moses i girumi ma God ana rewapana eġa ota aramanei.

25 Maranai tau iragelei ina vomairi, tau eġa ina tavine bo ina vitavine. Wate ina mae me anela au mara.

26 ✨Ma rava iragelei ai vomairi babanina, Moses ana tarawatu eġa ota iavi bo? Mepa ai i ararata lana, kampa God Moses i riwei: *Tau Abraham ana God ma Isaac ana God ma Jacob ana God.*

27 Tauna eġa rava irairagei ai God, wate rava lawalawai ai God. Taumi o moru kaua!§”

Tarawatu ġeġetelarana

(Matthew 22:34-40; Luke 10:25-28)

28 Ma tarawatu badana tagogi i nae ma ai vitarapiri i nonori. Ma i nonori da Iesu i babani kaua, lamna aubaina tauna i vitara-viravira, “God ana tarawatu metauna i ġetelara?”

29 ✨Iesu i paribelei, “Ġeġetelarana tagogi lamna wei: *Ona rautaniġana Israel! BADA ata God, tauna ava BADA.*

30 *BADA ami God nuanuami ina vaia orami anatapunei ma aruami anatapunei ma ami nota anatapunei ma ami rewapana anatapunei!*

31 ✨Ma viruaina lamna wei: *Rava ġelau nuanuam ina vaia me tam nuanuam e vaivai-melei! Wei tarawatui ruaġa i ġetelara, eġa me ġelau nanare.”*

32 Tarawatu badana i riwa, “Tauviararamana u babani kaua! Riwa kaua u babaniei, *BADA Tauna ava God ma eġa mepa ġelauna.*

33 *Ma nuanuami ina vaia orami anatapunei ma ami nota anatapunei ma ami rewapana anatapunei.* Ma, *Rava turam nuanuam ina vaia me tam nuanuam e vaivai-melei.* Wei tarawatui ruaġa lamna i ġetelara, eġa me pulo apuapunana bo pulo ġelau.”

34 Iesu i ’nanai da tauna i paribelana kaua ma i riwei, “Tam, God ana vigilau au ġereġerena e ġeġeta.” Ma eġa aiai tepana ita tora da Iesu ita vitara-viravirana-melei.

✨ 12:18: Act 23:8 ‡ 12:18: *Sadusi* tau gulagula ma rava ġaeġaei mai Jew ai giu babadai tau maiteni eġa ita vitumaġana da *anela* bo arua ġelau e mamae ma buka 5 i vinoa, Moses i girugirumia, tau lamna ava e vivitumaġanei (Karena, Exodus, Leviticus, Numbers, Deuteronomy). Ma eġa buka ġelau. Wate Moses ma BADA riwaiei tau i viatataiei da lawana e mamae irage au murina. ✨ 12:26:

Exo 3:6 § 12:27: *...wate rava lawalawai ai God.* Mepa da BADA i riwa da tauna Abraham ma Isaac ma Jacob ai God, tau lawalawai maranai BADA, Moses awarina i babani. ✨ 12:29: Deu 6:4-5 ✨ 12:31: Lev 19:18

Keriso tauna aiai?

(Matthew 22:41-46; Luke 20:41-44)

³⁵ Maranai Iesu au Tempol i viararamana ma i vitara-viravira i pa, “Aiwai aubaina Tarawatu Babadai e ririwa da Keriso tauna David natuna?

³⁶ ☆ Arua Vivivireina, David nota i verei ma tauna i riwa:

‘MAMAE-NONOANA au gulau i riwei,

Au oieu ma kiala

da am *g*avia

au ae karem da ma *tu*vaidoedoei.’

(Psalm 110:1)

³⁷ —David, tauoina wei gulauna i *g*orei *bada*. Ma menanare da badana lamna, David natuna?” Patara *g*ae*g*aena riwana i nonori ma i vinuai.

Iesu, Tarawatu Babadai ai kaua i babanie

(Matthew 23:1-36; Luke 20:45-47)

³⁸ Ma Iesu, tau i viararamani i pa, “Tarawatu babadai ona rovoei. Ai gara manamanai ma e bababara nae au deba da rava tau i e vivivirei.

³⁹ Tau i anikiala vinevinei pari au numana ma au torela, gabu aiaii e vaivaia.

⁴⁰ Tau i, kaikaiababa e morumoru ma ai numa e kwalekwalei, e morumoru ma e raraupari-vai-manamanawa. Tau i ai kovo*g*a ina apoapoe guratana.”

Kaiababa ana pulo

(Luke 21:1-4)

⁴¹ Ma Iesu, pulo aniterenana au baba *g*elauna i kiala ma rava i 'nananai mane i tereterei. Rava ma*g*ama*g*au i vivimanei, mane ma*g*ama*g*au i terei.

⁴² Wate kaiababa molamolakana i nei ma mane muomuoi rua*g*a i terei, ruvana i aburu kaua.

⁴³ Ana tauvota*g*ota*g*o i *g*orei ma i riwei, “Anina a ririwemi, wei kaiababa molamolakana i tere-guratei, e*g*a me tau i *g*elau.

⁴⁴ Tau i *g*elau i ai maurei i verena, wate wei kaiababa molaka ma *g*arinei anatapuna i terei, ana anilawana anatapuna.”

13

Iesu i riwa da rava God ana Tempol ina rikai

(Matthew 24:1-2; Luke 21:5-6)

¹ Iesu, Tempol i nene-tawanei ma ana tauvota*g*ota*g*o tagogi i riwa, “Tau-viararamana! Numa i vi*g*ulau *g*a*g*a ma numa *g*aimai i rata *g*a*g*a.”

² Iesu i paribelei, “Wei numai *g*ae*g*aei u inanai, e*g*a *g*aimai tagogi, turana au tepana ina mae. *G*aima anatapui ina rikai.”

*Rava ina vinuapoapoe kaua. Iesu ana tauvota*g*ota*g*o ina vipatutu*

(Matthew 24:3-14; Luke 21:7-19)

³ Iesu i kiakiala au ola *Olives*, Tempol au navanava*g*ela ma Peter, James, John ma Andrew i nei ma i vitaraviravirana gova*g*ei

⁴ i pa, “Ma riwelai mara aiwai wei kauai ina tupua? Ma aiwai ina vimataira da wei kauai anatapui ina tupua?”

⁵ Iesu, tau i riwei, “Ona inana kaua da e*g*a aiai ina terevaide*g*aimi!

⁶ Rava ma*g*ama*g*au, wavauei ina nei ma ina riwa, ‘Tau Keriso tauvi-lawana!’ Ma rava ma*g*ama*g*au ina terevaide*g*ai.

⁷ Ma maranai vi*g*avia ona nonori ma vi*g*avia aueia riwana ona nonori; e*g*a ona rovo! Wei kauai anina da ina tupua, wate wei e*g*a damona.

⁸ Dam, damai ina viġavia vivira ma dobu, dobuai ina viġavia vivira. Ma lolo ma gomara dobu au anatapuna. Wei kauai, lamna me wavine ana iniviara e vivikarei maranai e vivinatuna.

⁹ —Ona inana kaua! Taumi ina panimi ma ina etaremi ma pari numana au orana ina kwapuimi. Ma gavena ma gugulau au naoi ona mairi, aubaina taumi o votaġotaġoiu. Ma tau i awarii, Riwa Aiaina ona raugugulei.

¹⁰ Riwana Aiaina ona raugugulei rava anatapui awari ma muriai damona ina nei.

¹¹ Ma maranai i panimi ma i etaremi. Eġa ona vinuabola da aiwai ona latoni. Aiwai riwana God i veremi, lamna ona latoni. Aiwai o latoni lamna eġa taumi ota babani, wate Arua Vivivireina.

¹² Rava, vareina ina verenei da ina viraġeni. Ma ama, natunatuna ina verenei da ina viraġeni. Ma roaroa, amamai ma aloloi ina viġaviei da ina iraġe.

¹³ Rava anatapui ina geduaiemi tau aubaiu. Wate aiai da e maimairi-jijina da au damona, tauna ina lawana.”

*Iniviara ġaeġaena ana mara
(Matthew 24:15-28; Luke 21:20-24)*

¹⁴ “Maranai ‘Kaua apoapoe kaukauana’* e maimairi mepa avena ita mairi. (Buka tauivavana wei ina aramanei anona aiwai). Tau i aiavoi au Judea ina ruba laġilaġina au ola.

¹⁵ Aiai numa au tepana eġa ina ġaira bo ina rui au numa da aiwai ina vaia.

¹⁶ Aiai au wapu eġa ina naeme au numa da ana gara ina vaia.

¹⁷ Ma iniviara ġaeġaena, waivine duaduamai ma tau i da e viviġuġu awari nai au marana!

¹⁸ God awarina ona raupari da wei kauai eġa au bodu ina tupua.

¹⁹ ✱Ma nai au marana amapo iniviara ġaeġaena. Ma maranai God dobu i kauai, iniviara ġaeġaena eġa nanare ita tupua ma amapo eġa nanare ina tupua me.

²⁰ Wate BADA nai marana ina vitupoi. Mepa da eġa ina vitupoi, rava anatapui ina iraġe. Wate rava, tauna ana vinevine ina vilawani lamna aubaina mara ina vitupoi.

²¹⁻²² —Muriai keriso tauvilawana morumorui ma peroveta morumorui ina nei ma mataira ma kaua babai ina kauai ma ina kauana dadanei da God ana vinevine maiteni ita terevaideġai. Lamna aubaina mepa da aiai ina riwemi, ‘Ma inanai, Tauvilawana noi!’ bo ‘Tauna noi!’ Nai babanina eġa ona vitumaġaneil!

²³ Ona inana kaua; anatapuna a riwana-nonoemi!”

*Rava Natuna ana nei
(Matthew 24:29-31; Luke 21:25-28)*

²⁴ Iesu wenanare i riwa, “Ma iniviara ġaeġaena au murina.

Madeġa eġa ina rarana

ma nawaravi eġa ina lalai.

(Isaiah 13:10)

²⁵ Ma ubona marei ina peu

ma rewapana ġelaui au aidamo ina gui.

(Isaiah 34:4)

²⁶ ✱—Nai maranaina, Rava Natuna ana rewapanana ma ana borumana apauai ina nei.

* **13:14:** Eng. *Abomination of Desolation* Dan 9:27 11:31 & 12:11 ✱ **13:19:** Da 12:1 ✱ **13:26:** Da 7:13

²⁷ Ma Tauna, ana anela ina paritawanei dobu au anapapuna da rava tauna ana vinevine ina tuarui dobu au damona da dobu ġela au damona.”

Damala ana awanaina

(Matthew 24:32-35; Luke 21:29-33)

²⁸ “Damala aina ana awanaina ona aramanei. Maranai ai e numonumoi, lamna ona aramanei da maura e tuturiai.

²⁹ Ma nanare, maranai wei kauai anapapai ina tuputupua, ona aramanei da Rava Natuna i turiai; au metaeta i ġetai.

³⁰ Anina a ririwemi da wei kauai au naona ina tupua ma muriai da rava marina lawalawaii ina iraġe.

³¹ Mara ma dobu ina amoa. Wate riwau eġa ina amoa.”

Bada ainelana ana nei i aramanei

(Matthew 24:36-44)

³² “Ma eġa aiai ita aramanei nai marana bo madeġa aiwai ina nei. Anela au mara eġa ita aramanei ma Natuna eġa ita aramanei. Amana, tauna ava i aramanei.

³³ Ona vineneġana ma matami ina kala!† Eġa ota aramanei mara aiwai, wei kauai ina tupua.

³⁴ Wei me rava ana numa i netawanei ma i vaġai. Ma ana taunola nununai i terei da ita vipaipai ma tagotagogi ava ai nola i verei da ita kauai. Ma tauvineneġana i riwei da ita vineneġana.

³⁵ Ona vineneġana! Eġa ota aramanei mara aiwai, numa taniwagana e nenei; mepa da au bigai bo au nubautuva bo maratomtomi bo ubaubanai.

³⁶ Ma eġa matamatavemi ina nelaġaimi.

³⁷ Aiwai riwana a ririwemi, riwana tagogina rava anapapai a riwei, ona vineneġana!”

14

Jew ai babada, Iesu i oġei da ita viraġeni

(Matthew 26:1-5; Luke 22:1-2; John 11:45-53)

¹ †Au pom ruaġa muriai da Raġona ma Palawa Bagibagina torelai,* Pirisi babadai ma Tarawatu Babadai eta i baibaiei da menanare govogovaġanei Iesu ita vunui.

² Ma i riwa, “Au torela wei kauai eġa tana kauai, mepa da viġaiġaiawa ġaeġaena ina tupua.”

Wavine, daji ġabuġabuna Iesu au kolana i waġi

(Matthew 26:6-13; John 12:1-8)

³ Maranai Iesu au Bethani, Simon i ġoreġorei lepeleperana ana au numa i kiala ma i amam. Wavine, wagi wavana alabaster i voai ma i ġeta ma wagi uana i vogai ma daji ġabuġabuna, maiana ġaeġaena e ġoreġorei nard, Iesu au kolana i waġi.

⁴ Rava ġelaui kampa i mamae i ġaiawa ma i riwa, “Aiwai aubaina daji u vikalokaloġi?”

⁵ Wei dajina ita gimare i 300 denarii † ruvana ma manena molamolakai ita verei.” Ma tau, wavine i vienenei.

† **13:33:** Wedau *Evanelia* i girumi, *ma i raupari*, wate buka wadubo nonoana wei eġa ita mamae, Luk 21:16 kampa ona inana i da e mamae. ☆ **14:1:** Exo 12:1-27 * **14:1:** *Raġona (passover)* Exo 12:1 *Palawa eġa yist maiteni (Unleavened-Bread)* Exo 12:17 & 23:15 † **14:5:** Wei lamna me taubagibagi ana maia madeġa tagogi aubaina.

⁶ Wate Iesu i riwa, “Ona voterei! Aiwai aubaina o vinuabolai? Tauna, kua aiaina awariu i kauēi.

⁷ Molamolakai awarimi e mamae-nonoa ma ona ġoei ma tau i ona voagui. Wate tau awarimi eġa ata mamae-nonoa.

⁸ Wavine ana nola i kauēi. Tauna, dajiei tupuau i vokaukauana-nonoei vikokoaga aubaina.‡

⁹ A ririwana-kauemi, mepa Riwana Aiaina i raugugulei dobu au anatapui, wei wavinena aiwai i kaukauei ina babaniei, ma eġa nuanuai ina vuru.”

¹⁰ Judas Iskariotei tauna Apasol tagogi, Pirisi Babadai awari i ġeta da Iesu ita vibenabenamei.

¹¹ Tau i vinuai ai kua maranai wei i nonori ma Judas i parivainuaġani da mane ita verei. Ma Judas i nana da mepa gavogavo ita inanai da Iesu ita amverenei.

Iesu ma Apasol, Raġona torelana i ani.

(Matthew 26:17-25; Luke 22:7-14, 21-23; John 13:21-30)

¹² Ma Palawa Bagibagina torela ina vikarei. Maranai sipu orotoi ġauboi e vunuvunui Raġona torelana aubaina. Tauvotaġotaġo, Iesu i paridadanei, “Mepa u ġoeġoei Raġona torelana ana vokaukauei aubaim?”

¹³ Iesu, tau i ruaġa i riwei ma i paritawanei, “Ona nae au Jerusalem ma oroto, waira wagina e avavarai ona inanai ma ona votaġotaġoi.

¹⁴ Au numana e ruiuiana, numa taniwagana ona riwei, ‘Ai tauviararamana i riwa, “Numa vokaukauana mepa ma au Tauvotaġotaġo maiteni Raġona torelana ana ani?”

¹⁵ “Ma tauna, numa vatavatara ina viatataiemi i vokaukauana-nonoei ma kampa aubaita ona vokaukaua.”

¹⁶ Tauvotaġotaġo i nae au Jerusalem ma i ririweia nanare i nelaġai ma Raġona torelana i vokaukauei.

¹⁷ Au i biga ma Iesu i nei Apasol maiteni.

¹⁸ Tau i kepakepa i amam ma Iesu i riwa, “Anina a ririwemi. Taumi tagogi ina vibenabenameu; tagogi weka maiteni amam.”

¹⁹ Tauvotaġotaġo i vinuabola ma tagotagogi ava i pa, “Eġa tau tapa?”

²⁰ Iesu i paribelei, “Taumi tagogi weka palawa e vivigaloi au aboma tau maiteni.

²¹ Wariaġa i girugirumia nanare, Rava Natuna ina iraġe. Wate aiai da Rava Natuna i vibenabenamei; tauna, kovoġa ġaeġaena ina vaia! I aii da alona avena ita vinatunei.”

²² Maranai i amam ma Iesu palawa i vaia ma i vieġualau, i vogimagimai ma Tauvotaġotaġo i verei ma i riwa, “Ona vaia; wei tupuau.”

²³ Anina ma wine kelakana i vaia ma i vieġualau ma i verei da anatapui i umei,

²⁴ ✠“Wei tau tarau i toi rava maġamaġaui aubai ma au parivainuaġana bagibagina ina vovai-virewapani.

²⁵ Anina a ririwemi, wine eġa ana uma-melei da maranai God ana rava aubaii ana vigulau.”

²⁶ Ma tau i voepaepa welana i ravi ma i ġae au Ola Olives.

Peter, Iesu ina boviei

(Matthew 26:31-35; Luke 22:31-34; John 13:36-38)

²⁷ Iesu, tau i riwei “I girumi nanare,

‡ **14:8:** Mai Jew ai kua da taubeu dajiei e bulobuloi muriai au kokoaga e tereterei. ✠ **14:24:** Exo 24:8; Jer 31:31-34

God i riwa, ‘*Tauviḡamoḡamo ana virāḡeni ma sipu ina vilamonei.*’ (*Zekariah 13:7*)

Ma nanare anatapumi ona ruba-tawaneu.

²⁸ Wate au vomairi au murina ana aivinao au Galili.”

²⁹ Peter i riwa, “Mepa da anatapui ina rubatawanem, wate eḡa tau!”

³⁰ Iesu, Peter i riwei, “A ririwana-kauem da amadodo waguvarai muriai da kokorereko ina tou mara ruaḡa; tam mara tonuḡa ma boviu.”

³¹ Wate Peter, ponana i bagibagi ma i riwa, “Avena mepa da tau, tam maiteni ana iraḡe. Eḡa melanai ana boviem!” Ma tauī ḡelau riwana tagogina i latoni.

Iesu au Gethsemani i raraupari

(*Matthew 26:36-46; Luke 22:39-46*)

³² Ma au Gethsemani i ḡeta ma Iesu, ana tauvotaḡotaḡo i riwei, “Weka ona kiala ma ana raupari.”

³³ Ma Peter, James ma John i taravaini ma nuanuana i’raḡe ma nuanuana i bola-kauēi.

³⁴ Ma tauī i riwei, “Au nuabola i rata kaua au orau da e vunuvunui. Weka ona mae ma ona vineneḡana.”

³⁵ Ma aburuna i verau-nae ma au doa i peu ma i raupari da mepa da tagotagogina, lamna wei marana apoapoea tauna ita netawanei.

³⁶ I riwai pa, “*Abba* Amau! Aiwai anatapuna tagotagogina tam awarim. Wei kovoḡa kelakana ma vaitawanei. Wate eḡa tau au ḡoana, wate tam am ḡoana.”

³⁷ Ma Iesu i nememei ma tauī tonuḡa rarau-nuavurui i nelaḡai. Ma Peter i riwei, “Simon!§ tam aiwai matavena? Mara aburuna uta vineneḡana bo eḡa?”

³⁸ Ma Iesu, tauī i riwei, “Ona vineneḡana ma ona raupari da eḡa au raue-lara ona peu! Arua e ḡoeḡoei, wate tupua i ḡokokokara.”

³⁹ Ma i naeme ma parina tagogina i raupariei.

⁴⁰ Maranai i nememei ma i nelaḡai, i matamatave; tauī, matai i vitai. Ma tauī eḡa ita aramanei aiwai ita riwei.

⁴¹ Mara vitonuina i nene-memei ma tauī i riwei, “Taumi amapo ona matamatave ma laumi ina tautau? Anina! Mara i ḡetai, ona inana. Rava Natuna ina vibenabenamei ḡo’apoapoe ravai au urai.

⁴² Ona vomairi; tana nae; ona inana! Tauvibenabenameu e nenei!”

Iesu i pani

(*Matthew 26:47-56; Luke 22:47-53; John 18:3-12*)

⁴³ Iesu i bababani ma Judas, tauna ana Tauvotaḡotaḡo tagogi i ḡetai. Tauna, patara ana apiai maiteni i nei. Pirisi Babadai ma Tarawatu Babadai ma dogadogara, wei ravai i paritawaneiai.

⁴⁴ Muriai da Iesu awarina ita ḡeta; Judas, patara ai mataira i verei, “Orotona ana vigia laḡolaḡonei; nai tauna. Ona pani ma ona naiei ma ona inana-kauēi!”

⁴⁵ Maranai Judas i ḡeta ma i nae Iesu awarina ma i riwei, “Tauviarararmana!” Ma i vigia-laḡolaḡonei.

⁴⁶ Ma tauī, Iesu i vojijini ma i pani.

⁴⁷ Ma tagogi kampa i maimairi, ana sword i taina-lavui ma Pirisi ḡeḡetelarana ana taunola taniḡana i borituini.

§ 14:37: Au Mrk 3:16 *Simon* wavana i virai da *Peter*.

48 Ma Iesu, tau i riwei, “Taumi ana apiami o nei da ota paniu bo, apam-ina tau amkwalakwalau?”

49 Marana patapatai taumi maiteni ta mamae au Tempol ma a viararamana ma eġa ota paniu. Ma i girugirumia nanare, ina tupua.”

50 Ma Tauvotaġotaġo anapui, Iesu i voterei ma i ruba-tawanei.

51 Ma laraga tagogi, i vikareko ma Iesu i votaġotaġoi. Tau i ġoei da ita vojijini,

52 wate ana kareko i vojijini ma tauna ana kovakovana i ruba.

Tau, Iesu i etarei.

(Matthew 26:57-68; Luke 22:54-55, 63-71; John 18:13-14, 19-24)

53 Ma tau, Iesu i naiei Pirisi Ġeġetelarana. Pirisi Babadai, dogadogara ma Tarawatu Babadai mepa i vitagogieiana.

54 Ma Peter i votaġotaġo da Pirisi Ġeġetelarana ana numa. Ma ana au debadeba, purusimani maiteni i kiala ma i viviairara.

55 Pirisi Babadai ma mai Jew ai boru ġeġetelarana,* Iesu ana apoapoe i baiei da ita virāġeni; ma i baiana-avei.

56 Matamata maġamaġau, Iesu i viwavu-morumoruei, wate ai viwavu taputapunei ava.

57 Ma ġelaui i vomairi ma wei wavuna morumoruna i kauai Iesu awa-rina,

58 “Tauai a nonori tauna i riwa, ‘Wei tempolna i voavoaia. Tau ana rikai ma au pom tonuġa au murina, Tempol ġelauna ana voai ma lamna eġa rava ita voai.”

59 Wate nanare ai viwavu taputapunei ava.

60 Pirisi ġeġetelarana i mairi tau i naoi ma Iesu i vitara-virevirei, “Wei ravai e viviuvuim ma eġa aiwai ma paribelei bo?”

61 Ma Iesu i genuana ma eġa ita paribelei.† Ma Pirisi ġeġetelarana i vitaraviravirana-melei, “Tam Keriso tauvilawana bo? Viviaiaianana Natuna bo?”

62 †Iesu i paribelana, “Tau tauna! Ma *Rava Natuna ona inanai, Vivirewa-panana au oiena ina kiala ma mara ladanei ina nei.*

63 Pirisi ġeġetelarana, amlona i ġaiġai ma ana gara i sikai ma i riwa, “Aiwai aubaina matamata ġelaui tana ġoei?”

64 Taumi, vijiboġa o nonori ma ami nota aiwai?”

Tau anapui i riwa, “Tauna ana ġo’apoapoe aubaina anina da ina iraġe!”

65 Ma ġelaui i raukarei ma Iesu i ovai ma naona i purui; i raunavanavai ma i riwei, “Ma pariverelai, aiai i ravim!” Ma tauvipapai, Iesu i vaia ma i vunui.

Peter, Iesu i boviei

(Matthew 26:69-75; Luke 22:56-62; John 18:15-18, 25-27)

66 Ma Peter au gabaura i mamae ma Pirisi ġeġetelarana ana taunola guguini i ġetai.

67 Maranai tauna, Peter i ’nanai i viviairara; ma i ’nana-tunutunui ma i riwa, “Tam maiteni Iesu Nasaretei, ana tauvotaġotaġol!”

68 Wate tauna i bovi ma i riwa, “Eġa ata aramanei aiwai e bababaniei, a vinuanainei!” Ma i tuopu au metaeta ma [kokorereko i tou‡].

* 14:55: Mai Jew e ġoreġorei *Sanhedrin*. † 14:61: Isaiah i parivereta da *Keriso* ana au iraġe eġa ina gagaloana-melei. (Isa 53:7). ‡ 14:62: Da 7:13 ‡ 14:68: Wei riwana buka au wadubo nonoana eġa ita mamae.

⁶⁹ Taunola guguini, Peter i 'nanai ma i raukarena-melei ma rava au ġereġere i maimairi i riwei, “Wei ravana, tau i tagogi!”

⁷⁰ Wate Peter i bovi me.

Mara aburuna muriai, tau i ġereġere i maimairi, Peter i riwana-melei, “Tam anina, tau i tagogi; aubaina tam, Galiliei!”

⁷¹ Ma Peter i riwa, “God au matana, tau a ririwa kaua, ravana o ririweia a vivinuanainei!”

⁷² Maratagogi kokorereko i tou mara viruaina ma Peter, Iesu riwana i notai - *Muriai da kokorereko ina tou mara ruaġa, tam mara tonuġa ma bovieu*. Ma Peter i vinuabola kaua ma i tou.

15

Iesu i taravaina-naiei Pilate au naona

(Matthew 27:1-2, 11-19; Luke 23:1-5; John 18:28-38)

¹ Ubaubani boiboġi, pirisi babadai ma dogadogara ma tarawatu babadai anatapui i viboru* ma i vianina da Iesu i pani ma i veredamanei Pilate au urana.

² Pilate, Iesu i vitara-virevirei i pa, “Tam mai Jew ai gulau bo?” Iesu i paribelei i pa, “Anina e ririwa nanare.”

³ Pirisi Babadai e viwawuim kaua maġamaġau aubai.

⁴ Ma nanare Pilate, Iesu i vitaraviravirana-melei i pa, “Tam ma paribelana bo eġa? Ma nonori e viwawuim kaua maġamaġau aubai!”

⁵ Wate Iesu i genuana ma eġa ita paribelei. Ma Pilate i ba kaua.†

Iesu ana iraġe i vianinei

(Matthew 27:15-38; Luke 23:13-25; John 18:39-19:16)

⁶ Tai ai kaua maemaena da Raġona Torelana au marana, Pilate, panipani tagogi, rava ai ġoanei e ruperupeni ma e vovoterei da e nena.

⁷ Oroto tagogi wavana Barabas; tauna Rome gabemani i viġavie ma i pani da panipani au numana i mamae. Ana rava maiteni tauviraġena.

⁸ Ma patara i ġeta da Pilate ita vibaġai da panipani tagogi ita rupeni Raġona Torelana au marana.

⁹⁻¹⁰ Pilate i paribelei, “Taumi o ġoeġoei da mai Jew ai gulau ana rupeni aubaimi bo?” Pilate i aramanei da Pirisi Babadai, Iesu i unurei ma lamna aubaina Iesu i veredamanei tauna awarina.

¹¹ Wate Pirisi Babadai, patara i egari da Pilate, Barabas ita rupeni ma eġa Iesu.

¹² Pilate, patara i paridadana-melei i pa, “Tauna o ġoreġoreia mai Jew ai gulau mena ana kauanei?”

¹³ Tai i garara, “Ma tuparatui!”

¹⁴ Pilate i riwa, “Aiwai apoapoena i kauai?” Ma tai i garara guratana, “Ma tuparatui!”

¹⁵ Pilate i ġoei da patara ita vinuabai ma Barabas i rupeni ma *sorodia* i egari da Iesu i kwapui da i vitaratarai ma i naei da ita tuparatui.

Sorodia, Iesu i vinamei

(Matthew 27:27-31; John 19:2-3)

¹⁶ *Sorodia*, Iesu i taravaina-ruiei Pilate ana au numa ma ai rava ġelaui i ġoreiai.

* **15:1:** Mrk 14:55 *Sanhedrin* † **15:5:** Mai Rome ai tarawatu e mamae da maranai i viwawuim ma tauetara eġa uta paribelei lamna tam anina wavu ma varai.

17 Ma gara lebalebarina[‡] [*me gulau ana gara*] Iesu i vioteni ma kunuteia ai donadonanei i viri da au kolana i terei.

18 Ma vinamana i raukarei ma i garara, “Egualau mai Jew ai gulau!”

19 Ma kolana gonuei i raviravi ma i ovaovai. Ma ae-tutuie i mae-ġaira au doa ma i raudunelei ma i vivinamei.

20 Ma i vijiboġa vorovei ma gara lebalebarina i voġiġi-tawanei ma ana gara i vioteni. Ma i taravaina-opunei da ita tuparatui.

Iesu i tuparatui

(*Matthew 27:32-44; Luke 23:26-43; John 19:17-37*)

21 Tai i nena ma Simon i nelaġai, rava Sairinie[§] (tauna Rufus ma Alexander amai). Simon wapuei i nenei. Ma sorodia, tauna i egari da Iesu ana korosi i avarai.

22 Tai, Iesu i naiei da gabu i ġoreġorei Golgotha, lamna anona unu gabuna.

23 Sorodia, wine bunama myrrh maiteni i virai ma Iesu i veredadani, wate tauna i geduaiei.

24 Ma Iesu i tuparatui ma ana gara, taii ava au orai i ġutai.*

25 Ubaubani 9 kilok nanare, Iesu i tuparatui.

26 Aniviwavuna i girumi ma i tutui, “Mai Jew ai gulau.”

27-28 *Danedanenei ruaġa, Iesu au ririvana i tuparatui; tagogi au oiena ma ġelauna au kelakelauna.[†]

29 *Taubabara, kolai i kwajikwajiei ma Iesu i vivinamei, “Na! Tam Tempol taurikaina ma au pom tonuġa ma voa-melei.

30 Ma vilawana-melem ma korosiei ma ġairai!”

31 Ma nanare Pirisi Babadai ma Tarawatu Babadai maiteni, Iesu i vivinamei, “Rava ġelaui i vilawani, wate ainelana ita vilawana-melana-avei.

32 Keriso Tauvilawana, Israel ana gulau; marina korosiei ma ġairai ma tana inana da tana vitumaġane!” Danedanenei i tupatuparatui maitenai, Iesu i vinamei.

Iesu ana iraqe

(*Matthew 27:45-56; Luke 23:44-49; John 19:28-30*)

33 Ma au benai dobu anatapuna i waguwarei da 3 kilok au bigai.

34 Lamna maranaina Iesu ponana i rata ma i kwatu, “Eloi, Eloi, lama sabachthani?” Lamna anona, “Au God, au God aiwai aubaina u netawaneu?”

35 Ma rava ġelaui au ġereġere i maimairi i nonori ma i riwa, “Ona rautaniġanei, Elijah e kwatukwatuei!”

36 Ma rava tagogi i ruba da gara ai au damona i pani ma au wine tomatomana i vialoi ma i voepai Iesu au ipirina ma i riwa,[‡] “Ona vipaipai ma tana inana mepa da Elijah ina nei da ina tereġairei.”

37 Ma Iesu ponana i rata ma i kwatu ma i lavutu tawanana.

38 Ma Tempol au orana anitereġaġara au pouna i wanasikai au tepana da i ġaira au doa.

39 Ma sorodia ai bada, Iesu au naona i maimairi; i 'nanai da i lavutu tawanana ma i riwa, “Wei anina God Natuna.”

[‡] 15:17: Eng. *purple*. § 15:21: Eng. *Cyrenian*. * 15:24: Taii ġaima i tawanei me *dice* da aiwai aiwai garana ita vaia. ☆ 15:27-28: Isa 53:12 † 15:27-28: Giruma ġelaui waduboi vs 28 e mame Ma aiwai i kaukaeia lamna peroveta i ririweia i tupua, Taii i 'nanai me taii go'apoapoe taukauei. Isa 53:12 ☆ 15:29: Mrk 14:58 ‡ 15:36: Psa 69:21 peroveta i girumi da Keriso ita verei.

⁴⁰ Waivine ġelaui aueia i mae ma i raraubiga: Mary Magdalene ma Mary (James keikeina ma Joses^S aloi) ma Salome.

⁴¹ Taui, Iesu i votaġotaġoi ma i vovoagui maranai au Galili i mamae ma waivine ġelaui maġamaġaui, tauna maiteni i ġeġae au Jerusalem, anapui kampa.

Iesu i vikokoagei

(Matthew 27:57-61; Luke 23:50-56; John 19:38-42)

⁴²⁻⁴³ Ma au biga i tuturiai Joseph Arimathea^{*} tauna rava ġaeġaena tagogi boru ġetelarana au orana. Tauna God ana vigulau ana nei i vipaipaiei. Ma vokaukaua marana (Lamna Sabat au naona)[†] ma Joseph ana tepatorana, Pilate awarina i rui ma Iesu taubeuna i vibaġei.

⁴⁴ Pilate i baiei da Iesu boiboġi i'raġe. Tauna, *sorodia* ai bada i kwatuei ma i vitara-virevirei da Iesu i'raġe bo eġa?

⁴⁵ Maranai *sorodia* ai bada i pariverei da anina riwa kaua. Ma Pilate, Joseph i riwei da Iesu tupuana i vaia.

⁴⁶ Joseph, gara maiana ġaeġaena i gimarai ma Iesu tupuana i tere-ġairei. Gare i umai ma au guba tupuana i vimataveni ma ġaima ġaeġaena i kaipeuri da kokoaga metaetana i viaitomeni.

⁴⁷ Mary Magdalene ma Mary - Joses alona i 'nanai mepa Iesu taubeuna i vimataveni.

16

Iesu i vomairi

¹ Ma Sabat au murina, Mary Magdalene ma Mary - James keikeina alona ma Salome, bunama ġabuġabui i gimarai da i naiei da Iesu tupuana ita buloi.^{*}

² Ma Sunday ubaubanai boiboġi maranai madeġa i gogogo, taui i nae au kokoaga.

³ Ma i netae ma i bababani, "Aiai aubaita ġaima kokoaga au metaetana ina kaipeura-tawanei?"

⁴ Maranai taui i taepai, i 'nanai da boiboġi ġaima i kaipeura-tawanei - ġaima ġaeġae kaukauana.

⁵ Maranai i rui au guba ma oroto laragana ana gara ararapoirina i 'nanai au oiena.[†] Ma taui orai i auepai.

⁶ Orotto laragana i riwa, "Eġa orami ina auepai, taumi, Iesu Nasaretei o baibaiei bo? I tupatuparatuia; tauna i vomairi! Ona inana, tauna eġa weka! Taui weka taubeuna i vimataveni.

⁷ [✠] Marina ona nae ma ana tauvotaġotaġo ona riwei, ma Peter eġa nu-anuami ina vuru da Iesu e vivinao au Galili. Kampa ona inana i ririwemi nanare."

⁸ Taui i opu ma kokoagei i viruberubei ana ini sisisi ma ana rovoi. Taui i rovo kaua, lamna aubaina eġa rava ita riwei.

^S 15:40: Au Mat 27:56, Matthew i girumi Joseph ma eġa Joses. ^{*} 15:42-43: Eng. Arimathea.

[†] 15:42-43: Mai Jew ai *Sabate*, madeġa e neneulai au Friday e vivikarei da madeġa e neneulai au Saturday e kwakwa. Mai Jew ai Tarawatu e ririwa da rava i'raġe lamna marana tagogina ina doboi. *Sabate* amadodo madeġa e neneulai ina vikarei lamna aubaina Joseph i volaġilaġina da Iesu taubeuna ita doboi. ^{*} 16:1: Mai Jew ai kaua maemaena da taubeu monamonei ina buloi ma muriai ina doboi ma waivine i goei da wei kauai ita votaġotaġoi. [†] 16:5: Tupua i vimataveni au oiena i kiakiala, ana gara ararapoirina. [✠] 16:7: Mrk 14:28

Mark 16:9-20

Mark Riwana Aiaina damona lamna wariağa i vine-boai. Ma rava ġelauna aiwai i notanotai nanare au vs 9 da 20 i girumi. Wei damonana weka i vikarei.

Iesu, Mary Magdalene awarina i eġa

⁹ Iesu iraġelei i vomairi me au Sunday ubaubanai boiboġi ma i ainae da Mary Magdalene awarina i eġa. Maraotai Iesu, Mary awarina arua-apoapoei seven i viopuni.

¹⁰ Iesu, ana tauvotaġotaġo i vivinuabola ma i toutou ma Mary i ġeta da i pariverei.

¹¹ Ma Mary i pariverei da Iesu i lawana me ma tauna matanei Iesu i 'nanai. Wate tau i eġa ita vitumaġanei.

Iesu, tauvotaġotaġo ruaġa awari i eġa

¹² Wei au murina Iesu inanana tapuna ma ana tauvotaġotaġo ruaġa awari i eġa; maranai tau i nenaie au melagai.

¹³ Tau i naeme ma tauvotaġotaġo ġelau i vieġei. Wate tau i nanare eġa ita vitumaġanei.

Iesu, Taii 11 awari i eġa

¹⁴ Muriai tau i 11 i amam ma Iesu awarii i eġa. Ma i eni aubaina tau i orai i bado ma eġa ita vitumaġana maranai rava, i riwei da Tauna i vomairi me.

¹⁵ ✨Iesu ana Apasol i riwei, "Ona nae dobu au anatapuna. Ma God Riwana Aiaina ona jimei rava anatapui awarii.

¹⁶ Aiai da i vitumaġana ma i babataito; tauna ina lawana. Ma aiai da eġa ita vitumaġana ina kovoġi.

¹⁷ Ma tau i aiavoi da i vitumaġana, rewapana ina verei da kaua babai ina kauiei. Ma arua-apoapoei ina viopuni ma pona tapunei ina babani.

¹⁸ Tau i, mota uraiei ina vaia ma waiawa ina umai ma eġa ina rauputei. Ma urai doridoriai au kolai ina terei ma ina lawana."

God, Iesu i ġaiei au Mara

¹⁹ ✨BADA Iesu, awari i babani vorovei. Ma tauna i ġaiei au mara ma God au oiena i kiala.

²⁰ Tauvotaġotaġo i opu ma dobu au anatapuna i raraugugula. Ma BADA, tau i voagui ma kaua babai i kaukauei da tauvotaġotaġo aiwai i bababaniei i vovai-virewapani.

Apasol ai kaua Pariverena

Luke ana buka i giruma vorovei ma muriai Apasol ai kaua bukana i girumi. Tauna ana ano gaeḡaena lamna i ḡoei da rava ita vieḡei da menanare Arua Vivivireina Iesu ana tauvotaḡotaḡo i rau-etaraveni da Riwana Aiaina ita vituai,

Au Jerusalem ma au Judea au anatapuna ma au Samaria ma dobu au gia dewadewana.

(1:8)

Kerisiana ai babara ma ai nola i babaniei. Mai Jew awarii i vikarei ma i nae da dobu anatapui i vitumaḡana. Tauamgiruma ana nota gaeḡaena da wei bukana tauiavana ita parivere i da kerisiana avena Rome gabe-manina ita viviḡaviei. Kerisiana vitumaḡanana lamna mai Jew ai vitumaḡana e kaukauana-paiei. Wei bukana i ḡutai da raḡaraḡana tonuḡa, ma e viviatataieta da dobu au anatapuna Iesu Riwana Aiaina i jimei ma ekalesia i vitupui:

Iesu ana gae au murina Ekalesia au Jerusalem ai nola i vikarei;

Palestine taun ḡelaui awari i tua-nae;

Ma i tua-nae au Mediteranean da i nae au Rome paratana. Wei bukana ana kaua gaeḡaena lana Arua Vivivireina i nolanola, ma rewapana tauvitumaḡana au Jerusalem i verei au Pentecost. Ma wei au bukana i vieḡeta da Arua vivivireina mara nonoa agu ma rewapana ekalesia ma ai babada i verei ai au aninola au anatapuna. Wariḡa kerisiana ai pariverena i tere-tagogiei raugugula au maḡamaḡau, ma kaua ma ai nola i kaukauei anatapui. Wei au bukana i girumi da wei parivai-nuaḡanana ana rewapana tauvitumaḡana ai au lawana ma kerisiana ai au voepaepa i viatataieta.

Buka rereḡana 1.

Vokaukaua tauvimatamata aubai (1:1-26)

Iesu ana tarawatu ma ana parivainuaḡana damona (1:1-11)

Judas Epaiana (1:12-26)

Tauvimatamata au Jerusalem (2:1–8:3)

Tauvimatamata au Judea ma Samaria (8:4–12:25)

Paul ana nola (13:1–28:31)

Paul ana vaḡai tagogi (13:1–14:28)

Boru au Jerusalem (15:1-35)

Paul ana vaḡai viruaina (15:36–18:23)

Paul ana vaḡai vitonuina (18:24–21:16)

Paul i vipanipani au Jerusalem, Caesarea, ma Rome (21:17–28:31)

Iesu ana Apasol i parivainuaḡani

¹ Egualau Theophilus, buka au naona a girugirumia* lamna Iesu ana tupua ma ana nola i vikarei da i kaukauei ma i viviararamana a pariverem

² i nae da ana gae au marana. Muriai da Iesu i ḡaiei au mara, Tauna Arua Vivivireinei ana apasol vinevinei riwa bagibaginei i parivere.

* 1:1: Bukana au naona i girugirumi lamna Luke ana Gospel

³ Iesu ana iraḡe au murina i vieḡana-melei ana apasol awarii. Ma kaua maḡamaḡau i kauēi da apasol i vitumaḡana kaua da Tauna anina i lawana me. Tauī awarii i eḡa au pom 40 au orana ma God ana vigulau i babaniei.

⁴ Maranai ana apasol maiteni i vitagogiei ma i riwana-guratei i pa, “Eḡa Jerusalem ona oputawanei, wate pulona amau i paripari-vainuaḡanimi ona paini, maraotai a ririwemi nanare.

⁵ ✱John wairei i babaito, wate mara aburuna ava Amau, Arua Vivivireinei taumi ina babataitomi.”

God Iesu i ḡaiei au Mara

⁶ Muriai maranai Iesu ma Apasol i vitagogiei ma tauī Iesu i vitara-vivirei i pa, “Bada! Marina, Israel ana† vigulau ma vere-melei bo?”

⁷ Ma Iesu i paribelei, “Amau ainelana ana rewapanei mara ma iri e vivibadei, aubaina da taumi eḡa ona aramanei.

⁸ ✱Wate maranaina Arua Vivivireina au orami ina rui, maranaina taumi rewapana ona vaia. Ma aubaiu ona vitaunola au Jerusalem, Judea, au Samaria ma dobu au anatapuna.”

⁹ ✱I babani vorovei ma au matai God Iesu i ḡaiei au mara. Ma apau i nei da i purui ma tauī eḡa ita inana-melei.

¹⁰ Ma tauī i ḡoḡouta au mara ma nelara ruaḡa ai gara ararapoiri au ririvai i raumairiei.

¹¹ Ma i riwa, “Mai Galili, aiwai weka o maimairiei ma o ḡoḡoutatei? Wei ravana menanarena o inana i ḡaenei, amapo nanare ina nememei.”

Judas epaiana i vinei

¹² Anina ma Apasol Ola Olive, i voterei ma i ḡaira me au Jerusalem lamna eḡa uama ma au ḡereḡere.

¹³ ✱Ma au Jerusalem i ḡeta ma i ḡae numana i mamae lana au tepana au vatavatara. Tauī ai wava, Peter, John, James ma Andrew, Philip ma Thomas, Batolomeo ma Matthew, James - Apius natuna, ma Simon tauna au naona Zealot‡ ma Judas - James natuna.

¹⁴ Ma wei ravai mara patapatana i vivitagogiei ma i raraupari gogona, waivine ḡelau i Iesu ana roaroa ma aloi Mary maiteni kampa.

¹⁵ Wei au marana, tauvitumaḡana 120 i vitagogiei ma Peter i vomairi ma wenanare awari i babani,

¹⁶⁻¹⁷ “Varevareiu, Judas Iskariot lamna turata tagogi ma maiteni ta nola gogona, wate muriai i voagu da Iesu i pani. Arua Vivivireina wei riwana wariḡa gulau David i riwei da ina tupua; ma aiwai i ririwei anina nanare i tupua.”

¹⁸ Judas Iesu i amverenei mane vainana aubaina, ma wei manenei doa i gimarai. Ma nai au doana tauna kolanei i peu ma manawana i wanawamai da amoamona i opu.

¹⁹ Ma rava anatapui au Jerusalem wei iraḡena riwana i nonori, lamna aubaina tauī nai dobuna ai ponei i viwavai Hakeldama, wei anona Tara Doana.

²⁰ “Wariḡa Gulau David i girugirumia, nanare i tupua,

Ana animae ina kwakwava,

✱ 1:5: Mrk 1:8 † 1:6: Rome gabemanina Juda i vibadei wei au marana, Mai Jew wei eḡa ita ḡoei, ma i ḡoei da ita virai. ✱ 1:8: Mrk 16:15 ✱ 1:9: Mrk 16:19 ✱ 1:13: Mrk 3:16-19 ‡ 1:13: Rava ununurana. Wei ravai mai Rome ai gabemani e viviḡaviei.

ma ega aiai au orana ina mae.

(Psalm 69:25)

Ma

rava gelauna ana nola ina vaia.

(Psalm 109:8)

²¹ *Lamna aubaina marina awarita, rava gelauna tana vinei da ina raviepaiai. Tauna ravanana Iesu maiteni ta bababara-nae madega tonuga au orana,

²² John rava i babataitoi au marana ma i nae da Iesu i gaiei au mara. Ma maiteni tana nola ma rava tana riwei menanarena God Iesu iraagelei i vovaimairini."

²³ Ma tau i rava rua ga i vinei, Joseph-Barsabas (ana wava gelauna Justus) ma Matthias.

²⁴⁻²⁵ Anina ma tau i raupari, "BADA tam rava anapapai orai u aramanei. Ma viegelai da wei ravai rua ga, ma metauna u vinei da Judas ana gabu ina vaia da ina viApasol, aubaina Judas i voterelai da i nae ana au gabu."

²⁶ Anina ma tau i vine, ma vinevine Matthias awarina i peu, ma tauna i vi-Apasol, ma Apasol 11 au orai i rui. §

2

Arua Vivivireina i gairai

¹ Pentecost torelana i getai ma tauvituma gana anapapai numa tagogi au orana i vitagogiei. *

² Maratagogi gugura gaegaena, nonorana me ive vivirewapanana marei i gairai ma tauvituma gana i mamae numana i vioai.

³ Tau i purapura inanana me ai menamenana i 'nanai, i gairai ma rava tagotagogi ava au kolai i kiala.

⁴ Ma Arua Vivivireina anapapai i vioai ma pona taputapunei ava i bababani Arua ana aguei.

⁵ Nai maranaina mai Jew patupatutui dobu au anapapuna i vitaomana au Jerusalem da Pentecost torelana ita apui.

⁶ Ma patarai kampa i viruberubei, ma i nonori da gugurana lamna tauvituma gana tau i tagotagigiava ai ponei i bababani ma tau ai nota i kwa.

⁷ Tau i anapapai i baei ma tau i ava i babani vivira i pa, "Wei mai Galili bo?

⁸ Ma menanarena da anapaputa awarita ata ponei e bababani!

⁹⁻¹⁰ Tauta gelauta mai Parthia, Mede ma Elam, ma mai Mesopotamia, Judea, Capadosia, Pontus ma Eisia, Pirijia, Pamphilia, Egypt ma Libya navanavana, au Sairini au geregerena, ma gelauta mai Rome,

¹¹ gelau mai Jew ma gelau i Jentail wate inibori i vaia da i vimai Jew. Ma gelauta mai Crete ma mai Arabia. Wate God kaua gaegaena i kaukaueia, ata ponei i bababaniei ma ta nononori!"

¹² Tau i anapapai i vinuanaina, nuanuai i ragara ga ma i bababani vivira, "Wei aiwai kauana e tuputupua?"

¹³ Wate gelau i tau i vinamei i pa, "Wei ravai i uma bua!"

Peter rava awarii i raugugula

* **1:21:** Mrk 1:9; Mrk 16:19 § **1:26:** Wei kalona wenanare: mai Jew wava gaima muomuoi awari i girugirumi ma e tawatawanei, ma aiai ana namba i ega lamna tauna ina vaia. Tau i vituma gana da wei kauana awarinei God tau i ina viatataiei da aiai ita vinei. (Pro 16:33) * **2:1:** Mai Jew ai Ragona torelana au murina au pom 50 ma Pentecost torelana e vivikarei. Wei riwana anona amapo wei bukana au damona ona iavi ma ona aramanei.

14 Anina ma Peter i vomairi Apasol 11 maiteni, ma ponana gāeāenei patara awarii i babani,

Au rava mai Jew ma anapapumi au Jerusalem maemaemi, babani ana tere-kauei da ona aramanei. Ona rautaniāana kaua.

15 Wei marinaota, 9 kilok ubaubanai! † Wei ravai eāa ita uma bua me taumi o notanotai nanare,

16 Wei lamna wariāga peroveta Joel i ririweia e tuputupua:

17 *Mara au damona,*

Aruau rava anapapui awari ana iwaāi.

Ma natunatumi nelarai ma waivinei riwau ina jimei,

ma nelara voui mataiei kaua ina inanai,

ma babada magumaguri rauboniei kaua ina inanai.

18 *Wate nanare, Aruau ana iwaāi au taunola nelarai ma waivinei awarii,*
ma ina vitaubabani.

19 *Ma kaua babai au mara ana kauei,*

ma au dobu mataira ana vieāi

ai araratana, tara ma bau potopotona.

20 *Ma madeāa ina waguverei*

ma nawaravi ina ravitaratarai,

muriai da BADA ana mara gāeāena ma boruborumana ina nei.

21 *Nai au marana aiavoi da BADA awarina e viviāore agu aubaina BADA*
taui ina vilawani. (Joel 2:28-32)

22 Ma Peter i babani me:

Mai Israel ona rautaniāana: God Iesu Nasaretei i vovai-virewapani da kaua babai, ma mataira gāeāei i kauei da ita viatataiemi da tauna anina Godei i nei.

23 ☆Wate God wariāga i viogei ma ana āoana nanare da Iesu au urami i terei, ma taumi āo'apoapoe ravai ai aguei, Tauna au korosi o tuparatui da o virāgeni.

24 ☆Wate God, Iesu iraāelei i vovaimairini, ma iraāe iniviarana i vaitawanei ma iraāe eāa tagotagogina da tauna ita vojijini.

25 Wariāga David Iesu i bababaniei maranai i riwa:

Tau a inanai BADA God au naou mara au anapapuna.

Tauna au oieu lamna aubaina eāa ana rovo.

26 *Lamna aubaina nuaiai orau i oai ma menau i morelana,*

ana iraāe ma a aramanei da tupuau ma paina-kauei.

27 *Ma aruau eāa rava irairaāei ai au dobu ma voterei,*

ma tam eāa am taunola vivivireina tupuana ma voterei da ina buda.

28 *Tam lawana etanaina u viatataieu,*

ma Tam maiteni a mamae ma a vinuaiai kaua. (Psalm 16:8-11)

29 Au rava, A riwana-kauemi da amata gulau David i rāāe da i doboi, ma ana kokoaga weka e mamae.

30 ☆Wate David lamna peroveta, ma i aramanei da God i parivainuaāani da ana damei gulau ina opu, me tauna nanare.

31 Ma David i 'nanai God muriai aiwai ina kauei ma i riwa,

Keriso ina vomairi me,

ma tupuana eāa rava irairaāei ai au dobu ina voterei da ina buda.

(Psalm 16:10)

† 2:15: Mai Jew tau i bigai sia e aniani ma wain e umaumai. ☆ 2:23: Mrk 15:24 ☆ 2:24: Mrk 16:6 ☆ 2:30: 2Sa 7:12-13

³² Ma God Iesu-na tagogina iraḡelei i vovaimairini, ma tauai anapapui ai a vimatamata.

³³ Ma God i ḡaiei ma au oiena i vikialai. Ma Arua vivivireina i verei me i parivainuaḡana nanare, ma nai Aruana tagogina Iesu awariai i waḡi, lamna marina o nononori ma o inainanai.

³⁴ ✧ David eḡa ita ḡae au mara, ma wate i riwa, BADA au Bada i riwei, “Au oieu ma kiala

³⁵ ma am ḡavia au ae karem ana terei. (Psalm 110:1)

³⁶ Lamna aubaina mai Israel anapapui ona aramana-kauei da wei ravana Iesu o tupatuparatuia, God i terei da BADA ma Tauvilawana.

³⁷ Ma maranai rava wei riwana i nononori, tauai orai i rautonai da Peter ma Apasol ḡelau i riwei, “Varevareiai, tauai aiwai ana kauei da ana lawana?”

³⁸ Ma Peter i paribelei, “Taumi tagotagogi ava Iesu Keriso wavane i ona rupena ma ona babataito ma ami ḡo’apoapoei ina nota-tawanei, ma God ana pulo Arua Vivivireina ona vaia.

³⁹ Wei parivai-nuaḡanana lamna taumi natunatumi maiteni aubaimi. Ma wate nanare mai jentail - aiavoi da e kwatukwatuei ina nei Tauna awarina.”

⁴⁰ Ma Peter riwa ḡelau maiteni rava i vinua-terenei, ma i egari, “God ona vianinei da ina vilawanimi, ma eḡa kovoḡa ona vaia.”

⁴¹ Ma rava maḡamaḡau Peter ana babani i vitumaḡanei ma i babataito ma nai au marana rava 3,000 ai au boru i rui.

Tauvitumaḡana i mae gogona

⁴² Ma tauvitumaḡana Apasol ai viararamana i nononori, ma i viboruboru, i amam ma i raraupari gogona.

⁴³ Apasol kua babai ma mataira ḡaeḡae maḡamaḡau i kaukauei ma anapapui i rovo ma God i vivirana-kauei.

⁴⁴ ✧ Ma tauvitumaḡana anapapui gabu tagogi i vivitagogiei ma aiwai ḡariei ai rava maiteni i ḡutaḡutai.

⁴⁵ Tau i ai doa, ai numa, ai wapu ma ai purapura i gimagimarei ma manena ai rava ḡelau maiteni i ḡutaḡutai.

⁴⁶ Tau mara patapatai au tempol i vivitagogiei, ma ai au numa ana nuaiaii ma ana morelanai i amam gogona.

⁴⁷ Ma tau i God i vovoepaepai ma rava anapapui i vivinuaiaini. Ma marana patapatai rava voui i neneiai Iesu awarina ma tauvitumaḡana ai boru i viviratai.

3

Peter, oroto aena gwaḡagwaḡana i vilawani

¹ Mara tagogi au bigai 3 oklok, Peter ma John pari aubaina i ḡeḡae au Tempol.

² Ma oroto tagogi aena gwaḡagwaḡana i tupuei, ma mara au anapapuna ana rava i avavara neiai da Tempol metaetana, e ḡoreḡorei, metaeta aiaina, kampa i vivikialai ma rava i ruirui tempol au orana i vivigimanai mane aubaina.

³ Maranai i ’nanai da Peter ma John aburuna ava da au metaeta ita rui, ma i vibaḡai mane aubaina.

4 Peter ma John orotona i 'nana-tunutunui ma Peter i riwa, "Ma inanaiai!"

5 Ma orotona tau i 'nanai ma i notanotai da aiwai awarii ita vaia.

6 Ma Peter, orotona i riwei, "Awariu silva ma gold ega wate aiwai awariu lamna ana verem. Iesu Keriso Nasaretei, wavanei ma vomairi, ma babara!"

7 Ma Peter oroto nimana au oieina i vojijini ma i voagui da i vomairi. Ma maratagogi oroto aena ma ae kwarukwaruna i ai ma i virewapana,

8 ma aenei i viauepa ma babara i vikarei. Anina ma tau i maiteni i rui au tempol ma tauna tempol oraninei i bababara, i viviauepa ma God i vovoepapai.

9 Ma rava anapui orotona i 'nanai i bababara ma God i vovoepapai,

10 ma i aramanei da tauna ravana tagogina tempol metaetana e gōreḡorei *inanana aiaina* au naona, i kiakiala ma i vivigigimana. Ma rava anapui i 'nanai aiwai i tupua wei orotona awarina ma i ba-guratana.

Peter patara awarii i babani

11 Ma orotona Peter ma John i vovojijini ma rava anapui i bana-kauei, ma i viruberubei tau i awari au lovelove e gōreḡorei, Solomon ana lovelove.

*

12 Ma maranai Peter patarai i 'nanai ma i riwei:

Au rava mai Israel, aiwai aubaina o vivinuanaina? Ma aiwai aubaina o inainana-tunutunuia, apamina tauai ai rewapanei bo ai vipatutuei, wei ravana a kauai da i babara?

13 *Wei lamna amamata Abraham, Isaac ma Jacob ai God, ana taunola Iesu i viborumei, ma taumi Tauna o verenei da ita viraḡeni, ma Pilate au matana o geduaiei. Pilate i ḡoei da ita rupeni wate taumi ega ota vianinei.

14 *Iesu lamna rava vivivireina ma jijimanina, wate o geduaiei. Ma Pilate i ḡoei da Iesu ita rupeni, wate taumi o ḡoei da tauviraḡena i rupeni aubaimi.

15 Ma taumi lawana maemae-nonoana tauvereina o viraḡeni, wate God i vilawana-melei, tauai wei a vimatematei.

16 Wei ravana aena gwaḡagwaḡana Iesu au wavana i vitumaḡana ma lamna aubaina i lawana. Taumi o aramanei ana doria menanare, Wate ana tumagaḡana Iesu awarina i vilawani.

17 Ma au rava marina a aramanei da taumi ami babada maiteni Iesu o viraḡeni, aubaina taumi ega ota aramanei da tauna tauvilawana.

18 Wate wei lamna wariaga God ana peroveta anapui i ririweia i tupua, God i riwa da ana tauvilawana ina vinuapoapoe.

19 Ami goa apoapoe Ona voterei ma ona mae-taviremi God awarina da tauna ami go'apoapoe ina nota-tawanei.

20 Ma lamna maranaina God aruami nualawalawana ina verei, God Iesu i vinei da ami Tauvilawana ma ina paritawaneiai.

21 Iesu au Mara ina mae da God kaua anapui ina ravivouni, me God ana peroveta vivivirei wariaga i ririweia nanare.

22 *Moses i riwa, "BADA ami God peroveta, me tau nanare, ina terei ma tauna ami dam oinei ina nei. Ma aiwai anapuna e ririwemi ona rautaniḡanana-kauei. †

* 3:11: Solomon ana lovelove tagogi tempol au orana e mamae. Wei lamna gari au ririvana ma ana tuatua maḡamaḡauna. * 3:13: Exo 3:15 * 3:14: Mrk 15:6-14 * 3:22: Deu 18:15, 18 † 3:22: Mai Jew e ririwa da Moses lamna ai peroveta gaegaena.

23 ✨Ma aiai da wei perovetana eġa ina rautaniġaneġ lamna God ana rava awarieġ ina vilamoneġ.”

24 Peroveta Samuel ma muriai Peroveta maġamaġauġ, kaua i ririweia marina e tuputupua.

25 ✨Taumi nai perovetaġ natunatuġ ma taumi maiteni parivain-uaġana bagibagina au orana. Au baina God Abraham i riwei, “Am epaepaia awarieġ dam anatapuġ au dobu ana viaiaini.”

26 Ma maranai God ana taunola i vineġ, ma au naona i paritawaneiaġ awarimi da ita viaiaini, ma lamnei taumi tagotagogaġ ava ami ġo’apoapoe ota opu-tawaneġ ma ota nei Tauna awarina.

4

Jew babadaġ Peter ma John i etarei

1 Peter ma John rava awari i bababani ma pirisi pulo tauapuina ma tempol taupainiġ* ai bada ma Sadusi ġelauġ † i ġetaġ.

2 Taui amloi i ġaiġai kaua Peter ma John awari aubaina taui i viviararamana da God, Iesu iraġeleġ i vovaimairini ma wei i viatataiana da God rava anatapuġ iraġeleġ ina vovaimairini.

3 Taui Peter ma John i pani ma au i pom aubaina panipani au numana i terei da i mae mara.

4 Wate rava maġamaġauġ riwa i nonori ma i vitumaġana, ma ai maġa nelara 5,000 waivine eġa ita iavi.

5 Ma mara i tom ma Jew babadaġ, dogadogara ma tarawatu babadaġ au Jerusalem i vitagogaġ.

6 Ma pirisi ġeġetelarana Annas kampa ma Caiaphas, John, Alexander ma pirisi ġeġetelarana ana rava maiteni. ‡

7 Ma taui Peter ma John i neiei da au naoi i vimairini ma i riwei, “Aiwai rewapananeġ, ma aiai wavaneġ wei o kauiei?”

8 Arua Vivivireina Peter orana i vioai ma taui i riwei, “Rava ai babada ma dogadogara;

9 tauai kaua aiaina a kauiei gwaġagwaġana awarina ma amadodo taumi o vitara-virevirelai, da menanare tauna i lawananeġ.

10 Ma wei ona aramana-kauiei, da taumi ma mai Israel anatapuġ, da Iesu Keriso Nasaretei o tuparatui, Wate God tauna iraġeleġ i vovaimairini ma tauna wavaneġ wei orotona au naomi lawalawaina e maimairi.

11 Taumi tauvoa nai ġaimana o geduaiei, wate wei ġaimana lamna numa ogona, numa ana tapuna e vovojijini. §

12 —Lamna aubaina Iesu ainelana ina vilawanita. Ma God eġa aiai ġelauna au dobu rewapana ita vereġ da ina vilawana.”

13 Ma taui Peter ma John ai tepatora inanai ma maranai i aramaneġ da taui eġa ġirugirumai, ma i baeġ. Ma i aramaneġ da taui Iesu ana tauvotaġotaġo.

✨ 3:23: Deu 18:19 ✨ 3:25: Gen 22:18 * 4:1: Tempol tau-painina lamna anatapuna au tempol e inainana-vaiteteġ (purusimani). Taui pirisi ġeġetelarana ana taunola. † 4:1: Sadusi taui iraġeleġ vomairime eġa ita vitumaġaneġ ‡ 4:6: Mai Rome Caiaphas i vineġ da Pirisi ġeġetelarana, poiana Annas epaiana. Wate mai Jew ai au ġiu da aiai pirisi ġeġetelarana vaivaina i vaia, tauna anina ina mae da au iraġe. Luke e ririwa da Annas tauna pirisi ġeġetelarana. § 4:11: Mai Jew ai numa ġaimei i voavoai. Iesu tauna anina God ana Tempol vouna oġona. (Eph 2:19-21, Isa 28:16).

14 Ma wate i 'nanai oroto i vivilawania Peter ma John maiteni i maimairi, lamna maranai tau i gamoi i pota.

15 Anina ma Peter ma John i riwei da boru gabuna i opu-tawanei, ma tau i ava i vitarairavira vivira.

16 Tau i vitaraviravira-viravira i pa, "Aiwai tana kau i wei nelarai awari? Rava anapui au Jerusalem i aramanei da tau i kaua babai i kaukau, lamna ega tana boviei.

17 Wate tana vigaei da wei kau i ega ina tua rava gelaui awari, ma riwa bagibaginei tana vigaei da ega aia i awarina Iesu wavanei ina raugugula."

18 Anina ma tau i gorei da i rui me, ma riwa bagibaginei i vigaei da ega aia i awarina Iesu wavanei ina raugugula bo ina viararamana.

19 Wate Peter ma John tau i paribelei, "Taumi ami nota aiwai. Tau i God ana voteletele i bo taumi?"

20 Tau i aiwai a inainanaia ma a nononoria babanina ega ana voterei."

21-22 Wei Orotana i vivilawani lamna gwaḡagwaḡana ma ana madeḡa 40. Lamna aubaina rava anapui God i vovoeapai, ma babada ega ita aramanei menanare Peter ma John ina kovoḡanei. Ma i parivairovorovo-melei ma i paritawanei da i nae.

Tauvitumaḡana God i vibaḡai agu aubaina.

23 Peter ma John i nae me ai rava awari ma pirisi ḡaeḡaei ma dogadogara aiwai i ririweia tau i vieḡei.

24 ✧ Maranai tauvitumaḡana wei riwana i nonori, tau i anapui i raupari gogona God awarina:

BADA tam ai gulau, Tam mara, dobu, boga ma anapuna au orana maema i taukauaina.

25 Tam Arua Vivivireinei am taunola, amaia i David gamonei u babani ma u riwa,

Aiwai aubaina rava awariai e mejimeji,

ma aiwai aubaina ai oga e taratara labalabai?

26 *Ma dobu ai gulagulai i vokaui ma babada ḡaeḡaei gelaui maiteni i vitagogiei da*

BADA ma ana tauvilawana* maiteni i viḡaviei. (Psalm 2:1)

27 ✧ Anina riwa kaua. Wei kau i weka au Jerusalem i tupua, Herod ma Pontius Pilate, Jentail ma mai Israel maiteni i vitagogiei, da am taunola vivivireina Iesu u bulobuloia i viḡaviei.

28 Ma tam am rewapanei ma am ḡoanei am oga menanare u tarataranei marina nanare i tupua.

29 BADA, nai ravai ai parivai-rovorovo au uram ma am taunola ma vovai-virewapani da ana tepatorai riwam ina raugugulei.

30 Uram ma viloloi da ma vilawana ma kaua babai ma mataira ḡaeḡaei ma kau i, am taunola Vivivireina Iesu wavanei.

31 Ma pari au murina, tau i mepa i vivitagogiei gabuna i vigu. Ma Arua Vivivireina anapui orai i vioai. Ma ana tepatorai God riwana i raugugulei.

Tauvitumaḡana ḡariei i ḡutaḡutai

32 ✧ Tauvitumaḡana anapui ai nota ma orai tagogi. Ma ai purapura tagogi ma ega aiwai ita nuanei.

³³ Ma Apasol ana tepatorai ma rewapanai BADA Iesu ana iraġe, ma ana vomairi me i raugugulei. Ma God ana viaiaina ġaġaena tau i anatapui awari i peu.

³⁴⁻³⁵ Ma tau i au orai eġa aiai aiwai ita voladaġei aubaina, ai rava ġelau i ai doa bo ai numa i gimagimarei ma manena i neneiai Apasol awari i tereterei, ma aiai da aiwai i vovoladaġei nanare i vovoagui.

³⁶ Me Joseph, tauna Levi ana damei, au Saipras i tupua, ma Apasol tauna i ġoreġorei Barnabas, wei wavana anona lamna tauduġu.

³⁷ Tauna ana doa i ġimarei, ma manena i neiai da Apasol awari i terei.

5

Ananias ma Saphaira

¹ Anina ma Ananias awana Saphaira maiteni ai doa navanavana i ġimarei.

² Ma airuaġa i vianina tagogi da mane navanavana i nuanei, ma Ananias mane navanavana i naiei da Apasol awari i terei.

³ Anina ma Peter tauna i vitaravirevirei, “Ananias aiwai aubaina Satan u vianinei da au oram i rui ma Arua Vivivireina u morui, ma doa u gimagimarei manena navanavana u nuanei?”

⁴ Doa lamna tam ġarimei da uta ġimarei bo eġa. Ma maranai u ġimarei lamna manena tam ġarimei da uta verenei, aiwai aubaina nota apoapoena au oram i rui? Tam eġa rava awarina uta moru, wate God awarina u moru.”

⁵⁻⁶ Maranaina Ananias wei riwana i nononori, tauna i peu da i'raġe. Anina ma nelara i rui da tupuana i umai ma i naiei da i doboi. Ma aiavoi da wei riwana i nonori i rovo kaua.

⁷ Tau i eġa ita mae guratana, ora tonuġa nanare ma awana i nei, aiwai i tupua eġa ita aramanei.

⁸ Ma Peter wavine i paridadanei, “Abe uta riweu, tam awam Ananias maiteni doa o gimagimarei maiana anina wei bo?” Ma tauna i paribelei, “Ee, doa maiana anina nai.”

⁹ Ma Peter i riwa, “Aiwai aubaina taumi o vianina da BADA Aruana ota raudadani? Nelarai awam i dobodobo ma inanai au metaeta da tam maiteni ina avara-opunem.”

¹⁰ Maratagogi wavine Peter au ae karena i peu da i'raġe. Maranai nelara i rui au numa ma i 'nanai da wavine i'raġe, anina ma i avara-opunei da awana au ririvana i doboi.

¹¹ Lamna maranaina ekalesia anatapui, ma rava aiavoi da wei riwana i nonori i rovo kaua.

Apasol rava maġamaġau i vilawani

¹² Ma Apasol mataira ma aniba kauai maġamaġau i kaukauei rava awari. Ma tauvitumaġana Solomon ana au lovelove i vivitagogiei.

¹³ Wate rava ġelau i ai au boru ruina i rovoei, wate rava tau i vivirana-kauai.

¹⁴ Wate nelara ma waivine maġamaġau Iesu awarina i vitumaġana ma tauvitumaġana ai au boru i ruirui.

¹⁵ Ma lamna aubaina rava ai rava doridoriai i avavara-opunei au eta ma ai au animatave i vimataveni, da Peter inii ita vodadani bo eġa da ġouna tau i ita ġouni da ita lawana.

16 Ma melagai gelaui Jerusalem au ririvana ravai maḡamaḡau ai rava doridoriai, gelaui arua-apoapoei i rui ruinia i neiai ma anatahui i vilawani.

17 Anina ma pirisi gēgetelarana ma ana rava mai Sadusi anatahui orai unura i oai.

18 Ma Apasol i pani, ma panipani au numana i terei.

19 Wate waguvarai BADA ana anela i nei da panipani numana metaetana i votawanei, ma tau i taravaina-opunei ma i riwei,

20 “Ona rui tempol au orana, ona mairi ma lawana vouna riwana anatahuna rava ona pariverei.”

21 Anela i ririwei nanare, tau i tempol i rui ma rava viararamanai i vikarei. Nai maranai pirisi gēgetelarana ana rava maiteni i getai ma boru ḡaēgaena e ḡoreḡorei Sanhedrin i terei. Ma rava i paritawanei au panipani numana da Apasol ita neiai awari.

22 Tau i panipani au numana i geta ma i baina-avei, ma i naeme da i vieḡa.

23 I pa, “Panipani numana anina i gudu-kauei, ma tauvipapai au metaeta i maimairi; wate maranai tau i metaeta a votawanei lamna eḡa aiai kampa.”

24 Maranai tempol taupainina ai bada ma pirisi babadai wei riwana i nonori, tau i vinuanaina da aiwai i tupua.

25 Ma rava tagogi i nei ma i riwa, “Ona rautaniḡana! Nelara panipani au numana o teretereia, tau i tempol e maimairi ma rava e viararamani.”

26 Anina ma tempol taupainina ai bada, ma babada gelaui maiteni i nae ma Apasol i neiai. Tau i rovo ma eḡa ita egari mepa da rava ḡaimei ita ravi.

27 Ma Apasol i neiai boru gēgetelarana au naoi, ma pirisi gēgetelarana tau i vitara-virevirei.

28 I pa, “A riwana-guratemi da wei ravana au wavana avena ota viararamana, wate ami viararamana i tua da Jerusalem i oai. Ma wei ravana tarana wavuna tau i o vereverelai.”

29 Ma Peter Apasol gelaui aubai i vitauvibani i pa, “Tau i God ana voteletelei ma eḡa rava.

30 Taumi Iesu au *korosi* o tuparatui ma o viraḡeni, wate amamata ai God Tauna i vovaimairini.

31 Ma marina Tauna God au oiena e kiakiala, Tauna BADA ma Tauvilawana, Da mai Israel ai ḡo’apoapoe ina rupeni, ma ai ḡo’apoapoe ina nota-tawanei.

32 Ma tau i Arua Vivivireina maiteni wei kau i anatahui mataielai a inanai. Ma nanare God Arua Vivivireina i paritawanei rava votelatelai awari.”

33 Tau i babanina i nonori ma amloi i ḡaiḡai kaua, ma i ḡoei da Apasol ita viraḡeni.

34 Wate Pharisi ma tarawatu badana wavana Gamaliel, rava anatahui wei ravana e vivivirei. Tauna Sanhedrin boruna au orana i mairi, ma rava i riwei da Apasol i opunei au doa mara aburuna ava.

35 Anina ma ana rava i riwei, “Mai Israel, ona inana kaua ma muriai da aiwai wei ravai awari ona kauei.

36 Mara tagogi oroto wavana Theudas viḡavia i vikarei ma i kauana-melei da tauna rava ḡaēgaena, ma rava ai maḡa 400 nanare tauna i votaḡotaḡoi. Ma maranaina tauna i viraḡeni ana tauvotaḡotaḡo i vilamonei ma aiwai anatahuna kampa i kwa.

³⁷ Wate tauna au murina oroto Galiliei wavana Judas i ġeta, census au marana ma rava maġamaġau tauna i votaġotaġoi, ma tauna maiteni i viraġeni, ma ana tauvotaġotaġo i vilamonei.

³⁸ Lamna aubaina a ririwemi da wei ravai ona voteretawanei! Mepa da tau i ai nola ravei, amapo ina peu.

³⁹ Wate mepa da Godei, taumi eġa tagotagogina da wei ravai ona viġaei, taumi mepa da God o viviġaviei.”

⁴⁰ Tau i Gamaliel ana babani i voteletelei. Ma Apasol i riwei da i rui, ma i wipiei i kwapui ma i viġaei da Iesu wavanei ina jima, ma i paritawanei da i nae.

⁴¹ Aubaina i aramanei da God tau i vinei da Iesu wavana aubaina ina vinuapopoe. Anina ma Apasol ana nuaiaii Sanhedrin i opu-tawanei,

⁴² Tau i mara patapatana tempol au orana ma au numa God riwana aiaina i raraugugulei ma i viviararamana da Iesu tauna Keriso.

6

Stephen i vinei tauvoaġu

¹ Tauvitumaġana ai boru i rarata, ma au orai mai Jew Greek taubabanieina, mai Jew kampa maemaei i viamparipariei. Tau i beubeura da ai kaikaiaababa ai ġuta eġa ita tereterei.

² Anina ma Apasol 12 tauvitumaġana ai boru i raukwatuei. Ma i riwei, “Tau i Apasol ma ai nola lamna God riwana ata jimejime i ma avena mane nolana maiteni ata kaukauei.

³ Lamna aubaina au rava, awarimi rava 7 ona vinei, tau i orai Arua Vivivireina i oai ma nuaulaulai da wei nolana ina kauiei,

⁴ Ma tau i ai nola da pari ma God riwana ava ana jimej.”

⁵ Rava anatapui wei ogatarana i vianinei, ma Stephen i vinei, Arua Vivivireina orana i oai, ma ana tumaġana God awarina i rata kaua. Ma nanare Philip, Prokoras, Nikano, Timon, Pamenas ma Nicolas tauna Jentail, Antiokei ma ini bori i vaia ma i vikeresiana.

⁶ Ma wei ravai i neiai ma Apasol nimai tau i tepai i terei ma i raupariei.

⁷ Anina ma God riwana i vituai ma au Jerusalem rava maġamaġau Iesu i vitumaġanei, ma nanare pirisi maġamaġau i vitumaġana.

Stephen i pani

⁸ Anina ma God Stephen i viaiaini ma i vovai-virewapani da mataira ma kaua babai i kaukauei rava awari.

⁹ Wate mai Jew ġelau i provins nununai i nei mai au Sairini, mai Alexandria, ma Silisia ma Eisia ai parinumana e ġoreġorei panipani *waduboi, Stephen ana ġavia i vomairi.

¹⁰ Wate Arua Vivivireina, Stephen nuaulaula ma riwa i verei ma i bababani da tau i vigamopotai.

¹¹ Lamna aubaina tau i rava ġelau i gwalai da moruei Stephen ita vibenabenamei, ma ita riwa, “Tau i a nonori Stephen, Moses ma God i vivijiboġi.”

* **6:9:** Wei ravai lamna slave waduboi, marina i voterei da ana ġoanei e mamae.

¹² Ma lamnei patara i viamlo-ḡaiḡaini, dogadogara ma tarawatu babadai maiteni. Anina ma tau Stephen i vojijini ma i naiei mai Jew ai Boru Ġeḡetelarana† awarina.

¹³ Ma tau rava ḡelai i neiai da moruei Stephen i vibenabenamei, ma i riwa, “Wei ravana mara patapatana Tempol vivivireina ma Moses ana tarawatu i vivijiboḡi.

¹⁴ Tauai a nonori i riwa da Iesu Nasaretei tempol ina rikai ma tarawatu Moses i verevereta anapui maiteni ina virai.”

¹⁵ Ma rava anapui nai au boruna i kiakiala, Stephen i 'nana-tunutunui, ma i 'nanai da tauna naona i lalalai me anela.

7

Stephen ana babani.

¹ Anina ma Pirisi ḡeḡetelarana Stephen i paridadanei, “Wei viwavuna, riwa kaua bo?”

² ✧ Stephen i paribelei:

Varevareiu ma amamau, au babani ona rautaniḡanei. God boruborumanana noita Abraham awarina i eḡa au Mesopotamia, muriai da ita nae au Haran.

³ Ma God tauna i riwei, *Am dobu ma am dam ma netawanei da ma nae dobu ana viatataiem lana.*

⁴ ✧ Anina ma Abraham Mesopotamia i netawanei ma i nae da au Haran i mae. Amana i'raḡe ma au murina God Abraham i paritawanei da marina dobuna o mamae lana kampa ita mae,

⁵ ✧ Nai maranaina God eḡa Abraham doa ita verei, eḡa aburu dadadana! Wate i parivainuaḡani, da ina verei tauna ma ana epaepaia aubaii. Nai au marana Abraham eḡa natunatuna,

⁶ ✧ ma God wenanare Abraham i riwei, *Am epaepaia au dobu ḡela ina mae ma ina vitaunola, nai dobuna ravai tau i rau-iviapoapoelei da madeḡa 400 ina kwa.*

⁷ ✧ *Wate ravai, awarii e vivitaunola ana kovoḡi, ma muriai mai Israel ina opui ma wei au dobuna ina voepaepaiu.*

⁸ ✧ Anina ma God inibori parivai-nuaḡanana bagibagina Abraham maiteni i kauai, ma maranai Isaac i tupua ma au pom vi-8-na Abraham natuna inina i bori. Muriai Isaac natuna Jacob inina i bori, ma nanare Jacob natunatuna 12 anapui inii i bori. Wei babadai lamna tauta noinoita.

⁹ ✧ Jacob natunatuna vare Joseph i unurei ma i gimarei da ita vitaunola au Egypt, wate God tauna awarina i mae.

¹⁰ ✧ Ma ana au nuabola i gagaloei. Ma God nuaulaula i verei ma i kauai da Egypt ai gulau nuanuana i vaia, anina ma i terei da Egypt i vibadei ma ana numa orana i vibadei.

¹¹ ✧ Ma gomara ḡaeḡaena i ḡeta au Egypt ma au Canaan, ma vinu-apoapoe ḡaeḡaena i tupua. Ma noinoita eḡa ai lam.

† 6:12: Sanhedrin. ✧ 7:2: Gen 12:1 ✧ 7:4: Gen 12:4 ✧ 7:5: Gen 12:7; 13:15; 17:8 ✧ 7:6: Gen 15:13-14 ✧ 7:7: Exo 3:12 ✧ 7:8: Gen 17:10-14; Gen 21:2-4; Gen 25:26; Gen 29:31-35:18 ✧ 7:9: Gen 37:28; Gen 39:2-21 ✧ 7:10: Gen 41:39-41 ✧ 7:11: Gen 42:1-2

12 Ma maranai Jacob i nonori da au Egypt lam, ma noinoita i paritawanei au Egypt, wei ai babara naona.

13 Ma muriai i nae me ma wei maranai Joseph i vieġana-melei varevareina awarii, ma kampa mai Egypt ai gulau Pharaoh, Joseph ana numa ravai i aramanei.

14 ☆Anina ma Joseph riwa i paritawanei amana Jacob awarina ma i riwei da ana numa ravai anatapui, ai maġa 75, ita nei au Egypt.

15 ☆Anina ma Jacob i nae au Egypt. Tauna kampa i'raġe ma nanare natunatuna anatapui.

16 Taubeui i naiana-melei au Shekem ma Abraham Hamor natunatuna awarii kokoaga i gimagimaraia, kampa i vimataveni.

17 ☆Maranai mara i tuġereġerei da God Abraham i paripari-vainuaġania ita kauēi, ata patara i maġa guratana au Egypt.

18 Ma Pharaoh vouna au Egypt i vibada ma tauna noita Joseph eġa ita aramanei.

19 ☆Tauna amamata i morui ma i rau-iviapoapoelei, i egari da natunatui melamelai numei i viopuni da ita iraġe.

20 ☆Wei au marana Moses i tupua, tevera inanana aiaina. Amana ma alona natui i ġamoi da nawaravi tonuġa i kwa.

21 ☆Ma maranai tevera numei i tere-opunei, gulau natuna guguinina tevera i vaia ma i ġamoi da natuna.

22 Ma mai Egypt ai nuaulaula Moses i viararamani ma i virewapana, babani ma nola awarina.

23 ☆Moses ana madeġa 40 ma i nota da ita nae ana dam ravai ita raugenari.

24 Ma i 'nanai da Egyptei, Moses ana rava oina i raviravi, ma tauna turana bainei Egyptei i vunui da i virāġeni.

25 Moses i notai da ana rava ita aramanei da God tauna i paritawanei da ita agui da Egypt ita oputawanei. Wate tauī wei eġa ita aramanei.

26 Ma maratamna Moses i nae me ma ana rava ruaġa i viġaiġaiawa i 'nanai, ma i riwei, "Taumi ava ma aiwai aubaina o viġaiġaiawa?"

27 Wate ġaiawa tauvikareina Moses i vokaririei ma i riwei, "Tam aiai i terem da ma vibadelai bo tauai ai taurauetara?"

28 Tam ma virāġeniu me pom Egyptei u virāġeni nanare bo?"

29 Maranai Moses wei i nonori tauna Egypt i ruba-tawanei ma i nae au Midian, wei eġa ana dobu wate kampa i mae. Muriai dobuna wavinena i ravaġi ma natunatuna nelarai ruaġa i tupua.

30 ☆Ma kampa i mae madeġa 40 i kwa ma BADA ana anela au mutulua ola Sinai au ġereġerena tauna awarina i eġa, inanana me ai menamenana ai aburuna rugurugui au orana i ġeġae.

31 Wei i 'nanai ma i baei ma i nae au ġereġere da ai arata ita tuvirevirei ma i nonori BADA i riwa i pa,

32 "Tau amamam ai God, Abraham ma Isaac ma Jacob ai God." Maranai Moses wei i nononori i rovo kaukaua ma naona i tere-govaġi.

☆ 7:14: Gen 45:9-10, 17-18 ☆ 7:15: Gen 46:1-7; Gen 49:33 ☆ 7:17: Exo 1:7-8 ☆ 7:19: Exo 1:10-11; Exo 1:22 ☆ 7:20: Exo 2:2 ☆ 7:21: Exo 2:3-10 ☆ 7:23: Exo 2:11-15 ☆ 7:30: Exo 3:1-10

33 Ma BADA i riwa, “Am ae uma ma votawanei! Wei gabuna au tepana e maimairi, lamna doa vivivireina ma Viaiainana.

34 A inanai menanare mai Egypt, natunatu e rarau-iviapoapoelei. Ai ora-tou a nonori ma a ġairai da tauī ata vai-tawanei. Ma marina ma nei, Tau ana paritawanem au Egypt.”

35 ✨Stephen i riwa:

Wei Moses na tagogina, mai Israel i parivirevirei i pa, “Aiai i terem da tauai ma vibadelai ma ma rauetarelai?” Moses i paritawaneiai da ita vibademi ma ita tereopunemi, anela i eġaeġa ai menamenana au poui, ana aguei.

36 ✨Ma Moses tauī Egypte i ravena-opunenei ma mataira babai ma vivirewapanai i kaukauei au Egypt, Boga lebalebarina ma ai au vaġai madeġa 40 au mutulua.

37 ✨Wei Moses-na tagogina, mai Israel i riwei, “God muriai peroveta ami damei ina paritawaneiai me tau.”

38 ✨Moses Israel patarana maiteni Egypt i opu-tawanei i vitagogiei au ola Sinai ma anela Moses awarina i bababani, tauna kampa noinoita maiteni. Ma riwa mamae-nonoana i nonori ma wei lamna i veredamanei tauta awarita.

39 Wate noinoita Moses i parivirevirei ma au orai i ġoei da ita nae me au Egypt.

40 ✨Ma tauī Aaron i riwei, “Nai ravana Moses, Egypte i taravai-opunelai, tauai eġa ata aramanei aiwai awarina i tupua. Ma tauai ai god kokoitau ma kauē da ina rauetaraveniai.”

41 ✨Anina ma bulumakau ġaubona kokoitauna i kauē, ma pulo i apui awarina ma i amei ma i umei, da aiwai uraiei i kaukauei i vimae-ġaeġaeni.

42 Wate God tauī i mae-puputei ma i voterei da ubona ma nawaravi ma madeġa au mara i vimae-ġaeġaeni. Wei lamna peroveta nununai i ririweia i tupua:

Rava mai Israel! Maranai madeġa 40 au mutulua.

Taumi eġa Tau awariu ġamoġamo ota vunui ma ota apui tapa?

43 *Taumi ami god Molek ana numa gara ma ami ubona god kokoitauna Rephan o avarai.*

Kokoitau o kauē da ota vimae-ġaeġaeni.

Lamna aubaina rava borui ami au dobu ina vainimi ma ina naiemi aueia,

Babilon ina netawanei da dobu au ġelauna. (Amos 5:25-27)

44 ✨Noinoita, God ana numagara, i avarai maranai au mutulua i mamae. Moses wei i voai, me God i viatataiei nanare.

45 Muriai Joshua noinoita i rau-etaraveni ma God ana numagara i avarai ma ana aguei i rui ma nai dobuna ravai i viopuni ma ai dobu ta vaia. Ma numagara kampa i mae da gulau David ana au mara.

46 ✨God, David nuanuana i vai-kauē ma David i vibaġa da tauna God ana numa ita voai.

47 ✨Wate David eġa numa ita voai ma natuna Solomon numa i voai.

48 Wate God ġeġetelerana eġa rava uranei numa ita voavoai au orana ita mamae, me peroveta wariġa i riwa i pa:

49-50 *Aubaina Tau aiwai anatapuna au mara ma au dobu a kauēi. Tapa?*

BADA i riwa, “Mara* au anikiala

ma dobu aeu kareu aniterenana.

Wate numa aiwaina ona voai tau aubaiu? Eḡateni!

Tau au animae-kaua mepa? Eḡa mepa! (Isaiah 66:1-2)

51 Ma Stephen i riwa:

Taumi orami badobadoi. Ma eḡa ota ḡoeḡoei da God ona voteletelei ma taniḡami o vopotai da ana riwa eḡa ota nononori. Taumi Arua Vivivireina o vivigaviei me noinoimi i kaukauei nanare.

52 Noinoimi metaui perovetai eḡa ita rau-iviapoapoelei. Wariaḡa perovetai, God ana tauvilawana, ana nei i vinolenolei; Wate noinoimi wei perovetai maiteni i virāḡeni. Ma marina Tauna i nei ma o vibenabenamei ma o virāḡeni.

53 God ana anela i paritawaneiai da ana tarawatu noinoita i verei, wate taumi tarawatuna eḡa ota voteletelei.

Stephen ḡaimei i virāḡeni

54 Maranai babada wei riwana i nonori ma i meji guratana ma ivoi i uta-ḡiriḡiriei Stephen awarina.

55 Wate Arua Vivivireina Stephen orana i oai, i taepai au mara ma God ana boruma i 'nanai, ma Iesu God au oiena i maimairi.

56 Ma i riwa, “Ona inana! Mara metaetana i wanatawanei ma Rava Natuna a inainanai God au oiena e maimairi.”

57 Marina tauī anatapui taniḡai i vopotai, i vigaragarei ma Stephen aubaina i ruba,

58 ma i taina-opunei au doa, taon i opu-tawanei da au ririva ma ḡaimei ravina i vikarei. Ma tauviwavu ai kwama i votawanei ma tevera laragana wavana Saul au aena i vidamni.

59 Tauī i virauraei ma tauna i raupari i pa, “BADA Iesu, aruau ma vaia!

60 Ma ae-tutunei i peu ma i garara, “BADA ai ḡo'apoapoe ma nota-tawanei.” Wenanare i riwa ma i'raḡe.

8

1-2 Ma Saul kampa da Stephen ana iraḡe i 'nanai ma i vianinei. Rava patupatutui ḡelauī ana toutoui ma ana tarakwatui i nei ma Stephen taubeuna i naiei ma au kokoaga i terei.

Saul Ekalesia i rau-iviapoapoelei

Nai maranaina rau-iviapoapoe ḡaeḡaena i vikarei ekalesia awarii au Jerusalem, Ma anatapui i viruba-tomana au Judea provins ma Samaria provins. Apasol ava au Jerusalem i mae.

3 ✱Wate Saul i vikarei da ekalesia ai boru ita viamoai. Numa anatapui i ruini ma nelara ma waivine i taina-opunei ma i paritawanei au panipani-numana.

Philip au Samaria

4 Wate tauvitumaḡana Jerusalem i rubaruba-tawanei taon ma dobu anat-apuna i naeni ma Riwana Aiaina i raugugulei.

* 7:49-50: Wei anona lamna Bada wenanare natuna i riwei, “Tam au oieu ma kiala ma am ḡavia au ae kareu ana tuvaídoeoi” ✱ 8:3: Act 22:4-5; 26:9-11

⁵ Ma Philip i nae au taon tagogi au Samaria ma kampa BADA ana Vinevine Keriso i raugugulei.

⁶ Maranai patarana, Philip i raraugugula i nonori, ma i 'nanai kaua babai ma mataira gaegae i kaukauei tau i anapui orai taputapunei i rautanigana.

⁷ Tauna arua-apoapoei rava magamaagai au orai i egari da ana garagarai i viopuopuana, ma nanare rava magamaagai gwaagwaagai ma sige-sigei i vilawani.

⁸ Ma nuaiai gaegaeaena i mae nai au taona.

Simon tauna barabaravuna

⁹ Wenanare, nai au taona oroto tagogi i mae wavana Simon, ma tauna wariaga ava ana baravu i kaukauei ma mai Samaria i baibaiei. Ma i voepaepana-melei da tauna rava gaegaeaena.

¹⁰ Rava labalababa, ma wavai naenaei anapui ana babani i rarautanigana-kauei ma i ririwa, "Tauna, God ana rewapana e goregorei, Rewapana Gaegaeaena."

¹¹ Tau i vineneğanana-kauei aubaina mara nonoa tau i Simon ana baravu i baebaei.

¹² Wate tau i Philip i vitumaganei maranai, God ana vigulau Riwana Aiaina ma Iesu Keriso rava awari i raugugulei. Ma lamna aubaina nelara da waivine i nei da i babataito.

¹³ Simon maiteni i vitumagana ma i babataito. Ma Philip mepa i nena tauna kampa aubaina kaua babai ma mataira vivirewapanai i kaukauei. Tauna wei pulona i bana-kauei.

¹⁴ Maranai Apasol au Jerusalem i nonori da mai Samaria, God Riwana i vitumaganei, tau i Peter ma John i paritawanei awari.

¹⁵⁻¹⁶ Ma au Samaria i geta ma tau i raupariei da Arua Vivivireina ita rui au orai. Aubaina tau i Iesu wavanei ava i babataito. Ma arua vivivireina ega ita rui.

¹⁷ Peter ma John urai tau i tepai i terei ma i raupari da Arua Vivivireina au orai i rui.

¹⁸ Maranai Simon i 'nanai da mai Samaria Arua Vivivireina i vaia, maranai Apasol urai au kolai i terei, ma Simon mane i vilololoi,

¹⁹ ma i vibaiga i pa, "Tau maiteni nai rewapanana ma vereu da rava au kolai urau ana terei ma tau i Arua Vivivireina ina vaia."

²⁰ Wate Peter i paribelei i pa, "Anina da God tam am mane maiteni ina tawanem ai au menamenana, aubaina tam e notanotai da God ana pulo manelei ma gimarai!

²¹ Tam wei nolana au orana am gabu ega ita mamae, aubaina oram ega ita ai God au matana.

²² Am nota apoapoe ma votere-tawanei. Ma mae-tavirem BADA awarina ma ma vibaiga da am nota apoapoe ina nota-tawanei.

²³ Aubaina a inanaim da unura oram i oai tauai awariai ma wei notai apoapoei e panipanim."

²⁴ Simon marina Peter ma John i riwei, "Aubaiu BADA awarina ona raupari da aiwai o ririwei ega ina tupua awariu!"

²⁵ Ma Peter ma John ai lawana ma BADA Riwana Aiaina ekalesia voui awari i raugugulei. Ma i raugugula nae Mai Samaria ai au taon nununai da i geta au Jerusalem.

Philip ma Ethiopie

²⁶ Mara tagogi BADA ana anela, Philip i riwei, “Ma vokaukaua ma ma nae au rauanaḡei, etanai au Jerusalem da e ḡaiḡaira au Gaza.” (Wei etanaina lamna au mutulua).

²⁷ Anina ma Philip i vokaukaua ma i nae. Ma wei au etanaina oroto Ethiopiei i ’nanai. Tauna mai Ethiopia ai kwin Kandake, ana mane taupainina. Wei orotona i nae au Jerusalem God viborumana aubaina,

²⁸ ma i nenaē-me ana au dobu. Ma ana au chariot i kiala ma wariāḡa peroveta Isaiah buka i girugirumia i ’aiavi.

²⁹ Ma Arua Vivivireina Philip i riwei, “Ma nae ma chariot au ririvana ma babara-nae.”

³⁰ Anina ma Philip i ruba chariot au ririvana ma i nonori badana peroveta Isaiah ana buka i ’aiavi. Ma Philip i paridadana, “Aiwai e iaiaia e araramanei bo eḡa?”

³¹ Orotona i paribelei, “Menanare ana ’ramananei mepa da rava eḡa ita parivai-araramani!” Ma Philip i vibaḡai da i ḡeta da au ririvana i kiala.

³² Buka au orana, wei riwana i ’aiavi,

Tauna i taravaina-naiei me sipu virāḡenana aubaina

me sipu natuna e genugenuana maranai aparana e boribori,

tauna eḡa aiwai ita latoni.

³³ *Tauna i vijiboḡi ma i vinimalamalai ma eḡa ita kauana-kauei awarina.*

Aiai ana epaepaia ina babaniei.

Aubaina ana mara au dobu i vaitawanei.”

(Isaiah 53:7-8)

³⁴ Ma orotona, Philip i paridadanei, “Isaiah e babaniana-melei bo rava ḡelauna e babaniei?”

³⁵ Ma Philip, wei riwana awarina i vikarei ma riwa ḡelaui maiteni ma Iesu Riwana Aiaina i viaramamani.

³⁶ Ma i nenaē da waira i ’nanai ma Ethiopiei i riwa, “Ma inana waira noi, aiwai aubaina da eḡa ana babataito?”

³⁷ *

³⁸ Badana, chariot taurubeina i riwei, “Chariot ma vojijini” Ma tauna ma Philip i ḡaira waira au orana ma Philip, badana i babataitoi.

³⁹ Maranai wairei i ḡeta, BADA Aruana maratagogi Philip i vai-tawanei ma turana eḡa ita inana-melei, ma ana morelanana i nae ana au dobu.

⁴⁰ Wate Philip au Asotus i raueḡa ma dobuna i naeni ma Riwana Aiaina i raugugulei da au Caesarea taon i ḡeta.

9

Saul i vitumaḡana

¹ Wate Saul amapo da i mejimeji ma i ḡoeḡoei da BADA ana tauvitu-maḡana ita virāḡeni. Ma i nae Pirisi ḡetelarana awarina,

² ma i vibaḡai da pepa ita girumi boru-numai babadai awarii au Damaskas da rewapana ita verei da Iesu ana etanai tauvitumaḡanai, nelara ma waivine ita pani ma ita neiai au Jerusalem.

³ Ma Saul, Damaskas i tuḡereḡerei, nanare ma lalalaina marei i ḡairai da tauna i ravilalai.

⁴ Tauna i peu au doa ma pona i nonori awarina i babani i pa, “Saul, Saul! Aiwai aubaina e rarau-iviapoapoeleu?”

* **8:37:** Buka wadubo nonoana vs 37 eḡa ita mamae.

⁵ Saul i paridadana, “Tam aiai bada?”

Ma pona i paribelei, “Tau Iesu, tauna e rarau-iviapoapoelei!

⁶ Marina ma vomairi ma ma rui au Damaskas, ma kampa aiwai ina riwem ma kauai.”

⁷ Nelara Saul maiteni i nena e mairi kwakwa, ana gamopotai, tau pona i nonori wate ega aiai ita inana.

⁸ Ma Saul au doa i matamatave i vomairi ma matana i kala, wate ega aiwai ita inana. Ma ana rava i raunimavoai ma i taravaina-naiei au Damaskas.

⁹ Ma au pom tonuga ega ita inana, ega ita am bo ita uma.

¹⁰ Au Damaskas tauvitumagana i mae wavana Ananias. BADA ana au inana i viatataiei i pa, “Ananias!”

Ma i paribelei, “Bada, tau weka!”

¹¹ BADA tauna i riwei, “Etanai wavana Etanai Jijimanina ma vaia da Judas ana au numa, kampa oroto Tarsusei wavana Saul ma baiei. Tauna marina e raraupari awariu.

¹² Ma ana au inana i 'nanai oroto wavana Ananias i nei awarina ma urana au inina i terei da ita inana-me.”

¹³ Wate Ananias i paribelei, “Bada, rava magamaagai i riweu da wei ravana ana kaua i apoapoe kaua tauvitumagana awarii au Jerusalem!

¹⁴ Ma weka i nei pirisi gaegaiei ai rewapanei da aiai wavam e viviborumei ina pani.”

¹⁵ Wate BADA, Ananias i riwei, “Ma nae! Tau a vinei da aubaiu ina vitaunola ma wavau ina jimei, Jentail ma ai gulagulau awarii ma nanare mai Israel awarii.

¹⁶ Tau ana viatataiei da aubaiu ina jima ma rau-iviapoapoe gaegaena ina nei awarina.”

¹⁷ Anina ma Ananias i geta au numa ma i rui. Ma urana Saul au tepana i terei ma i riwei, “Vareiu Saul, BADA Iesu, Tauna au etanai awarim i ega maranai weka u nenei, i paritawaneu awarim da ma inana me ma Arua Vivivireina oram ina vioai.”

¹⁸ Maratagogi purapura inanana me iana wenavina au matana i peu, ma tauna, inana me. Ma i vomairi ma i babataito.

¹⁹ Ma i am ma ana rewapana i vai-melei.

Saul au Damaskas i raugugula

²⁰ Ma tauna maratagogi i nae ma pari au numai i raraugugula da Iesu anina God natuna.

²¹ Tai aiavoi da Saul i nonori i ba kaua ma tau i babani vivira i pa, “Wei ravana tagogina, rau-iviapoapoe gaegaena Iesu ana tauvitumaganai awarii i kaukauei au Jerusalem bo? Tauna i nei weka nolana tagogina aubaina da tauvitumagana ita pani ma ita naiei Pirisi babadai awarii bo.”

²² Wate Saul ana raugugula i virewapana kaua ma lamnei mai Jew au Damaskas i aramanei da Iesu anina Keriso, Vinevinena, ma lamna aubaina ana babani ega ita parivirevirei.

²³ Ma i pom biaa au murina Jew babadai i viogatara da Saul ita virageni.

²⁴ Mai Jew marai ma waguvarai taon garina au metaetana i vipaipai da Saul ita virageni. Wate Saul ai ogatara riwana i nonori.

²⁵ Ma waguvarai tauvitumaganai gelaui ai bada Saul i taravaini ma iriga gaegaena au orana i poai ma gavogavo aburuna taon au garina, kampa guravei i tere-gairei au doa ma i ruba.

²⁶ Saul i ġeta au Jerusalem ma maranai i ġoei da tauvitumaġanai ai au boru ita rui. Wate taui i rovoei ma eġa ita vitumaġanei da tauna Iesu ana tauvotaġotaġo.

²⁷ Wate Barnabas tauna i taravaini ma i naiei Apasol awarii, ma i riwei menanare au etanai Saul, BADA i 'nanai ma aiwai awarina i babaniei. Ma menanare au Damaskas ana tepatorana i raugugula Iesu wavanei.

²⁸ Anina ma taui Saul i taravaini ma maiteni i mae ma Jerusalem i naeni ma ana tepatorai i raugugula BADA wavanei.

²⁹ Ma nanare Saul mai Jew pona Greek taubabanieina maiteni i babani ma i viparipariġai, ma taui i viogataru da tauna ita viragēni.

³⁰ Maranai tauvitumaġana ġelau wei i nonori, ma Saul i taravaina-naiei au Caesarea da i paritawanei au Tarsus.

³¹ Anina ma ekalesia au Judea, Galili ma Samaria ana nuaubaii i mae. Ma Arua Vivivireina ana aguei ekalesia ai tumaġana i vovai-virewapani, Ma ai boru i rarata, ma taui BADA i vivirana-kauei.

Aeneas ma Dorkas

³² Nai maranaina Peter dobu maġamaġau i naeni, ma God ana tauvitu-maġana awarii i ġeta au Lidda.

³³ Kampa oroto wavana Aeneas i nelaġai, tauna gwaġagwaġana madeġa 8 ana au aravi i matave.

³⁴ Peter i riwa, “Aeneas, Iesu Keriso i vilawanim! Ma vomairi ma am aravi ma noui!” Ma maratagogi i lawana.

³⁵ Anina ma rava maġamaġau au Lidda ma Sharon wapuna melagaina, i mae-tavirei BADA awarina.

³⁶ Au Joppa tauvitumaġana tagogi wavana Tabitha (Greek ponanei lamna Dorkas) tauna marana patapatana kaua maġamaġau aiiai i kaukauei molamokai aubaii.

³⁷ Wei marana tauna i doria ma i'raġe ma tupuana i oġai ma numa vatavatara au aidamo, i vimataveni.

³⁸ Lidda, lamna Joppa au ġereġerena ma maranai tauvitumaġana i nonori da Peter au Lidda, taui ai rava ruaġa i paritawanei da Peter i egari i pa, “Laġilaġina ma nei!”

³⁹ Ma Peter taui maiteni i nae da i ġeta ma i taravaina-ruiei au numa vatavatara. Kaikaiababa maġamaġau ana toutoui Peter i mairi kwaviviroi. Maranai Dorkas lawalawaina ma kwama da gara i popopoia Peter i viatataiei.

⁴⁰ Wate Peter anatapui i vibaġai da i opu au doa, ma ae-tutunei i mae-ġaira ma i raupari, ma taubeu i riwei, “Tabitha, ma vomairi!” Tabitha matana i kala ma maranai Peter i 'nanai, i vomairi da i kiala.

⁴¹ Peter urana i viloloi ma i voagui da i vomairi. Ma tauvitumaġana anatapui ma kaikaiababa maiteni i kwatueiai, ma wavine lawalawaina taui i verei.

⁴² Ma wei riwana dobu Joppa i naeni ma rava maġamaġau Iesu i vitumaġanei.

⁴³ Peter au Joppa i mae au pom biaġa nanare Simon ġamoġamo opina taurauġaroġaroeina ana au numa.

¹ Au Caesarea oroto* wavana Cornelius, tauna mai Italy sorodia boruna ai bada.

² Tauna rava jijimanina ma patupatutuna, ma ana numa ravai maiteni God taurauduneleina. Ma molamolakai i paipaina-kauei ma marana patapatai i raraupari God awarina.

³ Au bigai tagogi 3 oklok nanare i raraupari ma ana au inana, God ana anela au aiaina i 'nanai, i nei awarina ma i riwa, "Cornelius!"

⁴ Cornelius ana rovona anela i 'nana-tunutunui ma i riwa, "Au bada, menanare!"

Ma anela i paribelei, "Am pari ma am verena molamolakai awarii, i ġeta God awarina me pulo apuapunana ġabuna.

⁵ Ma marina nelara ġelaui ma paritawanei au Joppa ma ravana wavana Simon wavana ġelauna Peter ina taravainiai.

⁶ Tauna rava wavana Simon, ġamoġamo opina taurauġaroġaroeina awarina e mamae gera au ririvana."

⁷ Maranai anela i nae, Cornelius ana taunola ruaġa i ġoreiai, ma ġelauna lamna sorodia, tauna ana tauvipaipai, tauna God tauvitumaġaneiana.

⁸ Tauna aiwai anatapuna tau i riwei ma i paritawanei au Joppa.

Peter Cornelius i raugenari

⁹ Maratomna au benai nanare maranai nelarai Joppa i tuġereġerei, Peter i ġeta numa au tepana da ita raupari.

¹⁰ Ma am i 'raġe ma i ġoei da aiwai ita ani, maranai tau i lam i vovokaukauei, ma Peter matanei rauboni i 'nanai.

¹¹ I 'nanai mara i wanatawanei ma purapura inanana me puru ġaeġaena au adana 4 i vojijini ma marei i tere-ġaireiai au dobu.

¹² Au orana lamna sia tapuna ma tapuna, tetetei me mota ma kiu au aidamo lavelavei.

¹³ Ma pona i riwa, "Peter ma vomairi, ma viraġena ma ma am!"

¹⁴ Wate Peter i paribelei, "Eġa! Lamna eġa melanai ana kauei. Eġa melanai lam viviġana ata am-dadani."

¹⁵ Wate pona i babani me, "Aiwai God i viviaiainia, eġa ma riwa da i apoapoe."

¹⁶ Mara tonuġa wenanare i tupua ma me marana puruna i ġaiana-melei au mara.

¹⁷ Ma Peter aiwai i 'nainanai anona i vinua-notenotei, nanare ma Cornelius nelara i paripari-tawanei, tau Simon ana numa i nelaġai ma i ġeta ana au metaeta.

¹⁸ Tau i paridadana, "Weka rava wavana Simon-Peter e mamae bo eġa?"

¹⁹ Peter amapo da wei i vivinua-notenotei maranai Arua vivivireina i riwa, "Simon, nelara tonuġa e baibaieim!"

²⁰ Lamna aubaina ma vomairi ma ma ġaira au gabaura, eġa ma geduai, aubaina tau a paritawanei awarim."

²¹ Peter i ġaira ma awarii i riwa, "Taumi tau o baibaieu bo, Ami ġoana aiwai?"

²² Ma nelarai i paribelei, "Tauai Cornelius mai Rome ai sorodia ai bada i paritawanelai, tauna rava jijimanina ma God tauvoepaepana, ma mai Jew maġamaġau tauna e vivivirei. Anela vivivireina i riwei da uta nei ana au numa da aiwai u araramanei uta riwei."

²³ Ma Peter nelarai i ġorei da i rui au numa ma kampa i matave.

* 10:1: Wei ravana jentail.

Peter Cornelius ana au numa

Ma maratomna anatahui i nae, Tauvitumaḡana ḡelau i Joppa maiteni i vomairi.

²⁴ Ma au pom ḡelauna tau i Caesarea i ḡeta. Cornelius tau i paipaini, ma ana numa ravai ma ana rava i ḡorei da i nei.

²⁵ Ma maranai Peter i ruirui au numa, Cornelius Peter i 'nanai ma i mae-ḡaira au ae karena ma ana vivirana i raudune.

²⁶ Wate Peter tauna i voepai ma i riwa, “Ma vomairi, Tau rava ota me tam.”

²⁷ Peter ma Cornelius i bababani ma i ruirui au numa. Ma i 'nanai da patara tauna i paipaini.

²⁸ Peter tau i riwei, “Taumi o aramana-kauei da tauta mai Jew ata tarawatu e viviḡaeta da Jentail maiteni tana mae-gogona bo tana raugenari. Wate God i viatataieu da eḡa rava ana ḡorei rava apoapoena bo miramirana.

²⁹ Lamna aubaina maranai u vibaḡaiu da ata nei, Tau au nota aiaini a nei. Tau ata pari-dadanem, Marina ma riweu aiwai aubaina au riwa u paritawanei?”

³⁰ Cornelius i paribelei, “Au benai wenanare au pom 4 marina i kwa, au numa a raraupari, nanare ma rava ana gara ararapoirina ma namanamirina au naoiu i raumairiei.

³¹ Ma i riwa, ‘Cornelius! God am pari i nonori ma am verena molamolakai awarii i vinuaiaiei!

³² Ma nelara ma paritawanei au Joppa da Simon e ḡoreḡorei Peter awarina. Tauna Simon, ḡamoḡamo opina taurauḡaroḡaroena ana au numa e mamae.”

³³ Lamna aubaina da am riwa laḡilaḡina ava a paritawanei, ma i ai da tam u nei. Tauai anatahui ai marina weka God au matana a vivipaipai da BADA aiwai i riwem ana nonori.”

Peter ana babani

³⁴ Ma Peter babani i raukarei, “Marina a inana-kauei da God rava anatahui e vaivaia da tagogina.

³⁵ Wate dobu dobuai ravai God e vivivirei ma kaua aiiai e kaukauei, Tauna wei ravai e ḡoeḡoei,

³⁶ Taumi o aramanei God Riwana Aiaina i paritawanei mai Israel awarii da rava ina mae-kaua God maiteni, maranai Iesu Keriso ina vitumaḡanei ma tauna ai lawana ina vibadei.

³⁷ Taumi o aramanei Iesu aiwai i kauei Judea au anatahui, au Galili i vikarei maranai John babataito ai kaua i raugugulei.

³⁸ God Arua Vivivireina ma rewapana Iesu Nasaretei i verei da dobu maḡamaḡai i naeni ma kaua aiiai i kaukauei, ma rava au orai arua apoapoe i ruiruini, i vilawani.

³⁹ —Aiwai anatahui au Judah provins ma au Jerusalem i kaukauei tauai anatahui a vimatemei ma a bababaniei. Tauna au korosi i tutui da i'raḡe.

⁴⁰ Wate God tauna iraḡelei i voepa-melei aupom au vitonuina ma i kauei da ḡelauai awariai i eḡa.

⁴¹ Eḡa rava maḡamaḡai tauna ita inanai, anina tauvimatamata i vinevinei awari ava i ḡeta. Lamna tauai maiteni a uma ma am ana vomairi au murina.

⁴² Ma i egariai da dobu au anapapuna ana raugugula ma ana jima da God Iesu i vinei da rava anapapui lawalawaii ma irairagei ina rauetarei.

⁴³ Peroveta anapapui i jimei da maranai rava Iesu i vitumaḡanei, Tauna wavinei God tau i ai ḡo'apoapoe ina vaitawanei."

⁴⁴ Maranai Peter i bababani ma Arua Vivivireina i ḡairai ma rava i raurautaniḡana i vioai.

⁴⁵ Ma mai Jew Joppei i nenei Peter maiteni, i ba kaua maranai God Arua Vivivireina i paritawana ḡairei Jentail awarii.

⁴⁶ Au baina mai Jew i nonori tau i pona tapunei i bababani ma God i vivimae-ḡaeḡaeni. Anina ma Peter i riwa,

⁴⁷ "Tau i Arua Vivivireina i vaia me tauta. Wei lamna aubaina eḡa aiai ina viḡaeta da wei ravai tana babataitai."

⁴⁸ Ma tau i Cornelius ana numa ravai maiteni ma ana rava ḡelai Iesu Keriso wavanei i babataitai, ma tau i Peter i vibaḡai da maiteni ita mae mara aburuna.

11

Peter ana babani

¹ Apasol ma tauvitumaḡana au Judea provins i nonori da Jentail maiteni God riwana i nonori ma i vitumaḡana.

² Ma maranai Peter i ḡeta me au Jerusalem tauvitumaḡana mai Jew ḡelai tauna i eni i pa,

³ "Tam Jentail ai au numa u rui, ma maiteni u am!"

⁴ Anina ma kaua menanare i tuputupuanei anapapuna Peter tau i parivere:

⁵ I riwa i pa:

Maranai a raraupari au Joppa ma matauei kaua a inanai, ma purapura inanana me puru ḡaeḡaena adana 4 i vojijini ma marei i tere-ḡaireiai awariu.

⁶ Au orana a inana lamna ḡamoḡamo maramaraḡamai ma moduei, tetetei me mota ma kiu au aidamo lavelavei.

⁷ Ma pona a nonori i pa, "Peter ma vomairi, ma viraḡena ma ma am!"

⁸ Tau a paribelei, "Eḡa! Lamna eḡa melanai ana kauai. Eḡa melanai lam viviḡana ata am-dadani."

⁹ Wate pona marei mara viruaina i babani, "Aiwai purapurana God i riwa da i ai, tam eḡa ma riwa da i apoapoe."

¹⁰ Mara tonuḡa wenanare i tupua, ma puruna i ḡaiana-melei au mara.

¹¹ Nai maranaina mai Caesarea ai rava tonuḡa i paripari-tawaneiai, au metaeta i raumairiei.

¹² Ma Arua Vivivireina i riweu da eḡa aiwai ana notai ma orau taputa-pune i ana nae. Mai Joppa tauvitumaḡana 6 maiteni a nae ma ravana ana au numa a rui.

¹³ Cornelius i riwelai da anela awarina i eḡa, ma i riwei, "Rava ma paritawanei au Joppa da rava wavana Simon Peter ina neiiai."

¹⁴ Tauna wei riwana ina neiiai ma lamnei tam ma am numa ravai maiteni ina vilawanimi.

¹⁵ Ma babani a raukarei ma Arua Vivivireina i ḡairai da tau i vioai me au naona awarita i tupua nanare.

16 ✨ Anina ma Iesu aiwai i ririwei a notai, “John wairei i babataito, wate taumi Arua Vivivireinei ina babataitoimi.”

17 Inanana au aiaina da God Jentail pulona tagogina i verei, me tauta i verevereta maranai Iesu Keriso ta vitumaḡanei, ma tau aiai da God ata viḡaei?

18 Taui i vigamopotai maranai wei i nonori, ma God i viborumei i pa, “Riwa kaua da God Jentail maiteni i vianinei da ina rupena ma ina lawana.”

Ekalesia au Antiok

19 ✨ Ekalesia ḡelaui rau-iviapoapoe i rovoei maranai Stephen i viraḡeni ma i vilamonei au uama. Ḣelaui i ruba nae au Phonisia, au Saipras ma Antiok, ma kampa Iesu Riwana Aiaina i raugugulei mai Jew ava awarii.

20 Wate ekalesia ḡelaui mai Saipras ma mai Sairini i nae au Antiok Jentail awarii ma Iesu Riwana Aiaina i raugugulei.

21 BADA ana rewapana tau i orai i mae ma Jentail maḡamaḡau i vitumaḡana ma i mae-tavirei BADA awarina.

22 Wei riwana i ḡeta ekalesia awarii au Jerusalem, ma tau i Barnabas i paritawanei au Antiok.

23-24 Maranai i ḡeta ma i 'nanai da God ravai i viaiaina-kauei, tauna i vinuai ai ma i egari da BADA awarina ina vipatutu orai taputapunei. Barnabas tauna rava aiaina, Arua Vivivireina orana i oai ma ana tumagaana i rata, ma God ana aguiei, i rauguga ma rava maḡamaḡau i taini BADA awarina.

25 Ma Barnabas i nae au Tarsus da Saul ita baiei.

26 Ma i nelaḡai ma i nei ai au Antiok, ma kampa tauvitumaḡana maiteni i mae madeḡa tagogi i kwa, ma patara ḡaeḡaena awarii i viararamana. (Weka au Antiok lamna i vikarei da tauvitumaḡana i viḡorei Kerisiana)

27 Wei au marana peroveta ḡelaui Jerusalem ei i ḡairai.

28 ✨ Peroveta tagogi wavana Agabas i vomairi ma God ana rewapanei i vieḡa da gomara e nenei au naoii dobu au anapapuna (Caesar Claudius ana vibada au marana gomarana i nei).

29 Tauvotaḡotaḡo au Antiok i vianina da tau i ava ita kauana-guratei da mane vounaina ita kauei da ai rava ekalesia au Judea ita voagui.

30 Taui nanare i kauei ma manena Barnabas ma Saul au urai i terei ma tau i ekalesia ai babada au Jerusalem i verei.

12

James i viraḡeni ma Peter i pani

1 Lamna maranai, gulau Herod Agrippa* i raukarei da ekalesia ḡelaui i rau-iviapoapoele.

2 James, John tuana uana sodei i bori-tuini.

3 Ma maranai Herod i 'nanai da mai Jew wei kauana i vinuai ai ei, ma ana sorodia i egari da Peter maiteni ita pani da au pani numana ita terei. Wei kauana Palawa Bagibagina ana au torela i tupua.

✨ 11:16: Act 1:5 ✨ 11:19: Act 8:1-4 ✨ 11:28: Act 21:10 * 12:1: Tauna gulau Herod 1 ḡoḡana.

⁴✠Ma Peter i pani ma au pani numana i terei ma sorodia 16 tauna i paini. [Sorodia 16 i terei da borui 4 ma i vipaipai.] Herod i goei da Peter ita vojijini da raḡona torelana au murina ma au deba ita rauetarei.

⁵ Ma lamna aubaina Peter au pani numana i vojijini mara aburuna. Wate ekalesia i raraupari guratana God awarina Peter aubaina.

Peter pani numanei i tere-opunei

⁶ Ma nai waguvaraina, ma maratamna da Peter ita rauetarei, Peter sorodia ruaḡa au poui i matamatave. Urana seinei i raḡini sorodia ruaḡa au urai, ma sorodia ḡelau i metaeta i vipaipai.

⁷ Maratagogi BADA ana anela i eḡa ma pani numana i ravilalai. Ma Peter i vogugui da matana i kala ma i riwei, “Laḡilaḡina ma vomairi!” Ma sein au urana i dabarara.

⁸ Ma Peter i riwei, “Ma vigara ma ae uma ma oteni.” Ma nanare i kauai. Ma i egari, “Am kwama potopotona ma oteni ma ma votaḡotaḡoiu.”

⁹ Peter anela i votaḡotaḡoi da pani numana i opu-tawanei, wate eḡa ita aramanei anela aiwai i kaukauei, tauna i notai i rarauboni.

¹⁰ Taui, sorodia boruna ruaḡa au doa i netawanei, da i opu au metaeta iramei, wei e opuopu au taon. Metaeta ainelana i wanatawanei aubaii ma i opu. Taui etanai tagogi i ḡairani ma maratagogi anela tauna i voterei.

¹¹ Peter ana nota i nememei ma i riwa, “Wei anina riwa kaua! BADA ana anela i paritawaneiai da Herod au urana i vaitawaneu, da mai Jew aiwai i notanotai da ita tupua lamna eḡa ita tupua.”

¹² Maranai ana nota i nememei tauna i nae Mary ana au numa. (Mary lamna John alona. John wavana ḡelauna Mark). Kampa rava maḡamaḡau i vitagogiei ma i raraupari.

¹³ Peter au metaeta i raupewapewa ma taunola wavana Rouda i nei da metaeta ita votawanei.

¹⁴ Ma Peter ponana i nonori ma i aramanei da tauna, ma i vinuaii guratana da eḡa metaeta ita votawanei ma i ruba-rui da i vinolanola i pa, “Peter au metaeta e maimairi!”

¹⁵ Wate taui eḡa ita vitumaḡanei ma i riwei, “Tam ma bubua!” Wate tauna i riwa bagibagi. Ma taui i riwa, “Nai Peter ana anela.”

¹⁶ Wate Peter i raro-pewapewa ma maranai taui metaeta i votawanei ma i nanai da tauna, taui orai i auepai.

¹⁷ Peter urana i voepai da rava i genuana ma i riwei menanare BADA pani numanei i tere-opunei. Ma i riwei, “James[†] ma ekalesia ḡelau wei ona parivere.” Ma Peter i nae au dobuḡela.

¹⁸ Maranai mara i tom kampa au pani numana nuabola ma vinuanaina ḡaeḡaena i peu sorodia awarii da aiwai i tupua Peter awarina

¹⁹ Herod, ana sorodia i egari da Peter i baii wate eḡa ita nelaḡai. Lamna aubaina sorodia 16 i etarei ma i viraḡeni. Muriai Herod Judea i netawanei ma i nae au Caesarea da ita mae mara aburuna.

Herod iraḡe

²⁰ Marina Herod amlona i ḡaiḡai kaua Taia ma Sidon ravai awarii, lamna aubaina taui ana borui i nei da Herod maiteni wei i babaniei. Taui Herod ana taunola ḡaeḡaena Blastus, i taravaini da ita voagui. Taui rom i vibaḡei Herod maiteni. Aubaina ai lam Herod ana dobiei i nenei.

²¹ Ma marana i ġetai da Herod maiteni ita viboru ma tauna ana vigulau garana i vigarei ma ana au anikiala i kiala ma awarii i babani.

²² Ma patara ana babani i nonori ma i logoi i pa, “Wei lamna god e bababani ma eġa rava!”

²³ Maratagogi BADA ana anela Herod i vipeuni au doa ma motamota orana i ani da i’raġe, aubaina tauna rava ai voepaepa i vinuaiaiei ma eġa rava ita riwei da BADA ita voepaepai.

²⁴ Ma ekalesia BADA riwana i raraugugulei ma rava maġamaġau i nenei BADA awarina ma ekalesia i rarata.

²⁵ Maranai Barnabas ma Saul ai nola au Jerusalem i vikwai, tau i John-Mark i taravaini da maiteni i nei au Jerusalem.

13

Barnabas ma Saul i viaiaini ma i paritawanei

¹ Kerisiana au Antiok au orai peroveta ma taugiu wavai wenanare, Barnabas, Simeon (e ġoreġorei Gawara), Lusias Sairinie, Manaen (Tauna gulau Herod Antipas maiteni i rata tagogi), ma Saul.

² Mara tagogi maranai tau i ujiuji ma BADA i vovoepaepai ma Arua Vivivireina i riwa i pa, “Tau, Barnabas ma Saul a vinei, ona tereriei au nola aubaina.”

³ Anina ma uji ma pari au murina tau i urai Barnabas ma Saul au tepai i terei ma God ruaġai i viaiaini ma i paritawanei.

Au Saipras

⁴ Ma Arua Vivivireina Barnabas ma Saul i paritawanei da i ġaira au Selus ma kampa i amkuka damana au bonabona Saipras.

⁵ Ma au Salamis i ġota ma i nae mai Jew ai au boru numana ma God riwana i raugugulei. John-Mark tau i maiteni i nae da ai tauagu.

⁶⁻⁷ Tau i bonabonana i kwaviviroi da au Paphos taon i ġeta. Weka Jew ei barabaravuna ma peroveta morumoruna i nebelei wavana Bariesu. Tauna bonabonana ana gavena Segius Paulus i vituranei, Segius Paulus rava nualaulaunana ma i ġoei da God ana babani ita nonori ma lamna aubaina Barnabas ma Saul i rauġoreiai.

⁸ Wate barabaravuna Bariesu (Greek ponanei lamna Elimas) Saul ma Barnabas i viġaviei da gavena ana tumaġana ita viapoapoeni.

⁹ Saul wavana ġelauna Paul, Arua Vivivireina orana i oai ma barabaravuna matana i ‘nana-tunutunui.

¹⁰ Ma i pa “Tam Satan natuna ma kaua aiaii ma jijimani tauviapoapoenina! Tam morumoru kaukauam ma gwalagwalamerum. Ma amapo da BADA ana kaua ma voviravirai da moru.

¹¹ Ma marina BADA urana ina kovoġim da matam ina apoapoe mara aburuna ma eġa madeġa lalalaina ma inanai.” Maratagogi matana i vinawanawa ma i gimtona ma nare da were i voladaġa-nae da rava au urana ita vojijina.

¹² Maranai gavena i ‘nanai aiwai i tupua ma i vitumaġana, aubaina tauna BADA ana viararamana i bana-kauei.

Paul God Riwana Aiaina i jimejime i Antiok taon au Pisidia

13 Paul ana rava maiteni Paphos i voterei ma i amkuka damana au Perga taon au Pamphilia provins, Ma weka John-Mark tau i voterei ma i naeme au Jerusalem.

14 Perga i voterei ma i rui da au Antioch taon au Pisidia provins. Ma au Sabate i rui au boru-numana ma i kiala.

15 Ma rava gelaui, Moses ana tarawatu bukana ma peroveta gelaui ai buka i 'avi, ma babada riwa i paritawanei Paul ma Barnabas awari i pa, "Varevareiu! Mepa da awarimi nota aiwai da ota voagui ai lamna marina ona gei da ona babaniei."

16 Paul i vomairi ma urana i voepai da rava i genuana ma babani i vikarei i pa:

Mai Israel ma taumi ega mai Jew ai God tauviborumeina, ona rautaniġaneul!

17 ✧ Mai Israel ai God noinoita i vinei, ma i vimaurai ai au mae au Egypt, ma ana rewapana gaeġane i dobunei i taravaina-opunei.

18 ✧ Madeġa 40 au mutulua ami kaua apoapoei ami beura ma ami gunura anatapui am-iauei.

19 ✧ Dam gaeġaei 7 i vipupui au Canaan ma dobuna mai Israel i verei da i viġariana-nonoei.

20 ✧ Wei anatapuna madeġa 450 au orana i tupua. Wei au murina God taurauetara† i terei da tau i vibadei da peroveta Samuel ana mara.

21 ‡ Anina ma rava God i vibaġai da gulau ita verei. Ma God Saul, Kish natuna Benjamin ana damei i terei; ai gulau da madeġa 40 i kwa.

22 § Ma God Saul i tere-opunei ma David i terei ai gulau. Ma wenanare i riwa i pa, "Tau a aramanei da David, Jesse natuna orau ana rauoġara, ma au ġoana anatapuna ina kau ei."

23 Muriai me God i parivainuaġani nanare, Mai Israel ai Tauvilawana, Iesu David ana damei i nei.

24 ✧ Muriai da Iesu ita nei, John mai Israel anatapui awari i jima da ai ġo'apoapoe ina voterei ma ina mae-tavirei God awarina ma ina babataito.

25 ✧ Ma John ana nola au damona i riwa, "Taumi o notanotai da tau Tauvilawana bo? Eġa! Tau eġa tauna. Wate ona rautaniġana, rava au muriu e nenei tauna i ġetelara, tau eġa tagotagogina da ana ae uma ġuravana ana रुपeni."

26 Varevareu - Abraham natunatuna ma taumi Jentail God tauviborumeina, God tauta awarita, kwakokwakoi vilawanai riwana i paritawaneiai!

27 Mai Jerusalem ai babada maiteni God ana Tauvilawana i vinuainainei, ma lamnei Iesu i kovoġi, Peroveta wei lamna i jimejime i au Sabate marana patapatana.

28 ✧ Tai i eġa ana apoapoena aiwai ita nelaġai da Iesu ita viraġeni, wate Pilate i vibaġai da ita viraġeni.

29 ✧ Maranai rava ai babada maiteni, ai nuabola Iesu awarina

✧ 13:17: Exo 1:7 ✧ 13:18: Num 14:34 ✧ 13:19: Deu 7:1 * 13:20: (a) Jdg 2:16; (b) 1Sa 3:20
 † 13:20: Wei ravai lamna ai ġavia babada i ma ai tauravena ma taurauetara *Judge*. ‡ 13:21: (a) 1Sa 8:5; (b) 1Sa 10:21 § 13:22: (a) 1Sa 13:14; (b) 1Sa 16:12 ✧ 13:24: Mrk 1:4 ✧ 13:25: Mrk 1:7 ✧ 13:28: Mrk 15:13-14 ✧ 13:29: Mrk 15:42-47

i kauana-paiei me peroveta i ririwei nanare, ma tupuana au korosi i tere-
gairei ma au guba i vimataveni.

³⁰ Wate God Iesu iraḡelei i vovaimairini.

³¹ ✱Ma au pom maḡamaḡau Iesu tauī maiteni au Galili da i ḡeḡae au
Jerusalem awari i eḡa. Wei ravai marina e vivimatamata rava awarii.

³² Marina tauai Riwana Aiaina a paripariveremi. Wei parivain-
uaḡanana wariaga noinoita awari i kauēi.

³³ Ma God nanare i kauēi tauta eda muri aubaita, da Iesu iraḡelei
i vovaimairini, au Psalm viruaina wenanare I girumi,
Tam natu.

Amadodo Tau a viamanem. (Psalm 2:7)

³⁴ God Iesu iraḡelei i vovaimairini da eḡa tupuana ina buda. Me
i girugirumi nanare i pa,

*Au viaiaina vivivireina David a parivainuaḡani tam ana verem. (Isaiah
55:3)*

³⁵ Psalm ḡelauna wenanare i girumi,

*A 'ramanei da Tam am Messiah-Tauvilawana tupuana eḡa au kokoaḡa
ma voterei da ina buda. (Psalm 16:10)*

³⁶ Maranai David i mamae ma God ana nola i kauēi ma i'raḡe, ma
amamana maiteni i doboi ma tupuana i buda.

³⁷ Wate God Iesu iraḡelei i vovaimairini ma tupuana eḡa ita buda.

³⁸⁻³⁹ Lamna aubaina au rava, ona aramanei da Iesu awarinei God ami
ḡo'apoapoe ina nota-tawanei. Rava anatapui da Iesu e vivitumaḡanei, ai
ḡo'apoapoe e notanota-tawanei ma ai viturana e viviaiaiini. Wei Moses
ana tarawatu eḡa ita kaukauei.

⁴⁰ Ona paina-melemi da peroveta aiwai i ririwei eḡa awarimi ina tupua.
Aubaina i riwa;

⁴¹ *Ona rautaniḡana vivijiboḡami,*

kaua ḡaeḡaena ana kauēi da Ona baei ma ona iraḡe!

*Aubaina ami au lawana kaua ḡaeḡaena ana kauēi da taumi ona vitumaḡana-
avei.*

⁴² Paul ma Barnabas i opuopu ma rava i nei ma i vibaḡa-guratei da
ita nememei au Sabate ḡelauna da Tauvilawana ana kaua ita babanana-
kauēi.

⁴³ Boru i kwa da rava i vilamonei, mai Jew borui ma ḡelaui marina
ina bori i vaia da i vimai-jew, tauī Paul ma Barnabas i votaḡoi, ma i riwana-
guratei da Iesu ana aḡuei ina mae jijina.

⁴⁴ Au Sabate ḡelauna taon ravai anatapui i ḡeta da Iesu riwana aiaina
ita nonori.

⁴⁵ Maranai mai Jew wei patarana i 'nanai ma orai unura i oai ma Paul
i vikaua-morumoruei ma i vitepaubaubai.

⁴⁶ Ma Paul ma Barnabas ana tepatorai i babani, "God riwana a jimeī
awarimi au naona, wate taumi wei riwana o geduaiei. Wei e viviatataiana
da taumi lawana mamae-nonoana eḡa ota ḡoeḡoei. Lamna aubaina
ana voteremi ma God riwana ana jimeī Jentail awarii.

⁴⁷ BADA wenanare riwa bagibaginei i riwelai,

Tau a vinemi da lalalaina Jentail awarii,

*da rava anatapui au dobu ona riwei menanare ai ḡo'apoapoe a nota-
tawanei ma a vilawani. (Isaiah
49:6)*

48 Maranai Jentail wei riwana i nonori, tau i vinuaiai kaua ma BADA Ri-wana Aiaina i voepaepai, ma tau da God i vinei lawana mamae-nonoana ita vaia, i vitumaḡana.

49 Ma BADA Riwana Aiaina i vituai nai au paratana.

50 Wate mai Jew Jentail waivinei manemanei ma mai Jew ḡelau i egari da Paul ma Barnabas ai ḡavia i vomairi ma dobunei i viaḡaḡana-opunei.

51 ✧ Anina ma tau i aei pokauna i rauabuabui da ita viatataiei da BADA eḡa ita vinuaiai awarii ma i nae au Ikoniam taon.

52 Wate Arua Vivivireina kerisiana voui au Antiok orai i oai ma i vinuaiai kaua.

14

Paul ma Barnabas i jima au Ikoniam.

1 Kauana tagogina i tupua au Ikoniam. Paul ma Barnabas i nae mai Jew ai au boru numana ma menanare i babaninei da mai Jew ma Jentail maḡamaḡau i vitumaḡana.

2 Wate mai Jew ḡelau eḡa vivitumaḡana i Jentail i kelari ma ai nota i barai da Paul ma Barnabas i geduaiei.

3 Avena ma Paul ma Barnabas kampa i mae guratana ma ana tepatorai BADA ana aguei i jimajima. Ma kaua babai ma vivirewapanai maḡamaḡau i kauai. Wei i vimataira da ai jima lamna riwa kaua.

4 Taon i kai ḡelau mai Jew aubai i mairi ma ḡelau Aposol aubai i mairi.

5 Ma mai Jew ma Jentail ḡelau i vioga da Paul ma Barnabas ḡaimei ita virauraei.

6 Wate tau i riwana i vaia ma dobuna i ruba-tawanei ma i nae au taon ḡaeḡaei Listara ma Derbi au Laikonia provins ma taon au ririvai.

7 Ma weka Riwana Aiaina i jimana-naiei.

Rava i notai da Paul ma Barnabas god

8 Au Listara oroto aena ḡokokokarana, alona manawanei gwaḡagwaḡana i vinatunei ma eḡa ita babara dadana.

9 Kampa i kiala ma Paul i bababani i rarautaniḡanei. Paul matana i tawanei ma i 'nanai da tauna i vitumaḡana da ita lawana

10 ma i garara awarina, "Aemei ma mairi!" Ma orotona aenei i mairi ma babara i vikarei.

11 Maranai patara i 'nanai Paul aiwai i kauai tau i ava ai ponei i babani vivira, "god ruaḡa i ḡairai awarita me *rava."

12 Tau i riwa da Barnabas lamna mai Greek ai god Zeus† ma Paul i vitauvibabani aubaina i riwa da tauna Hermes.

13 Zeus ana pulo gabuna, taon au giana, Zeus ana pirisi patara maiteni bull ma berana ulaulai i neiai taon au metaetana da Apasol ita puloi.

14 Wate maranai Paul ma Barnabas wei riwana i nonori, tau i gara i sikai ma i ruba-opu patara awarii ma i garara,

15 ✧ "Aiwai aubaina wei kauana o kaukai? Tauai rava ota me taumi nanare! Tauai Riwa Aiaina a neneiai da nai kauai kwakwavi ona voterei

✧ 13:51: Mrk 6:11 * 14:11: Paul ma Barnabas Greek ponanei i bababani † 14:12: Zeus lamna mai Greek ai god ḡaeḡaena. Rava ai vitumaḡana da godna e vivilawani. Hermes lamna Zeus natuna ma tauna lana Tau-vinolanolana. Zeus ma god ḡelau aubai. Rava i notai da Hermes lana e kauwei da rava e babana-kauwa ma ai babara e aiiai. Wate nanarena e notanotai da tauna kauwa aiaina e vivitupui ma e kauwei da rava e vivinatuna kauwa. ✧ 14:15: Exo 20:11

ma ona nae BADA lawalawaina ona viborumei. Tauna mara ma dobu ma boga ma aiwai anapuna au orai i kauēi.

¹⁶ Wariāga tauna rava i voterei da ai goanei i mae.

¹⁷ Wate marana patapatai e viviatataiemi da tauna e mamae ma ana nuavaina e verevereta, garewa marei ma maura ma lam e vereveremi ma au orami nuaiai e oaoai.”

¹⁸ Apasol i bababani ma i kauana-guratei da ravai ita viāgai da tauī avena ita puloi.

Mai Listara Paul gāime i virauraei.

¹⁹ Mai Jew gēlauri Antiok ei ma Ikoniamei i nei ma patarana i egari da Paul gāime i virauraei ma taone i taina-opunei, i notai da tauna iraēge.

²⁰ Wate maranai vivitumaḡanai i gēta da i mae-kwaviviroi, tauna i vomairi ma i naeme au taon.

Aupom gēlauna tauna ma Barnabas i nae au Derbi.

²¹ Paul ma Barnabas Riwana Aiaina i jimei au Derbi ma ekalesia voui maḡamaḡauri i rui. Ma i nae me au Listara, Ikoniām ma Antiok.

²² Metauna au dobuna i jimajima kampa tauvitumaḡana i ririwana-guratei ma i vovai-virewapani da ina mairi-jijina ai au tumaḡana i pa, “Piripiri maḡamaḡauri au orana ona rui wate au murina God ana au vibadana ona rui.”

²³ Paul ma Barnabas ekalesia nununai ai babada i vinei ma i raupari ma i uji BADA awarina, da ai ekalesia ma ai babada ina paini.

²⁴ Anina ma au Pisidia provins i verautua da i nae me au Pamphilia provins.

²⁵ Au Perga BADA riwana i jimei ma i gāira au Atalia.

²⁶ Ma kampa i amkuka ma i nae me au Antiok au Syria provins, weka ai nola i vikarei, maranai ekalesia kampa God i vibaḡai da tauī ita viaiaini ai au nola ma i paritawanei ma marina ai nola e vivikwai.

²⁷ Ma kampa i gēta ma ekalesia i vitagogiei, ma aiwai anapuna God ana aguei i kaukauei rava i vieḡei, ma menanare Iesu metaeta i votawanei da Jentail maiteni Tauna i vitumaḡanei.

²⁸ Ma kampa tauvitumaḡana maiteni i mae guratana.

15

Boru au Jerusalem

¹ Wate nelara gēlauri Judeaei i gāirai au Antiok ma ekalesia i viararamani i pa, “Mepa da eḡa inibori ona vaia Moses ana tarawatu e ririwei nanare, God taumi eḡa ina vilawanimi.”

² Ma karuwaḡawaḡa gāeḡaena i bauni Paul ma Barnabas maiteni. Ma tauī Paul, Barnabas ma rava gēlauri i vinei da i gāe au Jerusalem da Apasol ma babada ita inanai wei babanina aubaina.

³ Ma i paritawanei au Jerusalem, Ma ai au vaḡai ekalesia au Phonisia ma Samaria provins i pariverei menanare Jentail i mae-tavirei God awarina. Ma tauī i vinuiaiāi kaua maraina wei i nonori.

⁴ Maranai i gēta au Jerusalem, ekalesia ma Apasol i nei da i nebelei. Tauī i pariverei menanare kaua anapui God ana aguei i tupua.

⁵ Wate ekalesia gēlauri mai Pharisi, i vomairi ma i babani guratana i pa, “Jentail anina da inibori ina vaia ma ona egari da Moses ana tarawatu ina voteletelei.”

⁶ Apasol ma babada i viboru da wei babanina i okei.

⁷ ✠Ma i vitarapiri guratana ma Peter i vomairi ma tau i riwei i pa, “Au rava! O aramanei da au orata God i vineu da Riwana Aiaina ana jimei Jentail awarii da tau i ina nonori ma ina vitumaḡana.

⁸ ✠God rava anatapui ai nota e araramanei, ma Jentail Aruana Vivireina i verei me tauta nanare. Wei matairana i viatataieta da God i vianina.

⁹ Tauna Jentail ma tauta e vaivainita da tagogina, ma ata vitumaḡanei orata i viaiaiani.

¹⁰ Marina aiwai aubaina God o viviamlo-ḡaiḡaini? Tauta amamata maiteni eḡa tata virewapana da tarawatu tata vojijina-kauei. Wate marina wei vitana Jentail ta verevere-damanei.

¹¹ Eḡateni! Tauta anataputa ta vivitumaḡana da BADA Iesu ana aguei tana lawana, ma nanare Jentail maiteni.”

¹² Rava anatapui i genuana ma Barnabas ma Paul i rautaniḡanei, tau i bababani menanare ana au vaḡai God ana aguei kaua aniba ma vivirewapanai i kauei Jentail awarii.

¹³ Maranai i babani vorovei, James* babani i vikarei, “Au rava ona rautaniḡaneu.

¹⁴ —Peter †au naona i pariveremi menanare God Jentail i raugenari ma ḡelaui i vinei da tauna ḡarinei.

¹⁵ Ma Peroveta nununai wei kauai i bababaniei marina nanare e tuputupua:

¹⁶ *Wei au murina ana nememei,
ma David ana numa gara ana voa-melei.*

*Ana vituramairini
ma ana kauei da ina virewapana me.‡*

¹⁷ *Da rava mamae-terenai*

BADA ina baiei,

Wate Jentail a rauḡorei da ḡariuei, BADAi riwa.

(Amos 9:11-12)

¹⁸ *Wariaḡa da marina wei ta aramanei.*

¹⁹⁻²¹ —✠Lamna au baina eḡa tana kauei da ina piripiri Jentail aubaii, tau i mamae-tavirei God awarina. Wate pepa tana girumi ma tana egari da lam e pulopuloei god morumorui awarii eḡa ina ani, eḡa ina viawawana labalababa, ḡamoḡamo uai e kikiki eḡa ina ani ma sia ana tarana eḡa ina ani. Aubaina wariaḡa da marina Moses ana tarawatu e raugugulei boru au numai Sabatena patapatana.”

Pepa i girumi Jentail awarii

²² Ma Apasol, babada ma ekalesia anatapui rava ḡelaui i vinei ma i paritawanei au Antiok au Syria provinsPaul ma Barnabas maiteni. Tau i ai babada ruaḡa i vinei wavai Judas wavana ḡelauna Barsabas ma Sailas.

²³ Ma wei pepana au urai i terei,

Aposol, ekalesia babadai, varevareimi.

Jentail ekalesia au Antiok, Syria provins ma Silisia provins. Varevareiai, eḡalau!

✠ 15:7: Act 10:1-43

✠ 15:8: Act 10:44; 2:4

* 15:13: Iesu ana tevera

† 15:14: Peter

wavana ḡelauna Simon. ‡ 15:16: Maranai God David ana numaga e bababaniei lamna David ana vibadana vouna e ririwei ma eḡa ana epaepaia.

✠ 15:19-21: Lev 18:6-23; Lev 17:10-16

24 Tauai riwana a vaia da rava ġelau i ai au boru i ġairai ma ai viararamani i vinuabolaimi ma i visina-viraviraimi, wate tauai nai ravai eġa ata paritawanei.

25 Lamna aubaina tauai a viboru ma a vianina da taupariverena ata paritawaneiai, ata rava Paul ma Barnabas maiteni,

26 tau i verena-melei ma ai lawana eġa ita vinuabolei BADA Iesu Keriso wavana aubaina.

27 Judas ma Sailas a pariparitawanei da tau i gamoiei ina riwemi aiwai tauai a girumi.

28 Arua Vivivireina ma tauai ai ġoana da eġa vita ġaeġaena ana veremi, anina wei tarawatuna ava.

29 Lam god morumori i puloi eġa ona ani,

Eġa tara ona umai, Eġa ġamoġamo uana kikikina vioana ana tarana ona ani.

Eġa ona viawawana labalababa,§

Mepa da wei tarawatui ona vojijina-kauei, taumi kaua aiaina o kaukauei.

Eġalau kaua.*

30 Ma nelaarai i paritawanei da i ġaira au Antiok, ma ekalesia i rieiai da pepa i verei.

31 Ma tau i 'avi ma i vinuaiai kaua pariverena aiaina aubaina.

32 Judas ma Sailas tau i God ana peroveta ma i babani guratana awarii ma wei tau i vinuaiaiei ma ai tumaġana i vovai-virewapani.

33 Ma kampa i mae mara aburuna ma ekalesia ana nuaubai i paritawana-melei au Jerusalem.

34 †

35 Wate Paul ma Barnabas au Antiok i mae, ma tau i maiteni BADA Riwana Aiaina i viararamani ma i raugugulei.

Paul ma Barnabas i vilamonei

36 Ma muriai Paul, Barnabas i riwei, "Tana nae dobu au anatapuna mepa BADA Riwana Aiaina ta raugugulei ma ekalesia tana raugenari, ma tana inana i tau i anina bo eġa."

37 Barnabas i ġoei da John-Mark ita taravaini.

38 ☆Wate Paul wei notana eġa ita ġoei aubaina au naona John tau i au Pamphilia i ruba-tawanei ma eġa ita mae da maiteni ita nola.

39 Ai vipariparinigai i apoapoe guratana da tau i vilamonei. Barnabas, Mark i taravaini ma kukei i damana au au Saipras.

40 Paul, Sailas i vinei. Ma ekalesia, BADA i vibaġai da ana aguei tau i ai au nola ina paini.

41 Tau i Syria da Silisia i naeni ma ekalesia i raugenari ma i vinua-terenei.

16

Timothy Paul ma Barnabas maiteni i nae

§ 15:29: Viawawana labalababa ġelau wei: Rava ġelau awawai maiteni e viawawana. (Exo 20:14, Deu 5:18) Mane aubaina e viawawana (Lev 19:19, 1 Cor 6:15) Am femili ravai o viviawawanei (Lev 18:22, Rom 1:26-27) Ġamoġamo e viviawawanei (Lev 18:23) Rava eġa uta ravaġi ma e viviawawanei (Eph 5:3) Rava u egari da u viawawanei. (Gen 34:7, Deu 22:25-28) * 15:29: Kaua ġaeġaena lamna eġa ini bori ma Iesu ana aguei, u korosi i take aubaita. † 15:34: Buka waduwaduboi au orai vs 34 eġa ita mamae "Wate Sailas i ġoei da kampa ita mae." ☆ 15:38: Act 13:13

¹ Paul i nae au Derbi da au Listara, kampa tauvotaḡotaḡo i mae wavana Timothy. Tauna alona Jew ei ma kerisiana, Wate amana Jentail.

² Ekalesia au Listara ma Ikoniam Timothy i voepaepana-kauei.

³ Paul i ḡoei da tauna ita taravaini ana au vaḡai, lamna aubaina ini bori i verei aubaina mai Jew kampa i aramanei da tauna amana Jentail.

⁴ Maranai taon nununai i nenaeni, ma ekalesia kampa i paripari-verei Apasol ma babada au Jerusalem ai nota, ma i riwei da tarawatu i ririwei ina votaḡotaḡoi.

⁵ Ma ekalesia ai vitumaḡana i vovai-virewapanai ma tauvitumaḡana voui i ruirui marana patapatai.

Paul ana rauboni

⁶ Arua Vivivireina Paul ana rava maiteni i viḡaei da eḡa BADA riwana ita jimei au Eisia provins, ma Pirijia ma Galatia paratana i naeni.

⁷ Maranai i nei Maisia ana au provins ma i ḡoei da ita damana au Bithinia provins. Wate Iesu Aruana eḡa ita vianinei.

⁸ Ma Maisia i verautuini da i nae au Troas.

⁹ Waguvaraina Paul ana au inana i 'nanai oroto Macedonie i maimairi ma i vivibaḡai i pa, "Ma damanai au Masedonia da ma voaguiai!"

¹⁰ Paul ana rauboni au murina tauai a vioḡa da laḡilaḡina ana vomairi Masedonia provins aubaina. Tauai a vitumaḡana da God i ḡorelai da Riwana Aiaina kampa ana jimei.

Paul i nae au Philipai.

¹¹ Au Troas tauai amkuka, a viaruana damana au Samotreis bonabonana a ḡeta ma au pom ḡela a kuka-nae au Neapolis.

¹² Ma kampa da a babara nae au Philipai taon au Masedonia provins, weka mai Rome ai sorodia ai bareki ḡaeḡaena i mae, kampa a veraumae.

¹³ Ma au Sabate taon a opu-tawanei ma a nae au waira, a notanotai da kampa boru gabuna wate eḡa. A kiala ma waivine ruaḡa ota kampa i rauriei awari a babani.

¹⁴ Taurautaniḡana tagogi lamna Jentail wavinena wavana Lidia ma ana dobu Thaiataira. Tauna gara lebelebarina maiana ḡaeḡaena taugimareina ma God i vitumaḡanei, ma God orana i votawanei da aiwai Paul i bababaniei i rautaniḡanana kauei.

¹⁵ Maranai wavine ana numa ravai i babataito ma i rauḡorelai i pa, "Ona nei au numa mepa da o notanotai da tau kerisiana ririwa kauana." Ma i egariai da ana au numa a mae.

Paul ma Sailas au panipani numana au Philipai

¹⁶ Mara tagogi a nenaie boru au gabuna ma taunola gugui i nebelei, Tauna au orana arua apoapoenai i mae ma lamnei aiwai amapo da ina tupua i vivieḡai. Ma mane ḡaeḡaena i kaukauei ana taniwaga aubaina.

¹⁷ Tauna Paul ma tauai i votaḡotaḡoiai ma i garagarara "Wei nelarai God ḡeḡetelarana ana taunola! E vivinolanola menanare God e vivilawananei."

¹⁸ Wei kauana i kauei au pom biaḡa da Paul i viamlo-ḡaiḡaini da i mae-tavirei ma arua apoapoenai i riwei, "Iesu Keriso wavanei a egaegarim da wavine ma opu-tawanei!" Maratagogi arua apoapoenai wavine i opu-tawanei.

40 Ma Paul ma Sailas pani numana i opu-tawanei ma i nae Lidia ana au numa ma kampa kerisiana maiteni i viboruboru ma i vovai-virewapani. Anina ma tau i dobuna i netawanei.

17

Au Thesalonika

¹ Paul ma Sailas Amphipolis taon ma Apolonia taon i voterei da i nae au Thesalonika taon. Weka mai Jew ai boru numana i mamae.

² Ma i rui au boru numana au Sabate me mara patapatai i kaukauei nanare, kampa Sabate tonuḡa rava awari God riwana i viararamani.

³ Ma God riwanei i viararamana da Keriso ina vinuapoapoe ma iraḡelei ina vomairi me, “Wei ravana a bababaniei awarimi, tauna Iesu Keriso.”

⁴ Mai Jew ḡelau orai i taini ma tau i votaḡotaḡoi. Ma nanare Jentail nelara maḡamaḡagai God taurauduneleina ma waivine wavai naenaēi maḡamaḡagai.

⁵ Wate mai Jew i unura ma rava ora-potapotai maḡamaḡagai au etanai i tami ma au taon vikaruwaḡawaḡa i vikarei. Ma oroto wavana Jason ana numa i ruini Paul ma Sailas i baibaiei da ita opunei patara awari.

⁶ Wate maranai eḡa ita nelaḡai tau Jason ma kerisiana ḡelau i taina-naiei taon babadai awari, ma i garara, “Wei ravai dobu au anatapuna apoapoe maḡamaḡagai i kauēi, marina i ḡetai ata au dobu.”

⁷ Ma Jason, Paul ma Sailas i taravaini ana au numa. Tau Caesar ana tarawatu e viviaigai ma e ririwa da gulau ḡelauna e mamae wavana Iesu.

⁸ Maranai patara ma taon babadai wei babanina i nonori tau amloi i ḡaiḡai kaua,

⁹ ma Jason i egari da mane ḡaeḡaena i vimaiei da eḡa mae boaboa ḡelauna ina vitupui. Ma tau Jason i voterei da i nae.

Au Berea

¹⁰ Ma waguvarai tauvitumaḡana Paul ma Sailas i paritawanei au Berea. Maranai kampa i ḡeta, ma i rui au boru numana.

¹¹ Mai Berea i viaiaii, eḡa me mai Thesalonika. Tau i rautaniḡana ma i votelatela ma marana patapatana God ana buka i 'aiavi da ita aramanei da Paul aiwai i bababaniei lamna riwa kaua.

¹² Ma lamnei mai Jew maḡamaḡagai i vitumaḡana, ma nanare mai Greek waivinei wavai naenaēi ma nelara.

¹³ Maranai mai Jew au Thesalonika paratana i nonori da Paul God riwana i raraugugulei au Berea, tau maiteni i nae kampa, ma rava i rauegari da ḡavia ita vikarei.

¹⁴ Maratagogi kerisiana Paul i paritawanei au gera wate Sailas ma Timothy au Berea provins i mae.

¹⁵ Ma nelara Paul i tauvigwanigwaniei da au Athens, ma Paul nelarai i riwei ma i paritawanei au Berea da Sailas ma Timothy ita riwei da laḡilaḡina ita nei awarina.

Paul au Athens i raugugula

¹⁶ Ma Paul au Athens ana rava i paipaini, ma i 'nanai da kampa kokoitau i maḡa kaua ma i vinuabola kaua.

¹⁷ Mai Jew ma mai Greek God tauviborumeina awari i jima guratana au pari numana ma nanare au deba, aiai da i ḡeta ma i rautaniḡana.

18 Ma rava ġelau i nuaulaulai i ġetai ma maiteni i vitarapiri, tau i ġoreġorei mai Epicure ma mai Stoic*, tau i lawana ai kaua tauviararamanai. Ma ai rava ġelau i paridadana, “Wei ravana aiwai e voġavoġanei?” Ġelau i riwa, “Mepa da tauna dobu ġelau ai god e bababaniei.” Tau i wenanare i babani aubaina Paul Iesu Riwana Aiaina ma ana iraġe ma ana vomairi me, i raugugulei.

19 Ma i taravaini ma i naiei ai au boru e ġoreġorei Areopagus ma i riwei, “Ma nei ma a ġoei da am viararamanana vouna e bababaniei, ata aramanei.

20 Kaua ġelau i babaniei tauai a vivinuanainei, ma a ġoei da ana aramanei anona aiwai?”

21 (Taumana ma mai Athens marana patapatai ai nola eġa aiwai, da kaua voui ina virarautuei ma ina nononori.)

22 Ma Paul babadai au naoi i mairi ma i riwa:

Dogadogara mai Athens! A inana da taumi vipatupatutumi ami god awarii,

23 A bababara ma ami pulo aniapunana a inainanai, ma tagogi a inanai au tepana i giruma, “Wei God eġa ata araramaneia aubaina.” Wei Godna o viviborumei wate eġa ota aramanei. Tau ana riwemi nai Godna ai.

24 ✠ Tauna God mara ma dobu ma aiwai anatapuna au orana i kauai. Ma tauna mara ma dobu badana, ma numa rava uranei e voavoai au orana eġa ita mamae.

25 Ma eġa rava ai agu ita paipaini, tauna agu eġa ita ġoeġoei. Aubaina tauna rava lawana ma lavutu ma anatapuna e vereverei.

26 Au karena rava tagogi i kauai ma nai ravanei dam patarai i vitupua ma dobu i maeni. Tauna ainelana rava ai mara i terei da ina mae ma ina iraġe ma animae paratana i aiterei.

27 God wenanare i kauai da rava tauna ina baiei da mepa ina nelaġai. Wate tauna au ġereġereta, eġa au uama.

28 Taugiruma ġelauna Greekei i riwai pa, “Taunei ta mamae ma ta bababara ma anatapuna ta kaukauai.”† Ma wate ami taugiruma ġelauna i girumi i pa, “Tauai nanare tauna natunatuna.”‡

29 Ma tauta God natunatuna, eġa tana notai da God lamna me kokoitau, goldei bo silvei i kauai. Rava uraiei ma ana nuaulaulaei i kauai.

30 Wariaġa rava God eġa ita aramanei wate God tau i 'nana-tawanei, wate marina anataputa egaegarita da tana rupena ma tana mae-tavireta awarina.

31 Aubaina mara i vinei maranai rava anatapui aiainei ma jijjimaninei ina kovoġi. Rava i vinei da taunei ina kovoġa. God wei ravana iraġelei i voyaimairini lamna ina vimataira rava awari da ravana anina tauna.

32 Maranai Paul iraġelei vomairina i babaniei, rava i nonori ma ġelau tauna i vinamei wate ġelau i riwa, “Tauai a ġoei da muriai wei babanina ma babaniana-meiei.”

33 Ma Paul ai boru i opu-tawanei ma boru i gudu.

* **17:18:** Mai Epicure rava wavana Epicurus ana viararamana i votaġotaġoi. I viararamana da lawana ana ano lamna nuaiaii. Da tau aiwai da tupuai ma matai ana rauoġara, e vivinuaiaiei. Ma aiwai da e virovorovoi bo iniviar e verevereia. Tau i wei lamna e ġeduġeduai. Tau i ririwa da God rava eġa ita vinuavainiei Stoic rava wavana Zeno ana viararamana e votaġotaġoi. I viararamana da rava ma ai maiteni au ririvata ta mamae (nature) ita vivirei, Tau ai ġoana ma ai erawa ita teretawanei ma ita vinuanotanota kaua ma avena rava ġelau ai agu ita raunenelei. Tau i ririwa, “Nuaiaii lamna kaua e vovoterei da mena ina tupua nei nanare ina tupua.” ✠ **17:24:** 1Ki 8:27; Act 7:48 † **17:28:** Epimenides Ciritei au 6 century BC. ‡ **17:28:** Aratus Silisiei 3 century BC.

³⁴ Wate ġelaui i vitumaġana ma Paul i votaġotaġoi. Tagogi lamna Dionisius, Areopagus boruna au orana, ma wavine wavana Damaris, ma rava ġelaui.

18

Paul i nae au Corinth da rava awari Iesu ita jimei

¹ Paul Athens i netawanei ma i nae au Corinth.

² Kampa Akwila tauna Jew au Pontus i tupua, marinaota au Italy * da i nei awana Prisila maiteni. Aubaina Rome ai gulau Claudius mai Jew anatapui i viaġaġei da Rome i opu-tawanei. Paul i nae da tau i ita inanai.

³ Paul tau i maiteni i mae, tau i tauampopo, (ġamoġamo opina ma gara i popopoi numa aubaina ma i gimagimarei) me Paul ai nola tagogina.

⁴ Sabate patapatana au pari numana tauna mai Jew ma Jentail awari i jima guratana da orai ita sinavirai.

⁵ Maranai Sailas ma Timothy au Masedonia da i ġetai, Marina Paul BADA riwana ava i raugugulei mai Jew awarii da Iesu tauna anina God ana Vinevine Keriso.

⁶ Wate mai Jew Paul i viġaviei ma riwa apoapoeni i ririwei. Ma tauna ana gara i rauabuabui ma awari i riwa, “Mepa da o kwako, lamna ona viwavu-melemi, eġa tau ona viwavuiul Marina da e nena, ana nae Jentail awari.”

⁷ Ma tau i voterei ma i nae Jentail wavana Titus Justus ana au numa i mae, tauna God tauviborumeina ma ana numa pari numana au ġereġerena.

⁸ Crispus, pari numana ai bada, BADA i vitumaġanei ana numa ravai maiteni, ma mai Corinth maġamaġau Paul i rautaniġanei, i vitumaġana ma i babataito.

⁹ Waguvara tagogi BADA Paul ana au inana i babani i pa, “Eġa ma rovo, ma babani ma eġa ma genuana.”

¹⁰ Aubaina Tau tam maiteni. Ma rava eġa ina rau-iviapoapoelem aubaina au tauvotaġotaġo i maġa wei au dobuna.

¹¹ Ma Paul kampa i mae madeġa tagogi ma nawaravi six, ma God riwana i jimei.

¹² Wate maranai Galio i vi-Gavena au Akaia provins, mai Jew kampa i vitagogiei ma Paul i vojijini ma i naei Gavena awarina da ita rauetarei.

¹³ Ma tau i viwavui ‘pa, “Wei orotona ana moruei rava orai e taitaini da God e viviborumei ma ata tarawatu e viviaigai.”†

¹⁴ Ma Paul gamona i laġi da ita babani ma Galio i babani mai Jew awari i pa, “Mepa da taumi wei ravana o viwivavui da kaua ġaeġaei bo kaua apoapoe aubaina, lamna tau au nola da ata rau-taniġanemi.

¹⁵ Wate wei taumi ami babani ami wava ma ami tarawatu, ana voterei au urami. Tau eġa wei kauai ana rauetarei.”

¹⁶ Ma etara numanei i viaġaġana-opunei.

* **18:2:** *Rome taon lamna taon ġaeġaena au Italy ma ai kapital AD. 49 au orana kampa viġaiġaiawa ġaeġaena da wavalatona Claudius mai Jew i riwei da dobuna i netawanei.* † **18:13:** *Mai Jew e ririwa da Paul eġa tau i vitumaġana oina ita viararamani ma wei Rome ai tarawatu i vianinei, wate e ririwa da Paul rava taparoro vouna e viararamani ma wei Rome ana tarawatu e viviaigai, lamna aubaina tau i goei da Rome ai bada Paul ina kovoġi. Ma inanai Act 16:20-21 ma 17:7.*

¹⁷ Tau i anatapui pari numana ai bada Sothenis i vojijini ma i vunui etara numana au naona wate Galio tau i 'nana-tawanei.

Paul i nae me au Antiok au Syria

¹⁸ Paul i mae mara aburuna tauvitumağana maiteni au Corinth ma wagei i nae au geregere au Cenkirei waga ai au animae. Prisila ma Akwila maiteni. Ma kampa Paul ana parivainuagana aubaina aparana i ġari, ma anatapui i nae au Syria

¹⁹ Tau i au Ephesus i ġeta ma Paul, Prisila ma Akwila i voterei. Ma i nae au boru numana Mai Jew awari i jima.

²⁰ Rava i vibağai da ita mae mara aburuna wate tauna eğa ita vianina.

²¹ Wate maranai i opu da ita nae ma tau i riwei, “Ana nememei mepa da God ana ġoana, ma Ephesus i netawanei ma wagei i damana.”

²² Maranai i ġeta au Caesarea ma i nae au Jerusalem da kerisiana i raugenari ma i nae au Antiok.

²³ Au Antiok i mae mara aburuna ma Galatia provins ma Pirijia provins i naeni ma kerisiana i vovai-virewapani.

Apolos mai Ephesus awari i raugugula

²⁴ Wei marana Apolos tauna Jew, au Alexandria da Egypt da i nei au Ephesus. Tauna BADA riwana ma ana giruma i aramana-kauei ma rava bababanina.

²⁵ Rava ġelaui, Apolos BADA ana etanai babanina, i viaramani, ma ana tepatorana i jima ma Iesu ana kaua ma ana lawana i viaramana-kauei. Wate tauna John Taubabataito ana babataito babani ava i aramanei.

²⁶ Ma i vikarei da ana tepatorana i raugugula au boru-numana. Wate maranai Prisila ma Akwila tauna ana babani i nonori. Ma i ġorei da maiteni i nae ai au numa ma BADA ana etanai ana babani i viaramana-kauei.

²⁷ Maranai Apolos i nenaie au Akaia, kerisiana Apolos i vovai-virewapani. Ma kerisiana au Akaia ai pepa i giruma da ita pariverei da tauna ita nebelei. Maranai au Akaia i ġeta ma tau i God ana aguei i vivitumağana, agu ġaeğaena i verei.

²⁸ Tauna ana babaniei au deba mai Jew i vovaiubai. Ma God riwana i vaia ma lamnei rava i viaramani da Iesu anina Keriso.

19

Paul au Ephesus

¹ Apolos au Corinth taon Akaia provins i mae, ma Paul ola i tağoni da au Ephesus i ġeta. Kerisiana ġelaui kampa

² ma i paridadanei i pa, “Arua vivivireina o vaia bo eğa maranai o babataito?”

Tau i paribelei i pa, “Eğa, Tauai eğa ata aramanei da Arua vivivireina e marnae.”

³ Ma Paul i paridadana, “Aiwai babaitona o vaia?”

Tau i paribelana, “John ana babataito a vaia.”

4 ✨Paul i riwa, “John ana babataito lamna mataira da tau i ai ḡo’apoapoelei i mae-tavirei; ma mai Israel i riwei da Tauna au muriu e nenei ona vitumaḡanei lamna Iesu.”

5 Maranai wei i nonori ma i aramanei tau i babataito BADA Iesu wavanei.

6 Ma Paul urana au kolai i terei ma Arua vivivireina au orai i rui. Ma i vikarei da pona tapunei i bababani ma God riwana i raugugulei.

7 Tau i nelara iavana twelve.

8 Paul i nae au boru-numana ma kampa nawaravi tonuḡa au orana ana tepatorana mai Jew awarii i bababani. Da rava orai ita sinavirai da BADA ana vigulau ita vitumaḡanei.

9 Wate ḡelau i kampa orai i bagibagi ma eḡa ita ḡoei da ita vitumaḡana, ma patara au matai Iesu ana etanai i vijiboḡi. Ma Paul tau i voterei ma kerisiana i taravaini ma i nae Tairanus ana au numa, ma kampa i viararamana ma i giugiu pompom.

10 Ma nanare i mae madeḡa ruaḡa i kwa, da mai Jew ma Jentail ravai maḡamaḡau i Eisia provins maemaei BADA riwana i nonori.

Sceva natunatuna

11 Ma God ana rewapanei Paul kaua ḡaeḡaei ma aniba i kaukauei,

12 lamna avena wate rava ai aḡesi da ai nola garai i naiei Paul awarina da i vodadani ma i naei da rava doridoriai i vodadani, ma arua apoapoei i opu-tawanei ma i lawana.

13 Mai Jew ḡelau i dobuna i naeni ma arua apoapoei i viviaḡana-opunei ma i raudadana Iesu wavanei da arua apoapoei i viviaḡaḡei. Tau i arua apoapoei i riwei i pa, “Iesu wavanei, taunei Paul e raraugugula, Tau a egarim da ma opu.”

14 Skeva, pirisi ai bada natunatuna nelarai seven wei kauana i kaukauei.

15 Wate mara tagogi arua apoapoena i paribelei, “Iesu a aramanei ma Paul a aramanei ma taumi aiavoi?”

16 Ma rava au orana arua apoapoena maemaena i auapai ma tau i vunui da eḡa ita vikalokaloei. Ai gara i sika-naei ma ana kovakovai ma tararatai numei i viopuopuana ma i viruberubei.

17 Mai Jew ma Jentail ravai au Ephesus maemaei wei riwana i nonori ma rovo orai i ḡaeni ma Iesu wavana i vivirana-kauai.

18 Maḡamaḡau i vitumaḡana ma i nae kerisiana awarii ma ai ḡo’apoapoe i rupeni.

19 Tau vitumaḡana voui maḡamaḡau paraparaumai,* ai buka i vidamni au deba ma i apui. Maranai bukai ai maia i ’avi da silver 50,000†.

20 Kaua babai me wei, Iesu riwana i vibabarai nai au dobuna ma rava maḡamaḡau i vitumaḡana.

21 Wei anatapuna au murina Paul au orana i vinua-notanota da au Masedonia da Akaia ita verautuini da ita damana au Jerusalem ma i riwa, “Ana nae au Jerusalem ma muriai ana nae da Rome ana inanai.”

22 Ma Paul ana tauagu ruaḡa Timothy ma Erastus i aiparitawanei au Masedonia provins, ma tauna kampa i mae mara aburuna au Eisia provins.

Vigaiḡaiawa au Ephesus

✨ 19:4: Mrk 1:4, 7-8 * 19:19: Au Deu 18:10-14 God ana rava e vivigaei da eḡa ina parauma.

† 19:19: Dracma coin tagogi lamna tau-vobagibagi ana maia au pom tagogi aubaina. Marina lamna million biaga.

23 Iesu ana babani ma ana kaua vouna aubaina, ma viġaiġaiawa ġaeġaena i tupua au Ephesus.

24 Silver taunoleina wavana Demetrius, mai Greek ai god wavinena ana numa taparoro kokoitau i rarau-ġaroġaro ei da i gimagimarei, ma wei nolana mane ġaeġaena e neinei i silver taunoleina nai au dobuna aubaii.

25 Ma tau i anatapu i ai rava nolana tagogina e kaukauei maiteni i rauġoreiai ma i riwa, “Au rava, o aramanei da ata maura wei nolanei ta vaivaia.

26 Ma o inanai ma o nonori menanare wei ravana Paul e kaukauei, Rava ai nota i sinavirai da maġamaġau god Artemis raudunena i voterei au Ephesus ma dobu Eisia paratana anatapuna. Ma e ririwa da ‘rava god i rauġaroġaro ei, lamna eġa god.’

27 Tauta tana inana kaua da wavata ma ata mane ani kauana eġa ina apoapoe. Ma ata god ġetelarana Artemis ana numa taparoro ma wavana eġa ina vijiboġi, eġa au Eisia provins ava ma dobu au anatapuna.”

28 Maranai patara wei babanina i nonori tau i meji kaua ma i vigaragarei, “Artemis mai Ephesus ai god i ġetelera!”

29 Ma tau i garagarara rava nai au dobuna i nonori ma tau i maiteni i garara labalababa. Anina ma patara Gaius ma Aristakas i vojijini tau i ruġai mai Masedonia Paul ana tauvigwanigwaniana, ma i rubana-naiei nai dobuna ana boru gabuna.‡

30 Paul i ġoei da patara au naoi ita rui da ita babani wate kerisiana eġa ita vianinei.

31 Wate nanare Paul ana rava ġelau i au gabemani tauna i viġaei da eġa ina nae au boru.

32 Patara i vinuanaina, i logologoi ma i garagarara labalababa ma eġa ita aramanei aiwai aubaina weka i nei.

33 Mai Jew oroto tagogi i dudu-opunei au naoi wavana Alexander ma patara ġelau i garara awarina da ita babani. Alexander urana i voepai da tau i ita genuana ma tauna ana rava aubai ita babani.

34 Wate maranai i aramanei da tauna Jew. Tau i anatapu i pona tagoginei wenanare i garagarara, “Tauta mai Ephesus ata god Artemis i ġetelera!” da *hour* ruġa i kwa.

35 Ma taon badana patara i riwei da i genuana ma i riwa, “Au rava mai Ephesus, rava anatapu i au dobu i aramanei da tauta tauvipaipai mai Ephesus ai god ġeġetelarana Artemis ana numa taparoro ma ana ġaima vivireina marei i peuai aubaina.

36 Eġa aiai wei ina vikaua-moruei. Lamna aubaina orami ina rauei ma eġa aiwai apoapoena ona kau ei.

37 Wei ravai o neiai weka wate tau i eġa au numa taparoro aiwai ita danenei bo ata god ita riwana-boei.

38 Mepa da Demetrius ana rava maiteni e viviwavui tau i ina nae ina rauetara ma ami viwavu ona naei kampa taurauetara awarina.

39 Ma mepa da ami nuabola ġelau i mamae lamna taon babadai ai au boru ona babanie i ma ona tere-jijimani.

‡ 19:29: Dobuna ana boru gabuna lamna numa ġaeġaena. Eġa poewana, ma inanana me nawaravi gebona. Rava maġamaġau 26,000, nanare ina kiala **meeting place**. Rava e nena kampa da kalo tapuna ma e raraubiġa.

⁴⁰ Ma amadodo aiwai i tupua, tau a rovo da ina viwavuita mae-boaboa aubaina. Wei vikaruwaḡawaḡana anona eḡa, ma mepa da Rome ina paridadana ma tauta menanare tana paribelananei.

⁴¹ Anina ma boru i gudui ma rava i vilamonei.”

20

Paul i nae au Masedonia ma Greece

¹ Vikaruwaḡawaḡa au Ephesus taon i kwa ma au murina Paul kerisiana i raukwatueiai da i vinua-terenei, i viegualaei ma i netawanei da i nae au Masedonia provins.

² Ma dobuna ḡaeḡaenana i naeni ma kaua maḡamaḡau kerisiana i vinua-terenei. Anina ma au Akaia* i ḡeta.

³ Kampa nawaravi tonuḡa i mae. Tauna i vokaukaua da ita nae au Syria ma wate i nelaḡai da mai Jew ḡelau i viraḡenana i viviogatarei lamna aubaina da i nae me au Masedonia.

⁴ Nelara ḡelau i votaḡotaḡo tau i lamna Piras natuna Sopater ana dobu Berea; Aristakas ma Sekundus, mai Thesalonika, ma Gaius tauna ana dobu Derbi; ma Tijikus ma Trophimus ai dobu Eisia provins; ma Timothy.

⁵ Tau i wagei i ainae au Troas ma kampa i painiai.

⁶ Ma palawa bagibagina torelana au murina, wagei Philipai taon au Masedonia provins a netawanei. Ma aupom 5 au murina au Troas a ḡeta ai rava awari, kampa aupom 7 a mae.

Au Troas, Paul Eutikus iraḡelei i vovaimairini

⁷ Wiki au karena - Sunday tauai a vitagogielai voepaepa ma BADA ana amgogona aubaina, ma kampa Paul i jima da nubautuva, aubaina maratomba da ita nae.

⁸ Numa vatavatara au tepana a vitagogielai, ma kampa rampa maḡamaḡau i ararata.

⁹ Orotu laragana wavana Eutikus au windo i kiakiala ma Paul i rauraugugula, ma tauna matana i pota kaua da i raunuavuru, ma kampa au tepa dewadewana i peu-ḡaira da au doa i rauei. Maranai tau i ḡaira da ita voepai, tauna irairaḡena.

¹⁰ Paul i ḡaira, i matave-tepani ma i rapai ma rava i riwei i pa, “Eḡa ona vinuabola, tauna lawalawaina!”

¹¹ Anina ma Paul i ḡae me au numa ma kerisiana maiteni BADA ana amgogona amna i ani ma awari i babani maratomb. Ma Paul nai dobuna i netawanei.

¹² Tau i laragana lawalawaina i naiei au numa ma rava orai i rauei.

Paul i amkuka au Miletus

¹³ Paul aenei i nae au Assos ma tauai i riwelai da wagei ana nae au Assos da tauna kampa ana vigerui.

¹⁴ Ma au Assos a vigerui ma a nae au Miletus

¹⁵ Maratomba bonabona Kios au ḡereḡerena a nae. Ma marana i tom au Samos a ḡeta, ma maratomb ḡela au Miletus a ḡota.

* **20:2:** Marina e ḡoreḡorei Greek.

¹⁶ Paul i ġoei da jijimanina ina nae ma avena ita rui au Ephesus, eġa ita ġoei da au Eisia provins ina mae-guratana. Tauna i vipaparana ma mepa da tagotagogina au Jerusalem ina ġeta muriai da Pentecost torelana.

Paul kerisiana au Ephesus i netawanei

¹⁷ Au Miletus Paul riwa i paritawanei au Ephesus taon kerisiana babadai awari da ita nebelei.

¹⁸ Maranai au Ephesus taon i ġetai ma tau i riwei i pa:

O aramanei au lawana menanare maranai vovounai weka au Eisia provins a ġetai.

¹⁹ Mai Jew i ġoei da ita rau-iviapoapoeleu wate tau a vilamolamona ma ana toutou BADA awarina a vivitaunola.

²⁰ O aramanei da maranai God Riwana Aiaina awarimi a raugugulei, riwa aiaina aniaguimi eġa ata tajijini. Au deba a raraugugula rava maġamaġau au naoi, ma ami au numa a viararamanimi

²¹ Riwa bagibagina mai Jew ma Jentail a verei, A riwei da ita rupena ma ita mae-tavirei God awarina ma Iesu ita vitumaġanei.

²² Ma marina Arua Vivivireina i riweu da ana nae au Jerusalem. Eġa ata aramanei kampa aiwai awariu ina tupua.

²³ Wate taon nununai awari a nena ma Arua Vivivireina e vivieġeu da amapo ina panu ma au deri ina tereu ma ina rau-iviapoapoeleu.

²⁴ Ma mepa da ina viragēni, wei lamna eġa kaua ġaēgaena tau awariu. Wate kaua ġaēgaena lamna BADA Iesu nola i verevereu da ana vikwai. Wei nolana lamna, God ana iviaiai maemaena, riwana ana raugugulei.

²⁵ Maġamaġaumi awarimi a nei ma God ana vigulau a raugugulei wate marina a aramanei da amadodo da i nena, naou eġa ona inana-melei.

²⁶⁻²⁷ God ana vilawana ogatarana rava aubaii eġa ata govaġi awarimi lamna aubaina riwa bagibaginei a ririwemi da mepa da rava au ba-bani eġa ina vitumaġanei ma ana lawana maemae-nonoana ina vine-boai, lamna eġa tau au wavu.

²⁸ Taumi babada ma ona paina-melemi, nanare tauvitumaġana tau aiavoi da Arua vivivireina au urami i teretereia. Ona inana-vaitetei me sipu taupainana ana sipu e paipaini. Taiu lamna God ana vinevine taranei i gimarai.

²⁹ A aramanei da ana nae ma au muriu tauraugugula morumorui ina nei awarimi ma rava ai tumaġana ina viapoapoeni, me auou moduei sipu au boruna viragēna aubaina.

³⁰ Ma rava ġelau ami au dam oina ina vomairi ma ina viararamana ma moruei rava orai ina taini da tau i na votaġotaġoi.

³¹ Lamna aubaina matami ina kala ma ona aramanei da madeġa tonuġa marai ma waguvarai a notanotaimi ma ana toutou a viararamanimi.

³² Ma marina God au urana a tereteremi. Ana agu e verevereoimi ona vivitumaġanei. Wei aguina e vovaivirewapanimi, ma ami pulo ina veremi, aubaina taumi God natunatuna viaiainai.

³³ Ma tau eġa rava ana mane bo ana purapura ata rauoġarei

³⁴ Taumi o aramana-kauēi da tau nimauei a nola da mane a vaia da tau au taubagibagi turau aubaii.

³⁵ Nanare, a viatataiemi da ona nola guratana da mane ona vaia ma molaka ona voagui. Iesu ana babani ega nuanuami ina vuru, Tauna i riwa i pa, “Verena i ai kaua ega me vainana.”

³⁶ Paul i babani vorovei ma anatapui i mae-gaira au doa ma i raupari.

³⁷⁻³⁸ I vinolanola i pa, “Amapo ega naou ona inana-melei.” Wei riwana i vinuabolai da i vitouana, Paul i taragwabai ma i vigia-laḡolaḡonei. Ma i naiei da au waga i vigeruei.

21

Paul ana vaḡai au Jerusalem

¹ Ephesus kerisiana babadai a viegualaei ma wagei jijimanina a nae au Cous bonabonana ma ubaubanai a nae au Roudes bonabonana, kampa da a damana au Patara taon.

² Weka waga ḡelauna i nenaie au Phonisia a gerui,

³ da au Saipras bonabonana a rubatawanei, au kelakelauai da a nae au Taia au Syria provins a ḡota, da purapura ita viopuni.

⁴ Kampa tauvitumaḡana a baiei ma aupom 7 maiteni a mae. Arua Vivivireina kerisiana i riwei da Paul awarina aiwai ina tupua, ma lamna aubaina Paul i viḡaei da ega ina nae au Jerusalem.

⁵ Ma mara i ḡetai da ata vomairi, kerisiana awawai maiteni da natunatui taon i voterei ma anatapuiai a ḡaira au gera, a raupari gogona.

⁶ A viegualau da tauai au waga a geru ma tau i nae-me ai au numa.

⁷ Au Taia ma a nae au Tolerais taon a ḡeta. Tauvitumaḡana kampa a nebelei ma aupom tagogi maiteni a mae.

⁸ ✧ Ma marana i tom ma dobuna a voterei ma a nae au Caesarea, kampa God riwana taujimeina Philip ana au numa a mae, tauna oroto vi-7-na au Jerusalem i vinevinei da lam taupainina.

⁹ Tauna natunatuna waivinei 4 ega tavitavinei, tau i God ana riwa i vivieḡai rava awari.

¹⁰ ✧ Aupom vomaḡai i kwa, kerisiana wavana Agabas, tauna nanare God riwana i vivieḡai, Judeaei i ḡairai au Caesarea.

¹¹ Ma i nei awariai da Paul ana tairoro i vaia ma tauna urana ma aena i raḡina-melei ma i riwa i pa, “Arua Vivivireina e ririwa, da Jew babadai wei tairorona taniwagana wenanare ina raḡini, ma Jentail au urai ina terei.”

¹² Maranai wei riwana a nonori, tauai kerisiana ḡelaui maiteni Paul a vibaḡana-guratei, da avena ita nae au Jerusalem.

¹³ Wate i pa, “Aiwai aubaina o vivitouana ma orau o viviapoapoeni! Tau a vokaukaua nonoa da ina raḡiniu, wate ega lamna ava ma ina virageniu au Jerusalem, BADA Iesu a vovotaḡotaḡoi aubaina.”

¹⁴ Tauai a viḡaei ma ega tagotagogina da nuanuana ata sinavirai lamna aubaina riwanana a voterei ma a riwa a pa, “BADA ana ḡoanei nanare ina tupua.”

¹⁵ Wei au murina a vokaukaua ma a vomairi au Jerusalem.

¹⁶ Kerisiana ḡelaui mai Caesarea I naielai Nason ana au numa ma kampa a mae. Tauna oroto Saiprasiei, ma Iesu votaḡona i vikareni maranaina rava vovounai i vikarei da Iesu Riwana Aiaina i rarau-gugulei.

Paul, James i raugenari

¹⁷ Maranai au Jerusalem a ġeta kerisiana ana nuaiaii i nebelelai.

¹⁸ Maratom ġela Paul maiteni a nae da* James a raugenari,† dogadogara anatapui kampa.

¹⁹ Paul tau i viegualauei ma ana au vaġai God aiiwai i kaukauei Jentail awari anatapuna tau i pariverei.

²⁰ Maranaina wei riwai i nonori, tau God i voepaepai ma Paul i riwa i pa, “Turaiai u aramanei mai Jew ai maġa tausan nanare weka Iesu e vivitumaġanei, ma God ana tarawatu e vovotaġo-kauei.

²¹ Wate rava Jew kerisiana weka au Jerusalem am kaua i vibenabenaie, da tam Jew Jentail maiteni e mamae e viararamani da Moses ana tarawatu ina gedugeduaie. Ma u riwei da natunatui ini eġa ina bori ma ai kaua ġelaui eġa ina votaġotaġoi.

²² Tau i aramanei da tam u ġetai, Marina aiiwai tana kauiei?

²³ Aiwei a ririwemi ona kauiei. Au nelara 4, tau parivainuaġana bagibag-ina God awarina i kauiei.

²⁴ Ma taravaini ma ona nae au Tempol ma ona viaiaina-melemi ma ma vimaia da tau ai viaiaina pulona ina kauiei. Anina ma tau kolai ina ġari ma rava anatapui ina aramanei da tam Moses ana tarawatu anina e vovotaġotaġoi, ma babani au naona lamna anatapuna moru kaua.

²⁵ *Ma Jentail marina i vivitumaġana aubaii pepa a girumi ma wenanare a riwei, sia e pulopuloei kokoitau awarii eġa ina ani, Tara eġa ina umai, Rava ġamoġamo uai e kikiki tarai eġa ita toi-tawanana, eġa ona ani. Eġa ona viawawana labalababa.”‡

²⁶ Anina ma marana i tom Paul nai nelara 4 maiteni i viaina-melei God au matana. Muriai Paul i rui Tempol au orana ma i vinolanola pirisi awarii da mara aiiwai tau ai viaiaina ina voterei. Ma maranaina pulo ita terei tau tagotagogi ava aubai.

Paul i pani.

²⁷⁻²⁹ *Ma aupom 7 aburuna ava da ita kwa ma Jew ġelaui au Eisia provins maemae tau Paul i ’nanai Tempol au orana. Au naonei tau Paul i ’nanai oroto Ephesusei wavana Trophimus maiteni, au taon i bababara ma i notai da tauna Trophimus i ruiei Tempol au orana. Tau Paul i vojijini ma i garara i pa, “Nelara mai Israel ona nei, ona voagui! Wei orotona dobu anatapuna e nenaeni ma rava anatapui e viararamani da mai Jew ma ata tarawatu ma Tempol i parivirevirei. Tauna Jentail i neiai gabuna au vivivireina ma i tuvaideoedoei God au matana!”

³⁰ Ma rava anatapui i nonori da au Tempol viġaiġaiawa i tupua ma anatapui kampa i ruba. Ma Paul i vojijini ma i taina-opune i au doa ma Tempol metaetana i gudui.

* **21:18:** Wei lamna Iesu ana tevera. Act 12:17; 15:13 ma Mrk 6:3 † **21:18:** Mane anatapui ai au vaġai i tami bo rava i puloi i verei damanai mane taupainina i verei ☆ **21:25:** Act 15:29 ‡ **21:25:** Viawawana labalababa wei anatapuna e vaivaipai: Rava ġela awana oroto bo wavine maiteni e viawawana (Exo 20:14, Deu 5:18); Rava ġela maiteni e viawawana mane bo purapura aubaina (Lev 19:29, 1 Cor 6:15); Natuoim maiteni e viawawana, me oroto natuna wavinena maiteni bo wavine natuna orotona maiteni (Lev 18:6); Orotu ma oroto bo wavine ma wavine e viawawana (Lev 18:22, Rom 1:26-27); Rava ma ġamoġamo e viawawana (Lev 18:23); Rava ġela, eġa awaoim maiteni e viawawana (Eph 5:3); Rava ġelaui e gaegari da maiteni ma viawawana. (Gen 34:7, Deu 22:25-28). ☆ **21:27-29:** Act 20:4

³¹ Maranai tau Paul viraġenana i kaukauei, Mai Rome sorodia ai bada ġaēgaena i nonori da viġaġaiawa ġaēgaena i tupua au Tempol.

³² Tauna laġilaġina ana sorodia ma ai babada i vaini ma i ruba kampa, maranai rava tau i 'nanai, Tau Paul vunwana i voterei.

³³ Sorodia ai bada i nei Paul awarina da i vojijini ma ana sorodia ruaġa i riwei da seinei Paul urana au urai i pani jijini. Anina ma tauna patara i vitara-virevirei i pa, “Wei aiai orotona? Aiwai i kauēi?”

³⁴ Patara au orana rava ġelaui babani tagogi i gararei, ma rava ġelaui babani tapuna i gararei. Rava were da nare i garagarara da sorodia ai bada menanare ita nelaġai ġaiawa karena aiwai, lamna aubaina ana sorodia i egari da Paul ita naiei, ai au bareki.

³⁵ Maranai Paul bareki tetena i tutuġereġerei, patara i ġaiawa guratana aubaina sorodia Paul i voepai da i avarai da ita gagaloei.

³⁶ Patara amapo da tau i vovotaġotaġoi ma i garagarara i pa, “Ona viraġeni, ona viraġeni!”

Paul patara awarii i babani.

³⁷ Maranai tau aburuna ava da au bareki ita rui, Paul Greekei sorodia ai bada i riwei i pa, “Anina bo eġa da awarim ata babani?”

Ma tauna i auepai ma i riwa i pa, “Tam Greek u aramanei bo?”

³⁸ Tau a notai da tam Egyptei, rorova ai babada u viġaviei, Ma rava 4,000 orai potapotai u opunei au mutulua, Tam nai ravana bo?”

³⁹ Paul i paribelana i pa, “Eġa! Tau Jew ei, au taon Tarsus a tupua, au Silisia provins, a vivibaġaim da rava awari ana babani.”

⁴⁰ Tauna i vianina ma Paul au tete i mairi. Tauna urana i voepai da patara garara i voterei. Maranai tau i genuana, Paul tau awarii ai ponanei i babani i pa.

22

¹ “Amamau ma varevareiu, ona rautaniġaneu ma ana viatataiem i tau eġa aiwai ata kauana-boai.”

² Maranai patarana Paul i nonori da tau i ponei i bababani, tau i genuana ma i rautaniġana.

³ ✨ I riwa:

Tau Jew ei, Tarsus au Silisia provins a tupua wate weka au Jerusalem a rata ma a giruma. Amamata ai tarawatu a girumei ma au tauviararamana Gamaliel.^{*} A ġoana-guratei da God ata voepaepa-kauēi me taumi anatapumi nanare.

⁴ ✨ Tau Iesu ana etanai tauvotaġotaġoina a rau-ivipoapoelei da ġelaui i'raġe. Nelara ma waivine a pani ma au numa panipani a tawana-ruiēi.

⁵ Pirisi ġeġetelarana ana boru ġeġetelarana[†] maiteni i aramanei da tau a ririwa kaua. Tau i vianina pepana i vereu da ai rava au Damaskas ata verei ma a nae au Damaskas da kerisiana ata pani ma a neiai da kovoġa ita vaia weka au Jerusalem.

⁶ Aubenai Damaskas a tuġereġerei ma maratagogi lalaina gamrina ġaēgaena marei i ġairai da i tunuiāi.

⁷ A peu au doa ma pona a nonori i pa, “Saul! Saul! Aiwai aubaina e rarau-ivipoapoeleu?”

✨ **22:3:** Act 5:34-39 * **22:3:** Gamaliel tauna tauviararamana ma rava aiaina Paul ana au mara. Tauna Pharisi ma boru ġetelarana (Sanhedrin) au orana. ✨ **22:4:** Act 8:3; 26:9-11 † **22:5:** Sanhedrin

⁸ Tau a paribelei, “Bada tam aiai?”

Tauna i paribelei, “Iesu Nasaretei e rarau-iviapoapoelei.”

⁹ Rava maiteni a nena lalalaina i 'nanai wate babani ega ita nonori.

¹⁰ A paridadana a pa, “Bada Aiwai ana kauai?” Ma Tauna i riwa i pa, “Ma vomairi ma nae au Damaskas. Kampa rava am nola ina pariverem.”

¹¹ Lalalaina gamrina i rata guratana ma matau i kamoi da ega ata inainana. Ma tauwigwanigwaniana au urai i voa ma i naieu au Damaskas.

¹² Oroto wavana Ananias kampa i mae tauna God i voepaepai ma ana tarawatu i vovojijina-nonoei. Mai Jew tauna i vivirana-kauai.

¹³ I nei da au ririvau i mairi ma i riwa, “Vareiu Saul ma inana me!” Nai marana a inana me.

¹⁴ Anina ma i riwa, “Amamata ai God i rautanim, da ana goana ma aramanei, ana Taunola Jijimanina[‡] - matamei ma inana, ma riwana tanigamei ma nonori.

¹⁵ Aiwai u inainana ma u nononori ma vimatematei rava anatapui awarii.

¹⁶ Marina aiwai e paipaini! Tauai ana babataitoim ma BADA awarina ma raupari da am go'apoapoei ina oga-tawanei.”

¹⁷ Anina ma a nae au Jerusalem. Au Tempol a raraupari ma matauei kaua a inana.

¹⁸ A inana BADA awariu i bababani i pa, “Rava weka am jima tau aubaiu ega nonorana ita goegoiei. Lagilagina Jerusalem ma opu-tawanei.”

¹⁹ Wate tau a paribelei, “BADA wei ravai i aramanei da pari numai a nepai da kerisiana a vunui ma a pani-naiei.

²⁰ ✱Ma maranai am peroveta Stephen tarana i toi, tau kampa a maimairi ma ana ira e a vianinei ma gaima tautawanai ai gara a paipaini.”

²¹ Ma BADA i riweu, “Ma nae a paripari-tawanem aueia Jentail awarii.”

Paul e ririwa da tauna Romei

²² Patarana Paul i rarautaniganei ma maranai wei babanina i kauai tau i meji guratana ma i vigaragararei i pa, “Ona vira ega-tawanei, ega ina mael!”

²³ Tai i vigaragararei, ai kwama i kwajikwajiei ma pokau i tawatawanei awarina.

²⁴ Ma sorodia ai bada sorodia i egari da Paul i naiei ai au bareki. Ma i riwei da Paul ita wipi da ita viega aiwai aubaina ana rava amloi i gai ega ma awarina i garagarara.

²⁵ Ma urana rua e terepai au aidamo ma i ragira ega i ita wipi ma Paul sorodia ai bada i riwei i pa, “Tau Rome-ei, Ega ota etareu ma o vunuvunu-labalababaiu. Lamna menanare?”

²⁶ Maranai sorodia ai bada wei i nonori ma i nae da ai bada ega ega ina i parivere. Ma tauna i vitara-virevirei i pa, “Aiwai e kaukauai? Wei ravana Rome-ei!”

²⁷ Sorodia ai bada i nae Paul awarina ma i paridadanei, “Ma riweu! Riwa kaua da tam Rome-ei bo?”

Ma Paul i paribelei, “Ee, lamna riwa kaua!”

²⁸ Sorodia ai bada Paul i riwei, “Tau mane ega ega ina Rome gabemanina a verei da a vimai Rome.”

Paul tauna i riwei, “Tau a tupua da Rome-ei.”

[‡] 22:14: Rava Jijimanina bo bulobulona, lamna Iesu wavana. Paul ega Iesu wavana ita latoni mepa da taurautanigana mai Jew ita viamlogaigaini. ✱ 22:20: Act 7:58

²⁹ Sorodia i ġoei da Paul ita etarei wate maratagogi ita ġori-melei. Ai bada ita ġori ma i rovo-kaukaua maranai i aramanei da i kauana-boai da Paul, Rome-ei seinei i pani.

Paul Jew ai boru ġetelarana^S au naoi i mairi.

³⁰ Au maratamna sorodia ai bada i ġoei da ita aramana-kauei mai Jew ai viwavu aiwai Paul awarina. Ma lamna aubaina Paul ana seinei i votawatawanei ma i opunei boru ġetelarana au naona i vimairini.

23

¹ Paul boru ġeġetelarana i 'nana-jijini ma i riwa, "Varevareiu tau au nola God awarina i jijimana ma orau aiaina da wei paratana."

² Ma Pirisi ġeġetelarana Ananias rava ġelauna Paul au ririvana i maimairi i egari da Paul i raunavanavai.

³ Ma Paul Ananias i riwei, "God ina raunavanavaim, tam morumorum! Moses ana tarawatuei e rarauetareu wate maranai am rava u riwei da i raunavanavaiu tam tarawatu u viaigai."

⁴ Tau Paul au ġereġerena i maimairi Paul i riwei, "Aiwai aubaina God ana Pirisi Ġetelarana e vivijiboġi?"

⁵ Paul i paribelei, "Varevareiu eġa ata aramanei da tauna God ana Pirisi ġeġetelarana. Au buka i terei da *Eġa God ana taunola ma parivai-apoapoeni.*" (*Exodus 22:27*)

⁶ ✱Anina ma Paul i 'nanai da Sadusi ma Pharisi ġelau kampa ma ponana i rata ma i riwa, "Varevareiu tau Pharisi, amau maiteni Pharisi. A vivitumaġana da God rava iraġelei ina vovaimairini wei lamna aubaina taumi o etaetareul!"

⁷ Maranai wei i latoni Pharisi ma Sadusi vipariparinigai i raukarei ma boru i kai da ruaġa.

⁸ ✱Aubaina Sadusi e ririwa da rava e irairaġe lamna eġa ita vovomairi me, ma anela da aruarua eġa ita vivitumaġanei, wate Pharisi wei anatapui e vivitumaġanei.

⁹ Ġaiawa ġaeġaena i tupua ma tarawatu babadai ġelau tau Pharisi, i vomairi ma i babani guratana i pa, "Tauai eġa aiwai apoapoena ata inanai wei ravana awarina! Mepa da anela bo Bada Aruana tauna awarina i babani?"

¹⁰ Viġaiġaiawa ġaeġaena i tupua ma sorodia ai bada i rovo mepa da rava Paul ina viaisikasikai ma sorodia i egari da i rui ma Paul i taravaina-opunei ma ina naieiau bareki.

¹¹ Ma waguvarai ġelauna, BADA Paul au ririvana i mairi ma i riwei, "Tepam ina tora! Me aubaiu u jima au Jerusalem nanare aubaiu au Rome ma jima."

Mai Jew i vioga da Paul ina viraġeni

¹² Ubaubani mai Jew ġelau i vitagogiei ma i viogatara ma i parivainuaġana da eġa ina am bo ina uma da Paul ina viraġeni.

¹³ Nelara 40 nanare i vianina da Paul ina viraġeni.

¹⁴ Tau i nae pirisi babadai ma dogadogara awarii ma i riwei, "Tauai parivainuaġana bagibagina a kauei da eġa ana am da Paul ana viraġeni."

15 Taumi Boru ġeġetelarana maiteni ona moru ma riwa ona pari-tawanei sorodia badana awarina da Paul ina neiai ma ona vitara-virevirei da riwa kaua ona vaia. Tauai ana vipaipai da ana viragēni muriai da weka ina ġetai.

16 Wate maranai Paul avuna wei ogatarana i nonori ma i nae sorodia ai au bareki ma Paul i pariverei.

17 Ma Paul sorodia badana i ġoreiai ma i riwei, “Wei laragana laġilaġina ma naiei ami bada awarina da ana riwa ina riwei.”

18 Ma i naiei ai bada ġaeġaena awarina ma i riwei, “Panipani wavana Paul riwa i paritawanei awariu ma i riweu da wei laragana ata neiai awarim aubaina am riwa awarina.”

19 Sorodia ai bada ġaeġaena laraga i vinimavoai ma imaeria ma i paridadanei, “Am riwa aiwai ma riweu?”

20 I riwa, “Mai Jew i riwa da ita vibaġaim da au maratoma Paul uta naiei ai au Boru ġeġetelarana, Wei anatapuna moru.

21 Wate eġa ma rautaniġanei aubaina rava 40 nanare pota e paipaini da ina viragēni. Tau i vioga da eġa ina am da Paul ina viragēni. Tau i vokaukaua ma am vianina ava e paipaini.”

22 Ma bada laraga i riwei da eġa aiwai ina riwei ma i paritawanei.

Tau Paul i paritawanei Gavena Felix awarina.

23 Anina ma sorodia ai bada ġaeġaena babada ruaġa i ġoreiai ma i riwei, i pa, “Sorodia sod ravai 200, aiera ravai 200 ma hos ravai 70 ma vaia ma ona vokaukaua da waguvarai 9 oklok ona vomairi.

24 Hos biaġa ona vaia Paul aubaina da aiaina ona naiei gavena Felix awarina au Caesarea.”

25 Ma sorodia ai bada pepa wenanare i girumi:

26 Tau Claudius Lisias, a girugiruma awarim au bada vinualaulaunam, Gavena Felix.
Egualau.

27 Mai Jew wei orotona i vojijini ma ita viragēni, wate maranai a nonori da tauna Rome-ei ma lamna aubaina au sorodia maiteni a opu da au urai a vaitawanei.

28 A ġoei da ata aramanei ana apoapoe aiwai, da ata naiei ai Boru ġeġetelerana awarina.

29 Ma a nelaġai da viwavuna lamna tauiva ai tumaġana kauai ma Rome ana tarawatuei lamna tauna eġa aiwai apoapoena ita kauai da ata viragēni bo ata pani.

30 Maranai riwana a vaia da mai Jew i ġoei da govagovaġanei tauna ita vunui. Lamna maratagogi a paritawanei awarim, ma nanare tauviwavu a riwana-guratei da kampa ina ġetai da ai viwavu ina kauai.

31 Ma sorodia ai babada i ririweia nanare i kauai ma waguvarai Paul i taravaini ma i naiei da au taon Antipatris i ġeta.

32 Au maratoma aiera ma sod sorodjai i naeme au Jerusalem ma hosi sorodia Paul i naei au Caesarea.

33 Maranai hosi sorodjai au Caesarea i ġeta pepana ma Paul gavena i veredamanei au urana.

34 Gavena pepa i 'avi ma Paul i paridadanei metauna provins-na u tupua ma i riwa, “Silisia.”

35 Gavena i riwa i pa, “Am etara ana nonori maranai am tauviwavu ina ġetai.” Ma sorodia i naiei Herod numa i voavoiana da ita inana-vaitetei.

24

Paul Gavena Felix au naona i mairi

¹ Aupom 5 au murina Pirisi ġeġetelarana Ananias ma dogadogara i ġaira au Caesarea ai taurauetara wavana Tertelus maiteni.

² Ma Paul i ġoreiai gabemani au naona. Ma Tertelus i vomairi ma viwavuna i vikarei:

Au bada Felix *vinualaulaunam, Am vibadanei ta mae ubauba ma ata nota eġa aiwai. Ma kua voui ma aiaii u kaukaui ata dobu voana aubaina i voagu-kaueta.

³ Anatapui mepamepa a mamae a vinuaii kaua tam awarim.

⁴ Wate eġa ata ġoei da ana visina-viraviraim. Ma lamna aubaina a ġoeġoei da uta rautaniġaneu mara aburuna ava.

⁵ Tauai a nelaġai da wei ravana lamna orana potapotana ma viġaiġaiawa tauvikareina mai Jew awarii dobu au anatapuna. Tauna boru vouna e ġoreġorei mai Nasaret[†] ai bada.

⁶ Tai i ġoei da Tempol maiteni ita tuvaideoei ma lamna aubaina a pani.

⁷ ‡

⁸ Ma rautarei ma ma nelaġai da ai viwavu lamna anatapui riwa kaua.

⁹ Ma mai Jew Tertelus au murina i mairi ma i riwa, “Wei babani anata-pui riwa kaua!”

¹⁰ Anina ma Gavena Felix Paul i raumotemotei da ita babani. Paul babani i vikarei i pa:

Au bada vinualaulaunam, a aramanei da tam madeġa biġa wei dobu ai taurauetara lamna aubaina tau ana nuaubau ana babani aubaiu.

¹¹ Am rava ina riwem da tau pom ota aupom 12 nanare a ġeta memei au Jerusalem da BADA ata voepaepai.

¹² Au tauviwavu eġa ita nelaġaiu ata viġaiġaiawa au Tempol bo au boru-numana bo mepa nanare au Jerusalem.

¹³ Ma ai viwavu tau awariu menanare tana aramanei da lamna riwa kaua?

¹⁴ Wate riwa kaua da tau amamata ai God a voepaepai ma BADA Iesu ana etanai, a votaġotaġoi ma tai e ririwa da wei lamna taparoro morumoruna. Wate nanare Moses tarawatu i girugirumi ma God ana peroveta nununai i girugirumia anatapuna a vitumaġanei.

¹⁵ Tau God awarina a vitumaġana guratana me ravai nanare, da tauna muriai rava anatapui iraġelei ina vilawana-melei, ravai aiaii ma rava apoapoei.

¹⁶ Lamna aubaina a kaukauana guratei da orau ina ai rava ma BADA awarii.

* **24:2:** *Felix ana au vibadana lamna eġa ita ai. Tertelus lamna Felix i gwalagwalamerui da Paul ita viwavi ma ita pani. Felix rava vita ġaeġaei i verei da madeġa ruaġa i kwa Sisaei Nero wei ravana i viopuni. Ġavia ġaeġaena i tupua ma Jew Rome i viġaviei ma taii Jerusalem i rikai da eġa aiwaina ita mae.*

† **24:5:** *Wava Nazarene lamna Iesu ana tauvotaġotaġoi e babaniet aubaina tauna Nasaretei. Maranai Tertelus taii e ġorei Nazarene Lamna Kerisiana e vivijiboġi. Jew Jerusalem ei ma Judea Provins anatapuna mai Galili provins ravai e inainana ġairei, (John 1:46 ma iavi). Tauna wate e ririwa da menanare Paul e tapataparoro nei lamna mai Rome ai tarawatu e viviaigai. ‡ **24:7:** Verse 7 lamna buka waduwaduboi biġava au orana e mamae, wate buka Greek ponanei i girugirumi maġamaġgai wei ves-na au orana eġa.*

17 ☆Jerusalem a netawanei madeğa biağa i kwa ma pom ota a nememei

da molamolakai ata puloi ma pulo ata kauēi God awarina. §

18 Tau aiāiu, maranaina i nelağaiu au Tempol viaina pulona a kaukauei. Eğa patara maiteni ma eğa visinaviravira.

19 Wate mai Jew ġelauī Eisia provinsei i nei kampa. Taii mēpa marina! Ita nei au naom da ai viwavu ita terei.

20 Bo babada weka ita riweta au apoapoe aiwai maranai boru ġeġetelarana au naona a mairi.

21 ☆Wate mēpa da maratagogi awarii a garara a pa, “A vitumağana da God rava anatapui irağelei ina vovaimairini! Lamna aubaina tau weka a maimairi.”

22 Felix tauna BADA Iesu ana Etanai riwana i aramana-kauēi, boru i gudui ma i riwa, “Maranai sorodia ai bada Claudius Lisias ina nei, ma ina paribelem.”

23 Ma sorodia ai bada i egari da Paul ita inana-vaitetei ma ita voterei da ita bababara ma ana rava ita nei da ita raraugenari.

Paul Felix i viararamani

24 Aupom biağa au murina Felix awana Drusila maiteni i nei. Drusila lamna wavine Jew ei. Ma riwa i paritawanei da Paul i neiai, ma rava ai tumağana Iesu Keriso awarina i babaniei ma Felix i rautaniğana. *

25 Wate maranai Paul babani i vikarei da God ana ġoana, da rava lawana aiaina ma jijimanina ina maeni, ma erawa kauai ma ġo’apoapoe ina geduaiei, aubaina mara e nenei maranai rava anatapui ina etarei. Felix wei babanina i nonori tauna i rovo ma Paul i riwei, “Ma nae! Ma maranai ana ġoem lamna ana kwatuem.”

26 Ma Felix i ġoeğoei da Paul tauna manelei ita gwalai ma lamna aubaina mara i mağa i raukwatuei ma awarina i babani.

27 Madeğa ruağa au murina Felix i rautom ma ana gabu Posias Festus i vaia. Felix i ġoei da wavana ita ai mai Jew awarii lamna aubaina Paul au numa panipani i votere-tawanei.

25

Paul i vibağa da Sisa au naona ita mairi

1 Festus i ġeta au Caesarea da ana nola ita vikarei ma aupom vitonuina i ġae au Jerusalem.

2 Weka pirisi ġeġetelarana ma dogadogara Festus i nebelei ma ai viwavu Paul awarina tauna i verei.

3 Ma Festus i vibağai da ita voagui da Paul ita paritawanei au Jerusalem. Taii ava i vioga da Paul au etanai ita virağeni.

4 Wate Festus i paribelei i pa, “Paul au deri au Caesarea ma tau a ġaiğaira me kampa aupom ruağa au murina.

5 Mēpa da Paul aiwai i kauana-boai lamna ami Babada maiteni ana ġaira da kampa ami viwavu ina terei.”

☆ **24:17:** Act 21:17-28 § **24:17:** Madeğa 5 i kwa ma Paul i nememei au Jerusalem da ita mae mara aburuna da tauvitumağana ita vovaivirewapani ma ana babara ma nolana aiaina ita virarautuei. (Act 18.22) ☆ **24:21:** Act 23:6 * **24:24:** Mēpa da Drusila Jew wavinena awarinei Felix wei ravai e ġoreğorei tauvitumağana i aramane. Drusila lamna Herod Agrippa natuna guguinina umauna ana madeğa 20. Tauna wavalatona Siriei i ravaği wate i voterei maranai ana madeğa 16 da Felix i ravaği. Wei lamna ana tavine viruiaina ma Felix ana tavine vitonuina.

⁶ Aupom 8 da 10 nanare au murina Festus i ġaira me au Caesarea ma maratomma au numaetara i kiala ma ana sorodia i eġara da Paul ita ruieiai au naona.

⁷ Maranai Paul i ruieiai, ma Jew babadai Jerusalem ei i ġairai i nei awari ma ina viwavui, kaua maġamaġau apoapoei aubaii. Wate tau i viwavu anatapu anona eġa.

⁸ Paul wei *viwavui i vinua-nainei ma i pa, “Tau eġa aiwai apoapoena ata kau i mai Jew ai tarawatu awarina bo ai Tempol awarina bo Caesar awarina.”

⁹ Wate Festus i ġoei da mai Jew ita vinuaini lamna aubaina Paul i paridadanei i pa, “E ġoeġoei bo eġa da tana ġae au Jerusalem ma etara?”

¹⁰ Paul i riwa, “Tau marina Caesar ana au etara gabuna a maimairi, weka ina etareu. Tam u aramana-kau i da tau eġa aiwai apoapoena ata kau i mai Jew awarii.

¹¹ Wate mepa da aiwai apoapoena a kau i lamna ma viraġeniu. Tau eġa iriġe ata rovoei. Wate mepa da wei lamna viwavu moru lamna eġa aiai ana rewapana ita mamae da ina veredamaneu. Tau a vivibaġa Caesar awarina!”

¹² Festus Caesar ana dogadogara ai nota i vaia ma i paribelana i pa, “Tam u vibaġa Caesar awarina, Anina Caesar awarina ma nae.”

Festus Paul ana babani gulau Agrippa i pariverei

¹³ Aupom biaġa au murina gulau Agrippa[†] novuna Benisi maiteni i nei au Caesarea da gavena vouna Festus i raugenari da ita viegualaei.

¹⁴ Ma i mae aupom vomaġauna ma Festus Paul i rarauetara gulau i pariverei i pa, “Felix panipani tagogi weka i voterei.

¹⁵ Ma maranai a nae au Jerusalem mai Jew ai pirisi babadai ma dogadogara ai viwavu i neiai awariu ma i vibaġaiu da Paul ata viraġeni.

¹⁶ —Ma a riwei da tauai mai Rome ai tarawatu e ririwa da eġa rava ana kovoġa labalababai da au naona ana rauetarei. Tau i na ġetai da ai viwavu taurauetara au naona ina mairi da ina gagaloana-melei.

¹⁷ Maranai tauviwavu maiteni weka a ġetai. Tau eġa ata vipaipai ma maratomma a eġara da ravana i neiai da ita etara.

¹⁸ Tauviwavu i vomairi ma a notai da aiwai apoapoena aubaina ita viwavui wate eġa.

¹⁹ Anina kaua biaġa ava ai taparoro kauaii, ma rava tagogi irairiġena wavana Iesu i vitarapiriei. Wate Paul e ririwa da Iesu lawalawaina.

²⁰ Tau nuanuau i raġaraġa menanare riwa kaua ana vainei ma Paul a paridadanei da i vianina da maiteni ata ġae au Jerusalem da kampa ata etarei.

²¹ Wate Paul i vibaġa da Caesar ana viwavu ina rautaniġanei. Ma sorodia a eġari da au numa panipani ina paini da ana paritawanei Caesar awarina.”

²² Ma Agrippa Festus i riwei, “A ġoei da ravana ana babani ana rautaniġanei.”

Ma Festus i paribelei, “Anina, au maratomm ma rautaniġanei.”

Gulau Agrippa Paul i rautaniġanei

* **25:8:** Paul au Tarsus i tupua wate tauna wavana Rome gabemanina awarina. Lamna aubaina tauna ana rewapana e mamae da ana nuabola ina naiei au Rome da Caesar ina rauetarei. † **25:13:** Wei lamna Herod Agrippa 11, Herod Agrippa 1 natuna.

²³ Au maratamna gulau Agrippa ma Benisi gulau garai i oteni ma ana gabemani babadai gaegeae maiteni, i arana-ruiei au boru numana. Festus ana sorodia i egari da Paul i ruiei.

²⁴ Festus i riwa, “Gulau Agrippa ma anapapumi o rieiai weka, wei ravana o inainanai! Tauna mai Jew au Jerusalem ma weka au Caesarea e goegoei da ina iraḡe.

²⁵ Wate tau a nelaḡai da tauna eḡa aiwai ita kauana-boai da ina iraḡe. Wate i vibaḡa da Caesar tauna ina rauetarei. Lamna aubaina a pariparitawanei Caesar awarina.

²⁶ Wate Caesar aiwai ana riwei, eḡa ata aramanei aiwai ana girumi? Lamna aubaina a neiai awarimi ma tam gulau Agrippa maiteni da tana babaniei da nota ona vereu da aiwai ana girumi.

²⁷ Aubaina eḡa ita ai da panipani ana paritawanei Caesar awarina ma ana viwavuna eḡa!”

26

Paul ana gudu i tarai

¹ Ma Agrippa Paul i riwei, “A vianinem da ma babani.” Ma Paul urana i voepai ma ana gudu tarana i vikarei

² i pa:

I ai kaua gulau Agrippa da amadodo tam au etara e rarautaniḡanei da Jew babadai ai viwavu awariu ana tere-vaiijijimani.

³ Tau aramanei da tam mai Jew ai giu ma ai paripariḡai u aramanana-kauei. Lamna aubaina a vivibaḡaim da au paribelana ma rautaniḡanana-kauei.

⁴ Mai Jew anapapui au lawana i aramanei, aburu da marina, au dobu oina da au Jerusalem.

⁵ ✧Tau i rorova ava i aramaneu ma ina riwem da tau ai boru bagibagina ma piripirina, Pharisi au orana a rui ma tarawatu anapapuna a vojijina-kauei.

⁶ Ma marina a vivitumaḡana da God aiwai noinoita i parivainuaḡani ina kauei. Ma lamna aubaina tau weka a maimairi.

⁷ Wei parivai-nuaḡanana ata dam 12 e vipaipaiei da ina nei lamna aubaina ata rava i vipatutu ma marai ma waguvarai God e viviborumei. Au gulau wei vitumaḡanana aubaina mai Jew e viviwavuii.

⁸ Aiwai aubaina o notanotai da God eḡa tagotagogina da rava iraḡelei ina vovaimairini?

⁹ ✧Tau au naona a notai da aiwai anapapuna ata kauei da Iesu Nasaretei ata viḡaviei.

¹⁰ Ma anina lamna a kauei au Jerusalem. Pirisi ḡeḡetelerana babadai pepa i verei ma lamna i vovai-virewapaniu ma kerisiana vivivirei maḡamaḡai au numa panipani a terei, ma nanare ai iraḡe a vianinei.

¹¹ Mara maḡamaḡai boru numai a naeni da kerisiana a vununaiei da ai tumaḡana ita boviei. Amlou i ḡaiḡai kaua da dobu ḡelau a naeni kerisiana a baibaiei.

¹² Mara tagogi pirisi babadai au Jerusalem pepa i vereu da rewapana i vereu ma a nae au Damaskas.

¹³ Ma aubenai nanare, tau au etanai a nenaē ma a inanai, lalalaina marei i ġairai ma i lalaiai, gamrina madeġa i ġetawanei! Au rava maiteni a bababara i lalaiai.

¹⁴ Anatapuijai a vipeuana au doa ma pona Hebrewi awariu i bababani. I riwa, “Saul, Saul aiwai aubaina e viviġavieu? Tam e ġoeġoei da Tau ma viapoapoeniu wate eġa da tam e viviapoapoeni-melem!”

¹⁵ Ma a paridadana, “Bada tam aiai?”

Ma BADA i paribelei, “Tau Iesu, ravana tauna e viviġavieu.

¹⁶ Wate ma vomairi. Tau a nei awarim da vaivai ata verem da ma vitaunola Tau aubaiu, ma amadodo aiwai u inanai ma aiwai ana viatataiem, ma vimatamatei rava awarii.

¹⁷ Tau ana gagaloem am rava mai Israel awarii ma nanare Jentail ravai awari, ma ana paritawanem Jentail awarii,

¹⁸ da matai ma vikalai, da ai lawana apoapoe ina voterei ma ina nei au lalalaina, ma Satan ana rewapana ina votere-tawanei ma ina nei God awarina. Tauna ai ġo’apoapoe ina nota-tawanei, ma ina taravaini natunatuna rarautanii, ai tumaġana awariu aubaina.”

¹⁹ Lamna aubaina Gulau Agrippa, tau riwa marei au inana a inanai a voteletelei.

²⁰ ✧ Au naona a jima mai Jew awarii au Damaskas ma nanare au Jerusalem ma Judea anatapuna ma muriai Jentail maiteni awarii. A jima da ai ġo’apoapoe ina votere-tawanei ma ina mae-tavirei God awarina, ma ai lawana ina vimataira da ai kaua apoapoe i voterei-tawanei.

²¹ Wei babanii aubaina mai Jew au Tempol i vojijiniu ma i ġoei da ita viraġeniu.

²² Wate God i vilawaniu da marina, ma weka a maimairi da a vimatamata rava muomuoi ma nanare rava ġaeġaei awarii. Aiwai a bababaniei lamna peroveta nununai ma Moses i ririweta ina tupua.

²³ ✧ Tau i riwa da tauvilawana Keriso ina vinuapoapoe. Ma tauna ina iraġe ma ina vinoa da ina vomairi me ma wei matairana ina vinolanola da tauna God lalalaina mai Jew ma Jentail aubaii.

²⁴ Weka Festus i vionaġi ma i garara Paul awarina, “Tam u bua! Am aramana i vibuaim!”

²⁵ Wate Paul i paribelei, “Au bada Festus tau eġa ata bua. Tau aiwai a bababaniei lamna riwa kaua ma babani anona.

²⁶ Wei kaua eġa govagovaġana ma aramanei da Gulau Agrippa anatapuna i aramanei, ma lamna aubaina ana tepatorau wei kauai ana babaniei awarina.”

²⁷ Paul Gulau Agrippa i riwei i pa, “Peroveta e vivitumaġanei bo eġa? A aramanei da nanare!”

²⁸ Ma Agrippa i paribelei, “U notai da tau laġilaġina ma sinaviraiu da ana vikerisiana!”

²⁹ Paul i paribelei, “Laġilaġina bo amapo, a raraupari God awarina da tam ma rava anatapui wei au boruna ina tupua-vira me tau nanare wate eġa sein maiteni.”

³⁰ Anina ma gulau ma gavena ma Benisi i vomairi ma i nae.

³¹ Ma anatapui i nenaē ma i babani vivira ma i vianina i pa, “Wei ravana eġa aiwai apoapoeni ita kauē da tana viraġeni bo tana pani.”

³² Ma Agrippa Festus i riwei, “Mepa da eġa ita vibaġa ġae Caesar awarina, lamna marina tata rupeni.”

27

Paul wagei i vaġai nae au Rome

¹ Festus mara i tereterei i ġetai da tauai ata nae au Rome. Paul ma tau ma panipani ġelau i maiteni au waga a geru ma a vaġai Rome aubaina. Rome ai sorodia badana wavana Julius au urana i terelai. Tauna Caesar ana sorodia vinevinena.

² Waga Adaramitei i nei da a geru ma wagana i ġota-nae au Eisia provins gerana. Orotu wavana Aristakas ana dobu Thesalonika au Masedonia provins tauna maiteni i geru.

³ Au maratamna au Sidon taon a ġota, Julius ivina i ai Paul awarina ma i voterei da i opu au gera da ana rava ita raugenari ma ana ġoana aiwai ita vibaġei.

⁴ Muriai wagei a opu da a nena ma ive i verau-matamataniai ma lamna aubaina bonabona au Saipras ma dobu ġaeġaena au pouna au mulaġina ambori.

⁵ Ma boga ġaeġaena a bori da Silisia provins da Pamphilia provins geraii a voterei da au Maira taon a rui au Lisia provins

⁶ Au Maira taon kampa sorodia badana mai Egypt ai waga Alexandriei i nena au Italy kampa i vigerui.

⁷ Ma aupom maġamaġau i nuatauai a ruba ma a voia guratana da Cinidus taon a tuġereġerei wate ive i verau-matamataniai da kampa waga a virai da Crete bonabonana ma mutu Samone au poui au mulaġina a nae.

⁸ Ma kampa nuatauai bonabona Crete gerana a naeni aubaina mara i apoapoe ma a ġeta dobu e ġoreġorei U Aiaina, Lasea taon au ġereġerena.

⁹ Mara ġaeġaena a vine-boai au vaġai* ma Rupena Ujina marana boi-boġi i kwa,† marina lamna ive ma rabama ai mara ma boga babarana i vinirovorovo.

¹⁰ Ma Paul i riwa, “Nelara, malana a vaivaia da ata vaġai ina apoapoe kaua ma waga ma purapura tana vine-boa-pai. Ata lawana maiteni tana vineboai.”

¹¹ Wate sorodia ai bada, kapena ana babani i rautaniġanei ma eġa Paul da kampa ata mae ma eġa ata nae.

¹² Wei gabuna eġa ita ai wei ivena au marana ma rava maġamaġau i goei da waganei ata nae da Phinix una, Crete au bonabonana da kampa ata mae da bodu ita kwa. Wei u ġaeġaena ma mutu i lavarata ma rauanaġa e vnao-vereverei, da au mulaġina e mamae.

Kojikojira Ġaeġaena

¹³ Maranai rauanaġa i vikarei ma waga ravai i notai da marina mara aiaina da ita nae au Phinix una. Ma anika i taini ma Crete bonabona geraei i nae.

¹⁴ Ma eġa barana ita uama ma kojikojira‡ olei iveiai.

¹⁵ Ive wagana i verau-matamatani ma waga eġa tagotagogina da ita vobei ma i voterei da ive waga i avara-opunei.

* 27:9: Iri i parei da kojikojira ana mara ma i vaġai. † 27:9: Eng. *Atonement* bo *Yom Kippur* marana wei lamna September bo October rabama ma ive ai mara ‡ 27:14: Kariwabu ġaeġaena

16 Bonabona aburuna Kauda gerana au mulaġina a ruba ma kampa a voia guratana da dingy a terepai au waga da a raġita-jijini.

17 Wei i kauana vorovei ma ġuravei waga au gabaurina da waga adana i raġita-kwawiviroi. Taui i rovo mepa da au maratete ina amġaena au Syrtis, § Libya au gerana. Lamna aubaina ġuravei ai da kuka, i raġita-tagogiei ma au boga i vioreneri da waga ita bibi. Ma i voterei da kojikojira waga i avaranaiei.

18 Maratomna kojikojirana i rarau-guratanelei da purapura ġelaui au boga a vioreneri.

19 Aupom vitonuina taui waga purapurai i vioreneri au boga.

20 Kojikojira i ruba da aupom biaġa da madeġa ma ubona i purui. Ravai ai nota i kwa.

21 Wei au marana rava au waga am i kauana-avei, anina ma Paul i vomairi ma taui i riwei, “Nelara ota rautaniġaneu ma Crete eġa tata oputawanei, amapo waga eġa tata viapoapoeni ma ata purapura eġa tata vineboai.

22 Wate a ririwana-guratemi da eġa orami ina peu! Aubaina avena da waga ina monu wate eġa ina iraġe.

23 God lamna tau au BADA ma ana taunola tau. Waguvarai God ana anela i paritawaneiai awariu.

24 Ma i riwa, ‘Eġa ma rovo! Tam anina da Caesar au naona ma etara! Ma ġelauna lamna God ana nuavaina maemaena rava anatapui maiteni e vaġavaġai ina lawana.’

25 Lamna aubaina tepami ina tora! Aubaina tau God a vivitumaġane i ma menanare i ririweia nanarena ina tupua.

26 Wate tauta au maratete tana amġaena.”

27 Kojikojira i avara-naielai au Mediterranean Bogana da aupom 14 i kwa ma nubautuva waga ravai malana i vaia da taui gera i tuġereġerei.

28 Ma barawa au giana ġaima i raġini ma au boga i tawanana-ġairei da topa ana gabinou ita aramanei. Ma i aramanei da 40 meter ma i mae aburuna ma i raudadana-melei lamna marina 30 meter.

29 Ma taui i rovo mepa da rabama waga au kira ina viairikarikai lamna aubaina waga au ipuna anika 4 i tawana ġairei ma i vipaipai da mara ina tom tawanana.

30 Ma waga ravai ai kua i kaukaui da ita ruba-govaġa. Ma i vioga da dingiei ita opu waga au naona da anika ita dubara-naiei, ma lamna aubaina dingy i teretere-ġairei au boga,

31 Wate Paul sorodia ai bada maiteni i riwei, “Mepa da waga ravai ina rubatawanemi lamna anatapumi ona iraġe.”

32 Ma sorodia dingy ġuravana i borituini ma dingy kwakwawina i peu au boga ma i avara-naiei.

33 Ma maratomtomi Paul rava anatapui i egari da ita am, i pa, “Taumi marina aupom 14 rovo i kauemi ma eġa ota am.”

34 “Tau a vivibaġa-guratemi da ona am da ona virewapana, eġa aiai tagogi ina iraġe.”

35 Paul i babani vorovei ma au matai palawa i vaia, BADA i viegualaei ma i vogimai ma i ani.

36 Ma rava anatapui inanai ma orai i bagibagi ma am i vikarei.

37 Tauai anatapuiai 276 au waga.

§ 27:17: Wei lamna maratete.

³⁸ Ma rava anatapui i am da i am-iaua. Ma witi baikei au boga i viorereni da waga ita votelatelai da au gera ita ġota da avena ita amġaina.

Waga au maratete i amġaena

³⁹ Maranai mara i tom tawanana tau i dobu i 'nanai wate gerana eġa ita aramanei, wate U inanai da gerana aiaina ma i notai da gerana aiaina da waga kampa ita viġaeni.

⁴⁰ Anina ma anika ġuravai i viaituituini, ma labilabi i tere-ġairei, ma waga au naona kuka voaburunei i votawatawanei ma gera aubaina i ruba.

⁴¹ Wate waga au maratete i amġaena da i tapaiei, ma rabama waga ipuna i viairikarikai.

⁴² Sorodia i ġoei da panipani ita viraġeni, da avena ita toa-ġaira au gera ma ita viruberubei.

⁴³ Wate sorodia ai bada i ġoei da Paul ita vilawani ma i viġaei, anina ma ai vogatara eġa ita kauai. Ma tau i aiavoi toa i aramanei i egari da i viauepa au boga ma i toa-ġaira au gera.

⁴⁴ Ma ġelaui aiwai da i tenatenam i vidauei. Ma nanare anatapui lawalawaii au gera i ġota.

28

Paul au Malta bonabonana

¹ Maranai a ġota au gera ma a aramanei da tauai au Malta bonabonana.

² Dobuna ravai i nebelelai ma ivii i ai kaua awariai. Garewa atuna i vikarei ma i ubauba, ma tau i au gera ai i viviri.

³ Ma Paul ai ragorago i ġuna da ai au tepana i tereterei ma mota ġaiġaiawana ai bolana malana i vaia da i opui ma Paul nimana i ani.

⁴ Dobuna ravai i 'nanai da motana Paul au nimana i dawedawe ma i pariararava, "Wei ravana lamna tauviraġena ma eġa ita monu wate ata god* e ririwa da tauna eġa ina lawana."

⁵ Wate Paul motana i viaikwajiei da ai au menamenana i rauei ma tauna eġa ita kero.

⁶ Rava i vipaipai da Paul nimana ita dodo bo ita peu da ita iraġe. Wate maranai i vipaipai guratana ma i 'nanai da tauna anina, tau i ai nota i virai ma i riwa da tauna god ġelauna.

⁷ Au gerana a ġotaġota - lana au ġereġerena lamna dobuna badana Publius ana wapu ġaeġaena. Tauna i taravainiai ma i paina-kauelai da aupom tonuġa

⁸ Publius amana i doria manawa ruba ma iniguġura i vaia da i matamatave, Paul i rui inanana aubaina ma urana au tepana i terei ma i raupariei ma i vilawani.

⁹ Anina ma rava anatapui doridoriai au bonabona i nei ma i vilawani.

Paul au bonabona Malta da i nae au Rome

¹⁰⁻¹¹ Kampa mai Malta maiteni a mae nawaravi tonuġa. Ma ravai i voagu-kauelai ma maranai ata vomairi, ai ġoana vaġai aubaina anatapuna i verelai. Ma waga ġelauna a gerui lamna mai Alexandria ai waga bodu aubaina kampa i mae. Waga au naona lamna ai god ruaġa kokoitau i tai†.

¹² Kampa ma a amkuka-nae da au Sairakius a ġota ma a mae aupom tonuġa

* **28:4:** God wavinena wavana kaua aiaina bo kaua jijimanina (Justice). † **28:10-11:** Wei lamna mai Rome ai god raġaraġa wavai *Castor* ma *Pollux* ruaġai e ġoreġore *Dioscuri* bo **raġaraġa marei**, Taiu lamna god *Zeus* ma *Leda* natunatui.

13 Kampa da ambori damana au Regium ma maratomba raua-nağa i wanabauni ma amkuka ma geraei a ruba da maratomb gela au Puteoli a gōta.

14 Kerisiana kampa a nelağai ma i riwelai da maiteni a mae wiki tagogi. Anina ma a babara-nae da au Rome taon a gēta.

15 Kerisiana au Rome riwaiiai i vaia da a nenei ma i gēi da ita nebelelai, gēlauri i gēi au taon e gōreğorei Vagavağai Tonuğa ai Numa ma gēlauri i gae Apius ana au maket. Maranai Paul wei ravai i 'nanai, ma i vinuaiiai kaua ma God i vieğualaei.

16 Maranai au Rome taon a gēta tau Paul numa i verei da ainelana i mae ma sorodia i terei da i 'nana-vaitetei.

Paul au Rome i raugugula

17 Ma aupom tonuğa au murina Jew babadai kampa maemaei i raugoreiai ma awarii i babani, "Varevareiu tau eğa aiwai ata kauana-boai ata rava awarii bo amamata ai tarawatu ata viağai. Wate au Jerusalem i panu ma i veredamaneu Rome gavena awarina.

18 Mai Rome i etareiu ma i gōei da ita rupeniu aubaina eğa aiwai apoapoena ata kauai da ina viragēniu.

19 ☆Wate Jew babadai wei eğa ita gōei ma lamna aubaina Rome babadai a riwei da tau eğa ana mae wate ana gae au gaeğae Caesar awarina da ita rauetareiu. Wate lamna eğa au rava ata viviğaviei, eğa.

20 Lamna aubaina a gōremi weka da tata babani gogona, ma ata riwemi da tau a vipanipani aubaina a vitumağana da mai Israel ai tauvilawana wariaga i ririwei boiboği i nei."

21 Tau i paribelei, "Tauai eğa pepa Judeaei ata vaia bo ai rava riwa ita nei.

22 Tauai aramane i ravai anatapai kerisiana boruna e paripari-virevirei. Wate tauai a gōei da am nota ana vaia."

23 Ma tau mara i terei da Paul maiteni ita viboru, ma patara i gētai mepa Paul i mamaelana. Ma ubaubanai Paul God ana vigulau jimana i vikarei da waguvarai i vorovei. Moses ana tarawatu ma peroveta nununaii ai au buka i mairi ma i jima. I gōei da orai ita taini da Iesu ita vitumağanei.

24 Ana babaniei gēlauri orai i taini ma gēlauri eğa ita vitumağana.

25 Ma tau avababanina i viparipariniğaei ma muriai da ita vilamonei Paul wei riwana tagogi i latoni i pa, "Arua Vivivireina riwa kaua Peroveta Isaiah ponanei amamami i riwei i pa:

26 *Ma nae am rava mai Israel awari da ma riwei,
ona nononora wate eğa ona araramanei*

ona inanai wate eğa anona ona aramanei.

27 *Aubaina wei ravai orai i bado.*

Taniğai i gudui,

Tau matai i vopotai.

Mepa da tau mataiei ita inainana,

taniğaei ita nononora

oraiei ita araramanei,

ma ita mae-tavirei awariu ma ata vilawani.

(Isaiah 6:9-10)

28-29 —Lamna aubaina ona aramane i God Riwana Aiaina vai-melana aubaina i paritawanei Jentail awarii. Tau ina rautaniğana."

³⁰ Paul kampa numa i vivimaiei ma i mae madeġa ruaġa taputapuna. Ma rava maġamaġau i nenei da i raraugenari ma wei i vinuaiaiei.

³¹ Ana tepatorana God ana vigulau ma Iesu Keriso riwana Aiaina i jimei. Ma eġa aiai ita viġaei.

Psalm Wela ma Pari

Pariverena

Mara manamanaina i netawanana rava maḡamaḡau taputapunei ava wela ma pari i girumi wei au bukana. Mai Israel wei wela ma pari i tami ma i teretagogiei da lamnei God i viviborumei.

Wei au bukana wela ma pari tapuna ma tapuna. Ġelaui God e viviborumei ma e vovoeapaepai ma ana iviaiai aubaina e viviegualauei. Ġelaui e vivibaḡa agu ma gagalo aubaina, bo notatawanana aubaina. Wela au ġelaui, rava e raraupari ai gulau aubaina ma god e vivibaḡai da ai ḡavia ita kovoḡi. Ma wela au ġelaui tauamgiruma ana apoapoe ma ana nuabola aubaii God awarina i beubeura.

Ma maraḡela Iesu riwa wei au parii i vaia da i viaramana. Kerisiana wei wela ma parii i welewelei ai au viboruma ma i jimajima.

Wela vinevinei

Psalm 1, 10, 23, 27, 34, 51, 67, 90, 95, 1-11, 100, 103, 110, 103, 110, 119, 9-16 ma 139.

Buka Tagogi

1

Nuaiiai ririwa-kauana

¹ Rava viaiainana, lamna eḡa ḡo'apoapoe ravai ita votaḡotaḡoi,
ma ponai eḡa ita rarautaniḡanei;
ma vivijiboḡai eḡa awarii ita kiakiala.

² Wate BADA ana tarawatu i vinuaiaiei,
aupom ma marai e notanota-vaitetei.

³ *Tauna me ai, waira au adana gogogona,
ana au mara e rarauano;
ma rugurugui eḡa ita poipoi.

Wei ravanana, aiwai anatapuna e kaukauana-kauei.

⁴ Wate ḡo'apoapoe ravai eḡa nanare!

Tau me rugurugu, ive i kapupuana-naiei;

⁵ Lamna aubaina ḡo'apoapoe taukauei BADA ana au etera ita mairi ava,
ma nanare ḡoa apoapoei ta kauei rava jijimani ai au dam ita mae ava.

⁶ BADA ḡoa aiiai ravai e rarauetaraveni ma e paipaini;
wate ḡo'apoapoe ai etanai au damona, pupui.

23

*Bada taupainiu**

David ana wela

¹ BADA taupainiu

ma eḡa aiwai ana voladaḡei.

² Gidagida majimajigai au tepana i vimataveniu,
ma i raveniu waira au raraunairina au adana.

³ Au rewapana e raviravivouni
ma wavana aiaina aubaina etanai jijimaninei i raveniu.

⁴ Avena da gwagwa waguwaguvareina ana naeni,

* 1:3: Jer 17:8 * 23:: Taupainiu me sipu taupainina.

wate eġa aiwai apoapoena ana rovoei.

Aubaina tam au ririvau da am kwapuei ma jġgonei e gagagaloew ma
e vivinuaubaiu.

⁵ Aubaiu torela e vokaukauei au ġavia au naoi.

Oilei kolau u volaġolaġoi da tam u vinuavaineu,
ma au kelaka i oa-karagelai.

⁶ Ee! Riwa kaua da am iviaiai ma am raunuapoapoe maemae nonoana
awariu ina mae, da au mara au damona.

Ma BADA ana au numa ana mae-nonoa.

27

Voepaepa parina

David ana wela

¹ BADA au lalalaina ma au tauvilawana,

aiwai ana rovoei!

BADA au taugagagalo

aiwai ana rovoei!

² Maranai ġo'apoapoei ravaii i ġetai

da ita vunuiu,

au ġavia

aei ina pakana-melei da ina peu.

³ Avena da sorodia borui ina mae-gariġuruvui,

tau eġa ana rovo dadana.

Maranai au ġavia i vomairi,

tau anina da God ana vivitumaġanei.

⁴ Kaua tagogi ava aubaina a vivibaġa.

Au ġoana ġaeġaena da,

BADA ana au numa, boruborumana ana mae,

ma ana voepaepai. Au lawana au anatapuna.

⁵ Nuabola au marana

ina tereġaġariu.

Ana gabu au vivivireina, ina teregovaġiu.

Ma ola au tepana ina tereu

da ġavia eġa ina vodadaniu.

⁶ Ma au ġavia i garigari kwaipipiniu, ana tuvaidoedoei.

Da au tempol ana morelanau pulo ana apui BADA awarina.

Ana vinuaii ma welei ma arei ma ana voepaepai.

⁷ BADA ma rautaniġaneu maranai awarim a kwatukwatu,

ma raunu'apoapoleu ma ma paribeleu.

⁸ Au orau u riwa, u pa, "Ma nei da ma rauduneleu."

Tau a paribelem a pa, "BADA a nenei."

⁹ Eġa ma raugovaġeu,

eġa awariu ma ġaiawa.

Am taunola eġa ma inana geduaiei,

au anatapuna tam, au tauagu.

Eġa ma netawaneu,

au God, tam au tauvilawana.

¹⁰ Avena da amau ma alou ita teretawaneu,

wate BADA ina paina-kaueu.

¹¹ BADA, ma viaramaniu da am ġoana ana kauei.

Ma etanai au ġadaġadarana ma taravainiu aubaina au ġavia i maġa

¹² Tau moruei ma parivairovorovoei e vunuvunuii.

Lamna aubaina, eġa ma teretawaneu awarii

¹³ A 'ramanei da BADA ana viaiaina ana inanai,
weka lawalawai ai au dobu.

¹⁴ BADA ma vitumaġanei,
da ma virewapana ma tepam ina tora.
Anina BADA ma vitumaġanei!

34

BADA ma viborumei

¹ BADA ana vimaēgaēgaeni marana patapatai,
ma ana viborumana-nonoei.

² Orau taputapune BADA ana voepaepai;
Vilamolamonai riwau ina nonori ma ina vinuai.

³ Ona nei ata BADA tana vimaēgaēgaeni
wavana tana voepae-gogonei.

⁴ A raupari BADA awarina ma i paribeleu,
awariu rovo anatahui i vaitawanei.

⁵ Aiavo awarina e inainana,
taui naoi ina ravilalai
ma eġa melanai ina vitepa-ubaubai.

⁶ Au nota i kwa da a ġorei, ma i nonori
ma nuabola au orau i vaitawanei.

⁷ Ai ai da BADA e vivivirana-kauei,
ana anela taui e inana-vaitetei, ma e vivilawani.

⁸ Taumi ona raudadani ma ona aramanei da BADA i aii.
Taui BADA au ġouna maemae nuaiai ġaēgaena awari.

⁹ Taumi vititumaġanami eġa aiwai ona voladaġei.
Lamna aubaina, BADA ona vivirei.

¹⁰ Lion ġauboi mara ġela am e irairaġe,
wate aiavo da BADA awarina e vitumaġana eġa ina voladaġa.

¹¹ Natunatu, ona nei, ona rautaniġana,
ma ana viararamanimi da BADA ona vivirei.

¹² Taumi o ġoei da ami lawana ina aii
ma ina manawa bo?

¹³ Nanare, lamna menami ona paina-melei da eġa babani apoapoe bo
moru ona babaniei.

¹⁴ Ġoa apoapoe ona geduaiei ma kaua aiaii ona kaukauei,
ma ona voguratei da nuauba lawanana ona maeni.

¹⁵ BADA, matana ġoa aiaii ravai awari e tereterei,
ma taniġana e tonetonei mepa da agu e toutouei.

¹⁶ Wate tauna ġo'apoapoei ravai e mamae-puputei
taui ina iraġe ma rava nuanuai ina vuru.

¹⁷ Rava jijimanii agu aubaina e viviġore BADA awarina
tauna e rarautaniġana ma ai vita e vaivaitawanei.

¹⁸ Tauna rava peupeui, rovorovoi, ma vinuabolai e vivilawani,
tauna rava orana i peu kaua e vovoepai.

¹⁹ Rava jijimanii ai nuabola i maġa
wate BADA taui e vovoagui ai au nuabola.

²⁰ E inainana-vaitetei da eġa gelamina tagogi ina wanagai.

- 21 Ġoa apoapoe ravai ai apoapoe ina vunumelei,
ma aiavoi da ġoa aiiai ravai e gedugeduaiei, ina kovoġi.
22 BADA ana taunola e gagagaloei,
aiiai da e nenei BADA au ġouna, kovoġa ina vorei.

51

David ana rupena

Mara tagogi, Gulau David ana taunola Uriah awana
Bathsheba i tavimatanei da maiteni i matave.

¹ Oo God, ma raunu'apoapoeleu. Tam nuavaina maemae-nonoana amai.
Tam raraunuapoapoei amai

au ġo'apoapoe ma notatawanei.

² Au rauaġaiġai ma oġai
ma au ġo'apoapoe ma oġa-tawanei.

³ Au rauaġaiġai a aramanei
marana patapatai a notanotai.

⁴ Kaua apoapoei a kauai.
Tam ainelam awarim Ġoa apoapoei a kauai,
ma am viwavu lamna riwa kaua.

Amapo anina da ma kovoġiu.

⁵ Tau rauaġaiġai, melamelauei da marina
Au manawa da marina tau ġo'apoapoe taukaueina.

⁶ Wate tam u ġoei da riwa kaua au ora-dewadewau ina mae.
E viviararamaniu da nuaulaula orau ina oai.

⁷ Au ġo'apoapoei ma oġa-tawanei,
ma oġaiu da ana arapoirana da gonu rovena arapoirana ana ġetawanei.

⁸ Ma riweu da au ġo'apoapoe u nota-tawanei
da ana vinuaiiai ma ana morelana
avena *da gelamiu u viaigaigai, marina ana vinuaiiai.

⁹ Au ġo'apoapoe ma inana-tawanei
ma au apoapoe mirai ma boai.

¹⁰ Oo God nuanua ma ravivouni
da ana vipatutu kaua awarim.

¹¹ Eġa au naom ma tawana-opuneu
ma awariu eġa Aruam Vivivireina ma vaitawanei.

¹² Vilawana nuaiaina ma ravivouni me au naona nanare
aruau ma viaiaini da ana voteletelem.

¹³ Lamnei, ġo'apoapoei taukauei am kaua ana viararamani,
da ina mae-tavirei awarim.

¹⁴ Oo God, vi'raġena vitana awariu ma vaitawanei,
da am kaua jijimanii ana welei.

¹⁵ Oo Bada ipiriu ma votawanei da gamou ina vimaēgaēgaenim.

¹⁶ Au pulo, ġamoġamo ata apui awarim,
wate tam pulo apuapunana eġa uta vinuaiiaiei.

¹⁷ Bada, pulo e ġoeġoei lamna vilamolamona.
BADA, eġa au vilamolamona ma au rupena ma geduaiei!

¹⁸ Am nuavaina Jerusalem ma viaiaini,
ma ana gari ma voa-melei.

* **51:8:** Au vinuabola lamna me gelamiu wanagaina

- 19 Anina ma ai pulo nota aiainei ina vikarena-melei da ina kaukauei ma
 ma vinuaiaiei.
 Tauī pulo tapuna ma tapuna ina apui awarim.
 Bull maḡamaḡau am au aniamapu ina apuapui.

67

Vieḡualau welana

- 1 Oo God ma raunu'apoapoelelai ma ma viaiainiai,
 ma naom weka ma tereiai da ma voaguiai!
 2 Da au dobu am kaua ina aramanei,
 da rava anatapui au dobu ina aramanei da tam ai tauvilawana.
 3 Rava ina voepaepaim Oo God,
 rava anatapui ina vimaēḡaeḡaenim.
 4 Rava anatapui au dobu ina vinuaiai ma ana morelanai ina wela,
 aubaina tam rava anatapui au dobu, kaua jijimaninei e vivibadei
 ma e paipaini.
 5 Rava ina voepaepaim Oo God.
 Rava anatapui ina voepaepaim.
 6 Anina ma doa maura ḡaeḡaena ina vereta
 ma God ina viaiaina-kaueta
 7 Riwa kaua, God ina viaiainita
 ma rava anatapui au dobu tauna ina vivirei.

90

God ana taunola Moses ana pari

- 1 Bada ai animae
 kimta wariḡa da marina.
 2 Tam God maemae nonoana
 muriai da ola
 ma dobu uta kauēi.
 3 Tam rava e ririwei da e vipokau, ma e ririwei,
 “Rava ona wanaviraimi”
 4 Tam awarim madeḡa 1,000 lamna me aupom tagogi, i tupo kaua
 me raviravi, eḡa ita manawa dadana.
 5 Rava ai lawana e vaivaitawanana laḡilaḡinei me rauboni damona.
 Tauī me modu, ubaubanai e raraupairei,
 6 da e rarata ma e talatalai,
 wate aubigai e ḡiviḡivi.
 7 Nanare am meji tauai e lagulaguriai ma
 maranai e ḡaiḡaiawa tauai a rovorovo kaua.
 8 Ai ḡo'apoapoe anatapui au naom u lavaei,
 ai ḡo'apoapoe govagovaḡana, wate anatapuna e inainanai.
 9 Am meji ai lawana i vitupoi,
 ma ai madeḡa laḡilaḡina e kwakwa, a lavutu-tawanana.
 10 Madeḡa 70 i vereta da tana mae,
 mepa da tana virewapana lamna 80;
 Wate wei lamna nuabola ava ina vereta,
 eḡa tana mae-pora ma tana nae.
 11 Eḡa aiai am ḡaiawa malana ita vai-kauēi.
 Mepa da am ḡaiawa ata aramana-kauēi, lamna tauai ata vivirana-kauem.

- 12 Ma nanare, ma viararamaniai da ai lawana i tupo kaua,
ma lamna aubaina awarim nuaulaula ana vaia.
- 13 Oo BADA! Ma nememei awariai.
Ma mae-tavirem, ma vinuabolelai, tauai am taunola.
- 14 Ubaubanoi marana patapatai am nuavaina maemaena ma verelai,
da ana morelanai ana logoiai ma ai au mara anatapuna ana vinuaiai.
- 15 Madeğa biağa u kovoğiai, nuaiai ma verelai
da madeğana biağa a vinuapoapoe ina kovoği.
- 16 Tauai am taunola, am nola vivirewapanana ma viatataielai.
Ma natunatuiai am boruma ma viatataiei.
- 17 Ma Bada ata God ana vianina ina viatataieta
ma ina kauai da aiwai anatapuna ta kaukauei anona ina tupua.
Nanare ai nola ma viuai.

91

God ata rawena

- 1 Aiai ravana e nena Aidamo Telarana awarina agu aubaina,
lamna Vivirewapanana Kaukauana au ririvana ina mae.
- 2 BADA au God awarina ana riwa ana pa, “Tam au anigagalo ma au
tauviğavia.
Tam au God, a vivitumağanem.”
- 3 Aubaina tauna, ġavia ana waro govagovağai
ma numa rarauabubu awarinei ina gagaloemi.
- 4 Tauna papenenei ina tereğovağimi ma papena au gabaurina
ina gagaloemi;
ana vipatutu, am rawena ma am anigagalo.
- 5 Waguvara kauai vi’ni-rovorovoi eğa ona rovoei,
bo ġavia madeğai e viviğavia,
- 6 bo numa rarauabubu waguvara e viviğavia,
bo doria madeğai e vivirağena.
- 7 Avena da rava tausan au ririvam i peu,
bo ten tausan au oiem i peu;
wate tam ita voadana-avem.
- 8 Matamiei ona inana ma ona inanai
ġo’apoapoe ravai ai kovoğa.
- 9 Aubaina BADA o vaia ami rawena; Ġetelarana ami taugagalo.
10 Eğa aiwai apoapoena awarimi ina tupua bo au numa ina ġeta.
- 11 God ana anela ina terei da ina painimi
ma ina gagaloemi ami au babara.
- 12 Taui uraiei ina voepaim
da aem eğa ġaima au tepana ma rauei.
- 13 Taumi lion ma mota ona vovaiubai,
lion ġaiğaiawai ma mota viviwaiawai ona tugwadagwadai.
- 14 God i riwa i pa, “Aiai nuanuau e vaivainonoei, ana vilawani;
ma ana gagaloiei, aubaina i aramana-kauai.
- 15 Maranai i kwatu awariu, ana paribelei.
Tau kampa ai au nuabola,
ana taravaini ma ana voepaepai.
- 16 Ai lawana ana vimanaini,
ma au vilawana mamae-nonoana ana viatataiei.”

95

BADA tana welei

- ¹ Ona nei! Tana wela BADA awarina.
 Ana nuaiaita tana wela God ata tauvilawana vivirewapana awarina.
- ² Tana nei au naona ma tana viegualaei
 ma welei tana voepaepai.
- ³ Aubaina BADA lamna God virewapana kaukauna,
 ma god anatapui e inainana-ġairei.
- ⁴ Dobu anatapuna au urana,
 guba ġaeġaei doa au orana da ola ġaeġaei au tepai.
- ⁵ Boga tauna ġarinei, tauna i kauiei
 ma nanare tauna uranei dobu alalana i tere-kauiei.
- ⁶ Ona nei ma tana raudune ma tana vimaēġaeġaeni,
 ae tututa tana tapeġaroei taukaueta BADA awarina.
- ⁷ Aubaina tauna ata God.
 Tauta natunatuna. Ana sipu ma e ġamoġamoita ana au wapu.

Mepa da ponana o nonori amadodo,

- ⁸ ✠E riwei i pa “Eġa orami ona gudui me amamami au Meribah;
 me au mutulua au Massah.
- ⁹ Kampa amamami i 'nanai, kauababai a kauiei
 wate eġa ita vitumaġaneu, ma i raudadanu.
- ¹⁰ Madeġa 40 wei kimtana awari amlou i ġaiġai ma a riwa,
 ‘Wei ravai orai i bagibagi ġaġa!
 Eġa ita rarautaniġaneu.’
- ¹¹ Ana mejiu a parivainuaġani,
 ‘Gabu a vokaukauei ami lauvitau aubaina wate kampa eġa melanai
 ona rui.”

100

Voepaepa welana

- ¹ Rava anatapumi au dobu ona logoimi BADA awarina!
- ² Ana nuaiaimi BADA ona voepaepaei,
 ona nei au naona ma ona welei.
- ³ Ona aramane i da BADA anina God.
 Tauna i kaueta.
 Ma tauta tauna ġarinei. Tauta tauna natunatuna. God ana sipu ma
 e gagaloeta me sipu taupainina.
- ⁴ Ana welami ana au gari ona rui ma voepaepami
 ana au aniviboru ona rui,
 ma ona vimaēġaeġaeni.
- ⁵ Aubaina BADA i aii;
 natunatuna e vivinuavaina-nonoei,
 ana vipatutu e mamae-nonoei, kimta au anatapui.

103

BADA ana nuavaina

David i girumi

- ¹ Orau taputapunei BADA ana voepaepai.
 Wavana vivivireina ana voepaepai.
- ² Orau taputapunei BADA ana voepaepai,

- kaua aiaii i kauē aubaiu eā nuanuau ina vuru.
- ³ Au ǵo'apoapoe anapui e notanota-tawaneī,
ma doria awarineī e vivilawaniu.
- ⁴ Ata iraǵe ma i sinaepaiu
ma nuavaineī ma raunuapoapoelei e vivigulaueu.
- ⁵ Au lawana au anapuna
purapura aiaii avai i verevereu, au vilaraga marana i raviravivouni me
*manubada.
- ⁶ BADA ana kaua anapuna jijimanina.
- ⁷ Ana oga Moses i viatataiei,
ma mai Israel BADA ana kaua vivirewapanai i 'nanai.
- ⁸ BADA raraunuapoapoea ma ivina aiaina,
Eā laǵilaǵina amlona ita voǵaiǵai. Ana nuavaina maemae-nonoana.
- ⁹ Eā mara nonoa ina enita,
ma ana amloǵaiǵai eā ita mamae-nonoa.
- ¹⁰ Anina da ita kovaǵa-kaueta,
wate i raunu'apoapoeleta da kovoǵa eā ǵaeǵaena ita verevereta.
- ¹¹ Dobu weka ma mara nore au tepadewadewana.
Nanare, BADA ana nuavaina i rata guratana tauī da BADA e vivivirei
awarii.
- ¹² Mepa madēǵa e gogogolana da mepa e ǵaiǵairalana, lamna uama,
ma nanare ata ǵo'apoapoe vinimalana e vaivaitawana-naiei aueia.
- ¹³ Me ama natunatuna e raroau-nuapoapoelei,
nanare BADA natunatuna e raroau-nuapoapoelei.
- ¹⁴ Aubaina i aramaneī da tauta pokauei i kaueta.
- ¹⁵ Ata mara au dobu lamna me modu.
Ta gogogo ma ta rarata me berana moduei;
- ¹⁶ Anina ma ive i uvena-kapupuei,
eā ita mamae, ana gabu i kwakwava.
- ¹⁷ Tauī da BADA e voepaepai ana nuavaina maemae-nonoana
awarii ma nanare noinoi ma ai epaepaia awarii
- ¹⁸ tauī aiavoi da ana parivainuāǵana bagibagina e vovojijini
ma ana patupatutui tarawatu e vovojijini.
- ¹⁹ BADA ana vigulau anikialana au mara i terei,
ma kampa ana vigulau e vivibadei.
- ²⁰ BADA ana anela, vivirewapanami,
BADA riwana o rarautaniǵaneī ma o kaukauei,
BADA ona voepaepai.
- ²¹ Anina BADA ana anela marei,
BADA ona voepaepai taumi ana taunola ma ana ǵoana anapuna
o kaukauei.
- ²² Taumi anapumi BADA uraneī i kauē, ana au vigulau maemaei, BADA
ona voepaepai.
Tau nanare orau taputapuneī BADA ana voepaepai.

110

Gulauna vinevinena

David ana wela

¹ ☆ BADA au bada wenanare i riwei,

* **103:5:** Manubada tawarana waduboi e peupeu ma voui e gogogo. Me manubada tawarana voui e gogogo nanare tam au lawana e raviravivouni. ☆ **110:1:** Mrk 12:36; Act 2:34-35

- “Au oieu ma kiala
da am ġavia
au ae karem ana terei da ma tuvaídoedoei.”
- ² BADA, am gabemani vivirewapanana Zion * ana parata ina viratai,
da am ġavia ma vibadei.
- ³ Am laraga ana nuaii ina verena-melei da ina visorodia,
ma ona ġae BADA ana ola au tepana viġavia aubaina,
ma ami rewapana ina ravivouni ubaubanai patapatana me ubaubanai
turuvanina.
- ⁴ BADA i parivainuaġanim ma eġa nuanuana ina virai;
“Tam piriši maemae nonoana me Melkisedek.”
- ⁵ BADA au oiem e maimairi da e paipainim;
tauna gulagulau ina piaġi maranai amlona ina ġaiġai.
- ⁶ Dobu nununai ai ġoa apoapoe ina kovoġi,
ma taubeu dobuna ina vioai
ma dobu gulagulau anatapui kolai ina viaigwadagwada.
- ⁷ Wate au etanai au vuvura ina uma
ma rewapana ina verei ma ina vovaiuba.

119

BADA ana tarawatu boruborumana

- ⁹ Rava vouna menanare lawana aiaina ina maeni?
Tauna riwamei ina paina-melei.
- ¹⁰ Lamna aubaina a baibaie orau taputapunei;
eġa ma votereu da riwam ana geduaiei.
- ¹¹ Riwam a iaiavi ma au nuanuau a tereterei,
da eġa ġo'apoapoei awarim ana kauai.
- ¹² BADA, a voepaepaim!
Am tarawatu ma viararamaniu.
- ¹³ Ipiriuei ana bababani ma
am tarawatu anatapui u vereverei ana jime.
- ¹⁴ Am tarawatu votelatelana a vinuaiainana-kauai,
eġa me vipurapura bo vimane.
- ¹⁵ Riwam ana iavi
ma ana vinuanotenotei.
- ¹⁶ Am tarawatu a vinuaiaina-kauai,
eġa riwam ana voteretawanei.

139

Bada anatapuna i aramanei.

- David ana wela
- ¹ BADA orau u inanai ma au kaua anatapui u aramanei.
- ² U aramanei mara aiwai a kiala ma a vomairi.
Avena au uama wate au nota e araramanei.
- ³ E inainanai maranai a babara bo au numa a vililauvitau.
Anatapuna a kaukai e araramanei.
- ⁴ Muriai da ata babani tam e araramanei aiwai ana latoni.
- ⁵ Tam e garigari-kwaipipiniu,
ma uram virewapananei e paipainiu.
- ⁶ Lamna riwa kauana, awariu i aii kaua
ma i ġe-dewadewa da kolau i kwauna-kauai.
- ⁷ Mepa ana nae da Aruam ana raugovaġei?

* 110:2: Jerusalem wavana ġelauna.

- Mepa ana ruba da ana raugovaḡem?
- ⁸ Ata ḡae au mara da tam kampa;
mepa da i 'rairaḡei ai au dobu ata rauviraiu, tam kampa.
- ⁹ Mepa da ana lave nae au maramatanei,
bo mepa madeḡa e neneulai,
- ¹⁰ avena kampa ma uram ina raveniu,
ma am rewapana ina painiu.
- ¹¹ Mepa da ana riwa, "Gimtona ina tereḡovaḡiu
ma lalalaina ina gimtona."
- ¹² Wate avena da gimtonana amapo eḡa ana raugovaḡem.
Tam awarim gimtona ina rarana me marai, aubaina tam awarim
gimtona ma lalalaina lamna tagogina.
- ¹³ Tam tupuau anatapuna u voai da alou au manawana u teretagogieu.
- ¹⁴ A viviegualauem aubaina tam am nuavainei ma am borumei u voa-
kaueu! Am rauḡaroḡaro i aii,
A voepaepaim aubaina a aramana-kauei.
- ¹⁵ Tam u vivineneḡaneu maranai a tuputupua au govagovaḡana, alou au
manawana,
tam ainelam anatapuna u aramanei.
- ¹⁶ Tam u inanaiu muriai da a tupua.
Aupom biaḡa u vereu da ana mae
lamna au buka u girumi,
muriat da aupom naona i ḡotai.
- ¹⁷ God! I piripiri guratana da am nota ana aramanei.
Am nota kolau i kwauni, eḡa aiwai ḡelaunei am kaua ana aramanei.
- ¹⁸ I maḡa guratana eḡa me bubu, iavana ana kauana-avei,
avena da ata iava-pai, tau amapo da tam ana vivinuanainem.
- ¹⁹ Oo God! A ḡoei da ḡo'apoapoei ravai uta viraḡeni.
Taufiraḡena uta viaḡaḡei da eḡa ina nei awariu.
- ²⁰ Aubaina e vivijiboḡim,
ma wavam eḡa ita vivivirei.
- ²¹ BADA, rava e gedugeduaiem, tau ravai a gedugeduaiei.
Tau i eḡa ita voteletelem lamna aubaina tau i au ḡavia.
- ²² Tau i a geduaiana-kauei,
anina tau i au ḡavia.
- ²³ Ma tuvirevireu, ma orau ma inana-pai.
Ma raudadaniu da nuanuau ma aramanei.
- ²⁴ Mepa da ḡoa apoapoe au orau, ma viatataieu,
ma ma raveniu etanai e nenaie au lawana maemae-nonoana awarina.